


NKONKO NÈ MANDAMUNA

PA NYUMA MWÎMPÈ

 Nenku paanyimà pàà makèèlèlè dilòòlò tuvwa bônso anu buukùte. Ndi mutèèlèje milubù milenga ayi leelu ewu ya bààbùngì bàdì bapetè Nyuma Mwîmpè abu. Ne tudi ne disànkà bwa bwalu abu.

² Ndi ne disànkà dya kwikalakù ne Mwanèètù Graham pàmwè neetù dilòòlò edi, umwe wa ku beena dyètù bàà mu tabernacle emu, mpaasàtà wa ekeleeziya wa cijila mu Utica mwàmwa. Ne Mwanèètù Jackson, ùvwa kaaba aka, makèèlèlè dilòòlò, ngeela meeji ne mmwômò, anyì wàlùkìdì mu batèèleji emu mwaba kampànda mpindyewu, mwàmbìbo kùdì muntu kampànda, mu. . . Eyowa, ndi mmòna Mwanèètù Jackson mu batèèleji mwàmwa mpindyewu. Ne—kadi Mwanèètù Ruddell, yèyè ùdì kaaba aka dilòòlò edi anyì? Yèyè mmukwabo wa ku beena dyètù bàà mu “62” emu. Tudi ne disànkà dya kwikalakù naabò mwab’ewu. Nenku ne wetù. . . Kaa, Mwanèètù Pat, ne bàna beetu bakwabo bônso aba, tudi—ne mu batèèleji mwàmwa. Tudi ne disànkà dya kwikalakù neenù bônso kaaba aka dilòòlò edi.

³ Mpindyewu, bu mèmè mwa kusingishakù cintu aci, ndi mufwànyine kufikisha bayiishi bìmpè abu kaaba aka bwa bôbò kwakulakù neenù, bwalu mèmè díyì ndimpàte anu ku dipìcila dya mu cikondo cilenga cya makèèlèlè dilòòlò aci.

⁴ Mpindyewu, mukàjàànyì, yèyè ki wanyì mundongolodi; nudi bamanyè’s, bàna beetu, cìndì ngamba aci. Ùvwa wàmba ne bantu bàvwà paanyimà pààpa makèèlèlè dilòòlò kabàvwà mwa kungumvwakù to, bwalu mvwa ngaakwila mu cintu eci. Nenku mpindyewu, kumpàlà kwa mèmè kubanga, nènteetèku cintu kampànda. Mpindyewu, ndi ndìkonka nì mbìmpè nanku. Mbìmpèku nanku paanyimà apu anyì? Anyì nanku mbìmpè anyì? Mbìmpè nanku anyì? Mpindyewu, Munanga wanyì, ewu mmusangu wumwepele wùngààkwedi kàmwè kwa cijèngù. Mpindyewu, bôbò’s nyawu bàmba ne mbìmpè nanku. Eyo. Kaa, ekelekele! Awu’s ki mukàjì. Aku nkàmwè, bwalu kùkaadi ntàntà mule kùndi ncìyi mumwele kàmwè to. Pa ciibidilu yèyè ùtu anu mubingè.

⁵ Ee, ncya bushuwa ne tudi bapìcile mu cikondo cya dicyònkomoka mu masangisha a malòòlò asatu awu; mèmè’s. Nenku mpindyewu, mikàbà ya mèyì, yònsò pa kuumusha wà makèèlèlè dilòòlò. . . Mvwa mubiikile Mwanèètù Goad mumwambile bwa kulwayè kwangata mukàbà wà mèyì bwa

tabernacle. Kadi mbyenzèke ne ndi muumvwe bamba ne Billy Paul ùvwa mwangàte kashinyi kèndè muyè, pa nanku mukàbà wà mèyi kawùvwa mukwàciibwe to ku dyànyì dimanya. Pa nanku tudi bapangile wòwù awu's. Mvwakù mwa kuswa ngikalakù muwùlamè mu ekeleeziya bwa ekeleeziya bwa—mùdi kampànda wàmba—bitùdi twètù twitabuuja.

⁶ Mpindyewu, dilòlò edì nèngàkulè pa *Muyiiki Munène*, bu mèmè mwa kujikija nkonko pa dībà. Ne pashiishe, màalabà mu dinda kùdi mudimu wà dyondopa. Nenku netwikalè mwa kusambidila babèèdi. Ki bwa cinyi, katwèna mwa kwabanya—anyì anu kuya ne kwamba ne: “Mpindyewu, nènkwangàte wèwè, ne wèwè, ne wèwè” to. Abi kí mbifwànyine kwikala bimpè to. Kadi tudi tufila kasumbù kàà twarta, ne mwaba kampànda mu twarta atu, mbiikila bantu ndambu bwa kubàndabò pa cibumbà cya ku cyambilu. Nenku dībà àdi, Nyuma Mwimpè Yèyè mubangè kusokolola maalu, dībà àdi Ùdi ùpàtuka mu batèeleji amu ne wàngata bantu mu batèeleji amu bwa mudimu wà dyondopa. Nenku pashiishe, màalabà mu dinda, nèngàkulè, bu Mukalenge mwa kwanyisha, kumpàla menemene kwa mudimu wà dyondopa.

⁷ Ndi mmòna mukàjàànyì ùseka. Munanga wanyì, kwèna mwa kungumvwa nansha kakese anyì? Kaa, udi ungumvwa. Ee, abi mbimpè. Yèyè mmusòmbèle mundekeelu mwàmwa ne pàdiku—yèyè kàyi mwa kungumvwa to, ùdi ùkùpa mutù ne: “Wèwè. . . Ncyèna mwa kukuumvwa to, ncyèna mwa kukuumvwa to.”

⁸ Nenku màalabà—màalabà dilòlò ndisangisha dya butangadiki ne mudimu wà dibàtiiza dya mu màyi. Ne pashiishe, pàndi anu ne ngààjikijì kuyiisha màalabà dilòlò, netùumushè ridò ya paanyimà bwa kwenza dibàtiiza dya mu màyi kaaba aka màalabà dilòlò. Bu Mukalenge mwa kwanyisha, bu Mukalenge mwa kwanyisha, mu dinda ndi muswe—anyì màalabà dilòlò ndi muswe kwakula pa cyena-bwalu eci ne: *Ci—Cimanyinu Cyakafidiibwa*. Ne pashiishe, twètù tusanganyiibwa kaaba aka mu diisàtù dilòlò, Mukalenge Yèyè munganyishile bwa kwikala apa mu diisàtù dilòlò, ndi muswe kwakula pa cyena-bwalu cya ne: *Tudi Bamòne Mùtootò Wèndè Ku Esètè Nè Balwè Bwà KuMukuwukwila*. Mpindyewu, cidi anu kumpàla kwa mulàadilu wà Noël.

⁹ Ne pashiishe, dyàkàmwè paanyimà pàà Noël kùdi lumingu lwà diikisha dya Noël. Pòpò apu ki patùdi twangata mikànda mifundilangana yònsò. . . Mwanèètù Mercier ne bakwabo abu bàtu pa ciibidilu bàyisangisha yònsò. Nenku tudi tuyàdija yònsò, ne tusambila pa mikànda mifundilangana eyi ne tulòmba Mukalenge bwa kutùlombola pa buloba bujimà kwònsò kutwàya aku.

¹⁰ Mpindyewu, bòbò, beena Kilisto beena Kantu-ku-byanza abu, bàdi ne mulongolongo munene wa masangisha, àdi ne

cya kwenzeka dyàkàmwè mu Floride bwa muyiiki wàbò awu. Kuumuka aku kuya mu Kingston, pashiishe mu Haïti, ne kuya ku Puerto Rico, kubwela mu Amerike wa ku Sud, kwalukidila ku Mexique.

¹¹ Kadi mbimwèke bu ne Mukalenge ùdi ùndombola bwa kuya ku Norvège. Ncyèna mumanyè ne mbwà cinyi to. Nudi bamanyè kakàndà kakese kàdi kàbiikidiibwà ne *Muntu Mutùma Kùdi Nzambi* aku anyi? Ki mukàndà mutàmbe bunene wa maalu a ntendeleelu wùdi mupàtula mu Norvège ngwòwù awu. Anji elààyibi meeji pa bwalu abu, maalu àdi Mukalenge mwenzè kuntwaku. Ne pàmvwà kuntwaku, kabàvwakù baswè bwa kundekela ntentekela babèèdi byanza to. Mvwakù bwa malòlò asatu. Kadi kabàvwakù baswè bwa kundekela ntentekela babèèdi byanza to. Pa nanku nudi numòna cìdi Nzambi mwa kwenza. Misumbà ya bantu yivwa minene menemene mu mushindu wà ne byàkakèngela bwa kwangatabò bampùlushi, babànde pa tubalù, bwa kusàkabò bantu ku luseke mu misèsù bwa ngaamòna mwa kuya too ne pa mwaba awu. Nanku ncyàkatentekela babèèdi byanza to. Nansha nanku ngàkabàsambidila; kubàmbila bwa kutentekelanganabò byanza munkaci mwabo.

¹² Pa nanku... [Muntu kampàndà ùdi wàkula ne Mwanèètù Branham—Muf.] Eyowa, nèngènzè nanku cya bushuwa, pashiishe. Mpindyewu, mààlabà mu dinda... Mpindyewu, dilòlò edi, pàmwàpa netùbwelè anu mu nkonko eyi, bwalu tudi ne mikwabo milenga ya dikèma. Ne ncyèna mumanyè ne Mukalenge neàtùlamèpu ntàntà bule kaayi to. Nanku pashiishe, mààlabà mu dinda anyi Billy Paul, Gene, anyi Leo, yònsò wikalakù awu, neikalè mwab'ewu bwa kwabanya twarta twà masambila pa dībà mwandamukùlù too ne pa dībà mwandamukùlù ne tusunsa makumi asatu. Mpindyewu, bantu bàà pambèlù pàà cimenga, ngànji ncyàmbùlùlèku cyàkàbìdi bwa kanùlu kupwa mwoyi. Wèwè muswe bwa kubwela mu mulongo, tudi baswe kwangata nangànanà bantu bàà pambèlù pàà cimenga kwòkò mushindu.

¹³ Mpindyewu, misangu mikwabo kaaba aka mu ekeleeziya tutu tukafika too ne mu mushindu wà bamba ne: “Ee...” Tudi twangata bantu bàà pambèlù pàà cimenga, tubàfikisha kùneeku... Muntu neàmbè ne: “Ee, ncìvwa mumanyè cìvwàbò bàsaama to. Mbafwànyine kwikala bamba cintu cya mafi.” Pashiishe wangata bantu bàà mu cimenga; bamba ne: “Kaa, s'uvwa mufwànyine kwikala mubàmnyè.” Pa nanku... Pashiishe bamba—bàkaadikù bambè ne: “Ee, mèmè nènkwambile's, ntwarta twà disambila atu.” Ee, kadi aba bàdi kabàyi bapete twarta twà disambila abu? Pààbì's bikaavwa byenzèke ne ku ditùkù ne ku ditùkù pàvwàku... .

Wamba ne? [Bàdi bàlòmba Mwanèètù Branham bwa yèyè kwimanyinaku kule ne cikòlokolo—Muf.] Kwimanyinaku kule

ne cikòlokolo? Ee, nudi bamanyè's, mèmè ntu misangu yònsò anu nyiisha nkaçinkaci wa njila. Pa nanku pàmwàpa nèncyàngàtè anu mushindu awu. Mbitàmbe bwîmpè nanku anyi? Abi Mbitàmbe bwîmpè. Abi mbîmpè. Ndi nkwàmbila cidici. Ndongolwelu wetù—wetù wa kufikisha meyi kudi batèeleji kadi ki udi mutàmbe bubì kaaba aka, mutàmbe bubì be. Mpindyewu katwènakù tuteeta bwa kulongoloka to, bwalu tudi baswè bwa tabernacle mupyamùpyà ìbakiibwè dyàkàmwè. Ne dîbà adi ki patwikalà mwa kupeta myaba yàbùngì (nwamònu anyi?) bu twètù mwa kutwa eku ne eku ne kutàmba kudyundishakù ndambu mwaba ewu, ne kuvudijakù myaba mikwabo, ne kudilongolola bwa masangisha patùdi tuèntza kaaba aka.

¹⁴ Nenu mpindyewu, vùlukàayi ne, mu dinda nsongàalùmè eyi, umwe anyi basatu bàà kùdìbo nebààbanyè twarta pankaci pàà dîbà mwandamukùlù ne tusunsa makumi asatu, anyi, dîbà mwandamukùlù ne dîbà mwandamukùlù ne tusunsa makumi asatu. Aci cidi cìfilakù mpungà kùdi bantu bònsò bwa kwikalakù bashikàme. Nenu mvwa ngamba mùdìbo bààbanya twarta, ne bwa cinyi tudi tucyènza. Mbwa kulama bulongàme. Nwamònu anyi? Mpindyewu, kadi bu ne mvwa mbwela kaaba aka, anu bu mùdi mpindyewu ewu ne ngamba ne: “Mukàjì ewu, mukàjì ewu, ne mulùme wàwa, ne mukàjì ewu. . .?” Nudi numòna's, s'mbifwànyine kwikala anu bu—s'mbifwànyine kwikala anu bu bikolè. Nwamònu anyi? Nenu dîbà adi, wèwè. . . Misangu yàbùngì nkàadi mwenzè nunku. Ne bòbò kabàyi bapitèpìte bùngì mu dinda to, ndi mwa kwenza cintu cimwecimwe aci. Ndi mwa kwamba ne: “Mbanganyi kaaba aka bàdi bafùmìne pambèlù pàà cimenga bàdi ne cintu cibàsaama? Juukilaayi kuulu.”

¹⁵ Mwanèètù Mercier, udi mulwe bwa kunkwàcisha. Neunkwàcishèku anyi? [Mwanèètù Mercier ùdi wàmba ne: “Ndi ndwa bwa dikwacisha.”—Muf.] Kàà, udi ulwa. . . Nyawu ùlwa bwa kudìkwàcisha yèyè mwine. Mvwa mwakùle ne mulundà webè mukàjì leelu ewu. Mpindyewu, mbîmpè wikalèku naanyi ne musàngèlu menemene. Wamònu anyi? Eyo. Abi mbîmpè. Ndi—ndi ngaanyisha dikima adi Mwanèètù Leo. Pàdi cintu kaciyi cijaalàme to, tù—tùcìvwijè cijaalàme anu mutùdi bamanyè mwa kucìvwija amu, ne mwetu mwònsò.

¹⁶ Nanku mpindyewu, kulòmba anu bantu bàà pambèlù pàà cimenga bàdi ne cintu cibàsaama abu bwa kwelabò byanza muulu. Nenu dîbà adi kwimana mwaba awu, kudifila bwa muntu umwepele too ne pàdi Nyuma Mwîmpè ùbanga, ne wàngata batèeleji bònsò. Mbanganyi bàkaadiku basangànyìbwe kaaba aka bamòne aci cyenzèke kaaba aka? Bushuwa's! Nwamònu's, nwamònu anyi? Pa nanku kabýena ne bwalu to nansha biikàle mu mushindu kaayi. Bìdi anu. . .

¹⁷ Ndi muswe bwa nwènù kuvùluka eci, nenu nènてeteè bwa kwalukilapù cyàkàbìdi mu dinda. Bantu bàà Bisàmbà

bya bendè, Evanjeeliyo udibò babàpèèshe ng'Evanjeeliyo wa diitabuuja, kàyi wa byenzedi to nansha kakese. Nwamònu anyi? Nenku anu mûngãmbì makèlèlè dilòlò. Pààkamatà Nyuma Mwímpè dya Mpenta, pààkatùlùkàbo e kuya kùdi beena Yudà (Byenzedi 19.5), byàkakèngela bwa kubàtentekelabò byanza bwa kuMupetabò. Ne pààkayàbo kùdi beena Sàmaalèyà, byàkakèngela bwa kubàtentekelabò byanza. Kadi pààkafikàbo kùdi bàà Bisàmbà bya bendè kwa Kòneeliyò: "Pàcìvwà anu Peetèlò wàmba mèyì aa..." Kakùyikù ditentekelangana dya byanza to.

¹⁸ Pààkafwà mwànà mutekète wa bakàji, mwànà wa bakàji wa Yayilò, mwakwidi awu, wàkamba ne: "Lwà ùmutentèkèlè byanza, ne yèyè neikalè ne mwoyi." Kadi kààmàndà kàà mäsàlaayi lukàmà kàà beena Loomò aku, muntu wa Bisàmbà bya bendè, pààkambàye ne: "Ncyèna mwakànyine bwa Wèwè kubwela mu nzùbù mwànyì to, ambà anu dīyì òm̀wè." S'ki cyòci aci. Nwamònu anyi?

¹⁹ Mukàji mwena Syrophénicie awu, uvwa mwena Ngelika mu bushuwa bwa bwalu, yèyè—pààkamwambilà Yesu, ne: "Kì mbikumbàne bwa Mémè kwangata dyàmpà dya bânà bwa kudyèlela tubwà to."

Mukàji awu wàkamba ne: "Aci ncilelèlè, Mukalenge; kadi tubwà atu mwinshì mwa mèèsà's tùtu tùdya tusùnsukilà twà màmpà a bânà atu."

KwambaYè ne: "Bwa edi dīyì, démon awu ùm̀kù pa mwanèèbè wa bakàji awu." Dìbà adi ikàla wamba bintu bìmpè. Ambà cintu kampànda cya cìmpè bwa muntu. Akùlè bwa Yesu. Ambà cintu cya cìtwàngana nyama ku mikòlò, cintu cilelèlè. Ki mushindu wà kuumusha baadémons ngwòwù awu. Yèyè kàakambakù—Yèyè kàakasambilakù bwa mwànà wa bakàji awu to. Yèyè kàakambakù cintu nansha cìmwè cya ne wàkondopiibwa to; Wàkamba anu ne: "Bwa edi dīyì, bwa edi dīyì..."

²⁰ Hattie Wright, ditùkù adi, kààkalòmbakù yèyè cintu nansha cìmwè to. Ùvwa musòmbè anu cyanàànà mwaba awu, kadi kwambayè cintu cijaalàme, cyàkasànkishà Nyuma Mwímpè. Ki Nyuma Mwímpè kwandamuna e kwamba ne: "Hattie, lòm̀ba cintu kanà cyònsò cyùdi muswe, cyònsò cyùdi naaci cyùdi muswe aci. Jandùlábì bwalu ebu ní mbulelèlè anyì ní kí mbulelèlè. Lòm̀ba cintu kanà cyònsò (dyondopiibwa dya mwakùnyèndè wa bakàji uvwa mucibùkile panshi musòmbè mwaba awu ne mubidi mudikòke wònsò; anyi ndola binunu dikumi bwa kùkadi ùya kuumbula biinà mu tukùnà mwàmwa to; anyi kumwalujulwila bunsongà ku mubidi wèndè mumanè kucyòkakana awu); cyònsò cyùdi muswe kulòm̀ba aci, cilòmbè anu patùdi twakulangana apa. Yèyè kàyi mulwe mukupèèsheci mpindyewu mene to, dìbà

adi ndi mupròfetà wa mashimi.” Abu’s—abu’s mbwalu bwa dikèma, kî mmwômò anyi?

²¹ Yesu mmwambe ne: “Ambilà mukùnà ewu...” Ne nwênù’s nukàadi bumvwè ne—bwa bìdì byenzèke abi; ki mudimu wà bwambi wutùdì munkaci mwa kubwelamù awu. Tukàadi bayè kule menemene mu njila mpindyewu. Abidi aa n’Dilwa dya Mukalenge Yesu. Nenku bìdì bikèngela bwa twikalè ne diitabuuja dya dyambwibwa mu Ekeleeziya udi mwa kushintuludiibwa mu katanci, mu mubùnyì wà disù bwa kupàtuka kuya, bwa cyanàànà katwàkuya to. Kadi kanùtácishikù meeji to, nediiikalèku. Nediikalèku. Nenku pààbàndà bukolè bwa *ewu* ekeleeziya, necitwalè bânà bààbò; bukolè bwa *wàwa* ekeleeziya bùbànda, nebùtwalè bânà bààbò; bukolè bwa *wàwa* ekeleeziya nebùtwalè bânà bààbò bakwabo; pashiishe nekwènzèkè dibiiikà dya ku lufù dya bònsò. Ne cyòci aci ki citùdì bindile.

²² Mpindyewu, kanùpu mwoyi to, twarta twà disambila mu dinda pa dîbà mwandamukùlù too ne pa dîbà mwandamukùlù ne tusunsa makumi asatu. Dîbà adi ndi mbàkonka búngì bwònsò bùvwàmù abu, pashiishe bàlekela kwabanya twarta, ne bàalukila, ne bàsòmba (nwamònu anyi?), bwalu nebiikalè pàmwàpa bamanè kutwàbanya twònsò diine dîbà adi, anyi búngì bwònsò butwikalà babiiikile mu tótò atu mwaba kampànda abu. Nsongààlùmè ayi neyijjuukè, yizobakajè twarta atu nwênù batàngile, dîbà adi wèwè ukèba kàmwè, ukèba kàmwè, anyi cinyi cikwabo mushindu awu. . . Pashiishe pàndi mbwela, nèngiikalè anu. . . Mwaba wònsò wàmà Mukalenge bwa mèmè kubiikidila awu. . . Ne Yèyè mwambè ne: “Kùbiidikù to nansha kakese,” mèmè ncyàkubàbiikilakù to nansha kakese (nwamònu anyi?), anu cyònsò cidiku aci.

²³ Nenku ndi. . . Mudimu wà bwambi awu wùkaadi anu munkaci mwa kwenda kujìmina wòwò mwine; kùdi cintu kampànda cya citàmbe bunene munkaci mwa kulwa. Vùlukàayi ne, mwaba awu ki wùdibi ne musangu wònsò wùtùci cyàmbiibwa pa cibùmbà cya ku cyambilu eku anyi mu cyambilu emu, ne kacya cyòci kacitu cyanji kupangilakù to. Nudi bavùlùke mudimu wà bwambi wà mu cianza awu anyi? Nudi bamòne cyàkenzàwu anyi? Meeji a mu mwoyi, nudi bamòne cidìci cyenzè anyi? Mpindyewu tàngilààyaaku eci: kwamba Dìyì, ne kumòna cidìdi dyènza. Nwamònu anyi? Ndi munwàmbile kaaba aka kùkaadi bidimu—ekeleeziya (Ndi ngambila beena tabernacle)—kùkaadi bidimu, kùkaadi bidimu bisatu anyi binaayi, cintu kampànda civwa pabwìpì ne kudìvwija cintu cya bàlenga ne byanza; cidì pabwìpì ne kwenzeka. Nenku’s ki cyòci eci mpindyewu munkaci mwa kubwayika bwa. . . Cidì munkaci mwa kudyàngacila mbùngakeenu. Mpindyewu, tudi ne kusàkidila bwa bwalu abu. Kaa, mushindu mwine wutùdì ne kusàkidila’s wè. Anu ne disànkà dya diyìila ne panshì.

24 Mpindyewu, tudi ne ndambu wa nkonko ya mishilè ncyoncyoncyo mwab'ewu, ne tudi baswè kubwelamù buludì. Muntu kampànda ùwva mutàngìle mikàndà yònsò yîmvwà naayi eyi. Mémè kwamba ne: “Èe, muntu wa meeji matwè's bidi bimukèngela anu wùmwèpelè.” Kadi mémè ncyèna muntu wa meeji matwè to. Bìdi bikèngela ngiikalè naayi yàbùngì bwa kutàpamù dîsù. Èe, ewu n'Diaglott, ne eci m'Bible, ne eci mmukàndà wà myaba yidì myakù. Pa nanku cidì... Netùlombè anu Mukalenge bwa kutùkwàcisha ne kutùludika bwa kwandamuna ku nkonko eyi anu bilondèshile diswa Dyèndè dya Nzambi ne Dìyì Dyèndè.

25 Nenku mpindyewu, twinyikàayi mitu bwa katanci kakese cyanààna bwa disambila. Mukalenge, tudi ne kusàkidila Kùdì byùmukila mu ndòndò wa mwoyi wètù bwa byÛdì mutwènzèle mu malòlò asatu a ndekeelu aa. Kaa, pa kumòna bambi bàtwilàngàne mu cibambalu cya kuntu kwàka bèèlangana mwoyi ku cyanza, ne diitabuuja divwijulula dipyadiyà, ne—ne cidya cipyacipyà cya dyela. Bàbiikila ku tèlèfonè... Ne myoyi yetu yicyònkomoka, ne bantu munkaci mwa kupeta Nyuma Mwîmpè paanyimà pàà bamanè kwikala—kumòna Dìyì Dyebe, mùdìDi dyàmba anu menemene ku kantu ne ku kantu mùdì kupeta Nyuma Mwîmpè Webè. Tudi ne kusàkidila kwàbùngì bwa cyòci aci, Mukalenge.

26 Wèwè udi utùpeepejila maalu, bwalu tudi cisàmbà cya bupwekèle. Nenku tudi tulòmba, Nzambi, bwa—bwa Utùlekèlèku misangu yònsò tudivwija anu bapwekèle menemene. Bwalu bìdi... Mushindu wà muntu udi udipwekesha awu nyèye wabàndishiibwa. Ne lungènyi lwà pa buloba lùdi dikùtakana bwa Nzambi; kadi byàkasànkisha Nzambi bwa kusungila aba bàdi bajìmine ku dikùtakana dya diyiisha.

27 Nenku mpindyewu, Taatù, ndi mwaba ewu ne nkonko yidì myediibwe byùmukila mu myoyi ya meeji matòoke yidì bwalu butonde. Ne lùmwe lwà ku yòyi lwòlò lwandàmùnyibwe bibi ndufwànyine kukùpa muntu awu mu njila mubi, pa kwela bukènke bubì pa lukonko lwèndè lùdi lùmütacisha. Pa nanku Mukalenge Nzambi, ndi ndòmba bwa Nyuma Mwîmpè Webè àlwekù pambidi pèètù ne àbuululèku bintu ebi, bwalu bàakafùnda mu Mifùndu ne: “Lòmbaayi nenùpetè, ne kèbaayi nenùpetè; kookòlà nebàkunuzulwìlè.” Nenku cyòci aci ki citùdì munkaci mwa kwenza mpindyewu, Mukalenge, tukookola ku ciibi Cyèbe cya luse. Biimàne mu mundidimbì wà bwakànè Bwebe bwa Nzambi, tudi tusèngeleela bwa Mashi a Kilisto wa Nzambi ne bwa Nyuma Mwîmpè.

28 Ne katwèna tulwa dilòlò edi anu ne bwalu twàjikijì malòlò asatu a dilongesha pa Nyuma Mwîmpè awu to, tudi tulwa ne kaneemu ne meeji matòoke bitàmbe kwikala bya ndòndò. Tudi tulwa byenzè bu ne ndilòlò dya ndekeelu ditùdì bafwànyine kwikala pa buloba. Tudi tulwa biikàle twitabuuja ne Wèwè

udi wandamuna ku masambila ètù. Nenku Mukalenge, tudi tuKulòmba mpindyewu bwa útusànkishèku ne Mwoyi Wèbè wà Cyendelele. Ne ku dyandamuna dya Díyi Dyebe, swàku bwa Nyuma Mwîmpè, Éyi Nzambi, bu mutwàsangànyì ne ng'Wèwè mwine munkaci mwetu, tudi tulòmba bwa Yèyè kutùbuulwilakù dilòòlò edi bintu bitùdi tujinga. Ne twètù tuvwa tujinga anu bwa ne misùùkà yetu yìkalèku mu diikisha, ne meeji ètù mu diikisha, ne biikàle ne diitabuuja mu Nzambi bwa kuya kumpàla bwa kunana mabènesha àtùYe mulayè. Tudi tulòmba nùku mu Dîna dya Yesu. Amen.

²⁹ Mpindyewu, ndi ne nkonko yònsò yìvwàbo bampèeshe, pa kuumusha lùmwèpelè. Nenku mvwa mwandàmùne Mwanèètù Martin mwànà uvwa mungeelè lukonko dilòòlò dya dyàbwàbwa awu, anu lùmwèpelè cyanààna. Kùvwa yàbùngì kaaba aka makèèlèlè dilòòlò, kadi àvwa mmalòmbà a masambila. Nenku Mwanèètù Martin mmungeelè lukonko pa Yone 3.16—anyì Yone 3, ngeela meeji, pa: “Muntu yèyè kàyi mulediibwe kùdi màyi ne kùdi Nyuma, kèna mwa kumòna Bukalenge to,” ne mucipàlàkàje ne mukàbà wà mèyi wùmvwà mulòpòle pa Ebelù. Nenku mèmè kutwilangana nendè mu cibambalu cya paanyimà emu dilòòlò dishààle, ne—kumpàlà kwa mèmè kupeta mpùngà wa kumwandamuna, nenku mèmè kumwandamunapù, pa cyena-bwalu aci.

³⁰ Mpindyewu, kùdikù muntu kaaba aka uvwa kàyipù makèèlèlè dilòòlò anyì? Twànji tùmònààyibi byanza, bya bàvwà kabàyipù makèèlèlè dilòòlò. Kaa, twètù, tuvwa cya bushuwa mwa kujinga bwa nwìkalakù neetu. Tudi bapicile mu cikondo cya butùmbi cya dikèma. Nyuma Mwîmpè. . .

³¹ Ndi mufwànyine, bwa katanci kakese cyanààna. . . Kacyàkutàpangana ku mwoyi to. Eci cidi cikwàciibwa pa mukàbà wà mèyi. Nenku bu byòbi mwa kwenzeka ne mwambi kampàndà—anyì muntu àbengè kutwà ku cyànyì pa bìndi pabwìpì ne kwamba mpindyewu ebi, anyì mene mu nkonko ayi, ndi ndòmba, mwanèètù, bwa kùlukù kwela meeji ne ncya kacyi cyùmvwika nansha, kadi aci—ùvulukè ne mukàbà wà mèyi ewu wùdi munkaci mwa kukwàciibwa mu tabernacle wetù emu. Tudi tulongesha cisàmbà cyetu twètù. Bambi bààbùngì bàà miitabuuja mashiilèshiiilàngàne mbasòmbe mwab'ewu. Nenku ndi muswe kubwela cyàkàbìdì mu cyena-bwalu aci, bwalu kùdi bàmwè bàà ku bantu bèètù bàvwà bapangè mwa kubwela munda emu makèèlèlè dilòòlò bàndi mmòna babwelè dilòòlò edi. Ne ndi muswe kukenketulula bwa katanci kakese cyanààna, bu nwènù mwa kucìngaanyishila, pa bìmvwà mwambè makèèlèlè dilòòlò abi; ne bìvwa mpa Mpenta, pa dipeta dya Nyuma Mwîmpè.

Mpindyewu, ndi mbala mu *Emphatic Diaglott* wa nkùdimwinu wa cyena Ngelikà, mùmvwà makèèlèlè dilòòlò, udi mutèeka mubuulula kumpàlà kwànyì mpindyewu ewu.

Nnkùdimwinu wa ntwàdijilu wa kuumusha mu cyena Ngelikà kuya mu Anglais. Kacyèna cìpìcila ku bakùdimunyi bakwabo, cìdi—ne nkùdimwinu mikwabo to, cìdi anu buludì kuumuka mu cyena Ngelikà kuya mu Anglais. Mpindyewu, myakù ya Anglais, misangu yàbùngì yitu ne muumvwija pàbidì, mùndì mufwànyine kwamba mpindyewu ne, *board*. Angàtaayi mwakù awu *board*. Udi mufwànyine kwamba ne: “Ee, ùvwa ùswa kwamba ne tuvwa *tumusuuuya*.” To! “Kaa, yèyè—yèyè mmufutè *mfrangà ya byàkudyà* byèndè.” To! Ee, yèyè. . . “*Ndìbaya* ku luseke lwà nzùbu.” Ee, nwamònu anyi? Anyi cìmwè cya ku byòbì abi. . . Kùdi myakù yinaayi anyi yìtaanu mishiilàngàne yìdi mifwànyine kukwàciibwa naayi mudimu; bikèngela ùpetè cyambilu. Mwakù *see*. *See* mbwena kwamba ne “kuumvwa,” mu Anglais. *Sea* mbwena kwamba ne “mushikì wà màyi.” *See* mbwena kwamba ne “kutàngila.” Nwamònu anyi? Kadi mu nkùdimwinu eyi, mwakù wùdìbo bangàte mwab’ewu ewu, wùmvwà mwambè makèlèlè dilòlò mu Byenzedi nshapità mwi2 awu, mwaba wùdìbo bambè ne: “Ndimì ya kapyà yàkasòmba pa bòbò. . .” Mpindyewu, ndi muswe anu kwalukila anu paanyimà bwa katanci kakese. Nudikù baswe, katanci kakese cyanààna, kuwùtàngilula katanci kumpàlà kwa twètù kuya kutàmba kule anyi?

³² Mpindyewu, buulùlaayi, nwènù mu nkùdimwinu wenù wa Roi Jacques anyi mu yònsò munùdì nubala amu. . .Nenku ndi muswe kucìbala. Nenku tèèlejàayi ne ntèmà yònsò mpindyewu. Kanwìkadi nwàvwa kucyùmvwa bibì to. Bàabùngì leelu ewu, nansha mwakùnyàanyi wa bakàji mwine, bàabùngì bàà kùdìbo mbabiikile, bambè. . .Màdamù Morgan. . .Bàabùngì bàà kùdìbo bàvwamù makèlèlè dilòlò. Màdamù Morgan ngumwe wa ku bânà beetu bàà bakàji bàvwàbo balekèle; ne yèyè ùvwa pa dibèjì dya mènà a bàkaavwà bafwè kànsèrè mu Louisville kùkaavwa bidimu dikumi ne bisambombo, anyi dikumi ne mwandamutekètè. Ngeela meeji ne mmusòmbe cyàkàbìdì paanyimà apa dilòlò edi. Kàvwa mwa kuumvwa to, mwàmbye, bwalu mvwa ngaakwila buludi ku cikòlokolo. Ne bwa bwalu bwabo bòbò ndi muswe kwambululakù cyòci eci bwa katanci kakese.

³³ Mpindyewu, ndi mbala mu Mufundu wà Byenzedi 2 ewu:

. . .*pàakakùmbanà ditùkù dya Mpenta, bàvwa bònsò* mu meeji *àmwe*. . . (Mpindyewu, ntu muswe aci kutàmba dìyi dimwe: bwalu nudi bafwànyine kwikala ne dìyi dimwe pa ciibùngì cya byena-bwalu, kadi apa meeji àbò àvwa àmwè). . .meeji *àmwe* ne *mu kaaba kàmwe*.

Nenku dyàkàmwe kwàkalwa cyonà cìfùmìne mu dyulu cyenzè bu cipeepèlè cìkolè cya cìvuma, ne cyàkkuja. . . *nzùbu mujimà mùvwàbo basòmbèle*. (Kabàyi batwè binù, bàsambila to, kadi basòmbe). . .

...Ndìmì mipandùlùke... (N-d-i-m-i-ndìmi. “Mipandùlùke” mbwena kwamba ne, “myabùlùke.”)... Ndìmì... yàkabàmwènekela... myenzè bu... kapyà, ne lùm wè... (“Lùm wè,” ku bùm wè)... Iwàkasòmbela pà yònsò wa kùdìbo.

Ne bònsò bààkuujiibwa tètè... (“Ne,” mutwàngaji)... bònsò bààkuujiibwa tètè ne Spiritù Mwimpè, ne bààkabanga kwakula mu myakulu mikwabo, mùvwà Nyuma ùbàpèèsha mwa kwakula amu.

Mpindyewu kùvwa beena Yudà basòmbèle mu Yelusàlèrà, bantu badìfile ne kasukì, bafùmìne mu ditungà ne ditungà dyònsò mwinshì mwa dyulu.

...pàvwà cyòci eci... ne mulubù ewu pàakatanggalakàwu, musùmbà wàkadisanga, ne bàvwà mu dipampakana, bwalu... yònsò wa kùdìbo wàkumvwa ne... yèyè wàkula mu mwakulu wèndè wàkamulèlèbo.

³⁴ Mpindyewu mònayì! Pààkalwà kapyà aku, cìvwa ndìmì; pàvwàbo bààkula, cìvwa mmwakulu. Mpindyewu, kùdì dishiilangana dinènaanènààlè pankacì pàà ndìmì ne myakulu. Bwetu twètù's byònsò bìdi anu bya mwomùm wè. Kadi, mu cyena Ngelikà, “ludìmi” mbwena kwamba ne ng'eci nunku. [Mwanèètù Branham ùdi ùleeja—Muf.] Dìci ng'eci. Nwamònu anyì? Aci kaciyèna cìswa kwamba mwakulu to; cidi cyùm vwiya cìtùpà cya mubidi wèbè cidi ludìmi aci. Nwènu bamòne bimpè, mbacyàndàmùne ne ndìmì ya kapyà cidi cyùm vwiya ne “bu ndìmì,” anu mùdì ludìmi lwà kapyà amu, ludìmi luleepa lwà kapyà. Mpindyewu, tàngilàayi disùmìnyina adi mpindyewu. Ne wònsò wà ku myaba ayì mpindyewu, kanùwùpu mwoyi to.

³⁵ Mpindyewu, netwìkalè mwa kufila kaadinàya kakese dilòòlò edi. Nenku nèngìikalè mwa kunùlekeelacì. Mpindyewu vùlukàayi ne, cintu kampànda cyòci cibèngangana, aci ncikutàngile wèwè. Kadi mushindu wùm wèpelè wùdiku muntu mwa kupeta cintu kanà cyònsò kùdì Nzambi nku diitabuuja. Ne kumpalà kwa wèwè kumòna mwa...

³⁶ Bidi bikèngela mmanyè cìndì ngenza kumpalà kwa mémè kupeta diitabuuja mu cìndì ngenza aci. Udi musèle mukàjèèbè awu bwa cinyi? Uvwa ne diitabuuja mu yèyè. Ukààvwa mumuteetè, mumujoojè, mumòne ne nku cinyi kùvwàye mufùme, ne yèyè ùvwa nganyì. Bidi nanku awu ne Mufùndu, ne Nzambi. Ki cidi cyènza bikèènà-kumòna ebi, Dikunji dya Kapyà edi—edi, bintu byònsò ebi, bwalu Nzambi wàkabilaya. Nzambi ngudi mwambè nanku. Mémè nkàadikù muMuteetè ku Dìyì Dyèndè ne mumanyè ne Dìdi Bulelèlè. Nenku londàayi Dìyì Dyèndè. Dìbà adi kwòkò kwikàle kaacibwejàkàji kakese mwaba kampànda, dìbà adi kùdì cintu cipampalàmùke mwaba kampànda. Bwalu

Nzambi (tèelejàayi!)—kacya Nzambi kàtukù mwanji kwenza anyi kàadyàkukwàtakù mudimu pambèlù pàà mikenji Yèndè Sungasunga—anyì bibèngàngàne ne mikenji Yèndè Sungasunga nansha. Muvù wà mashika kawàkulwakù mu movù wà luuyà to, ne movù wà luuyà kawàkulwakù mu movù wà mashika to. Mabèji kaàkupòòpokakù mu movù wà bintu bitòloka ne kwalukila mu movù wà mabèji àpòòpoka to. Kwèna anu mwa kwenza nanku to.

³⁷ Mûngãmbi makèlèlè dilòòlò bwa mushimi wà mâyi a kazeze, bwà kwelawù mâyi ku bikûnyii bwà byebe. Anyi wèwè mwimàne mwab'ewu munkaci mwa budimi, ne kwikàle mídima ya menemene, wèwè kwamba ne: “Kaa, nzembu minene, ndi mumanye ne udi mu mpàta emu. Mpindyewu, nyewu ndi mujimìne, ncìyi mumanyè kûnyaayà to. Fìlakù bukènkè, bwa mmonèku mwa kwenda! Kùdi nzembu búngì bukùmbàne bwa kukenkesha mu mpàta emu mwònsò.” Aci ncyà bushuwa. Eyowa's, mukalenge! S'kùdi nzembu búngì bukùmbàne mu cibambalu emu bwa kumùkenkesha nansha kakùyi makènkè awu, kakùyi aci to. Kadi's bidi bikèngela bwa wèwè kuyilombola. Mpindyewu, udi mufwànyine kwelela cyòci aci mbilà mikolè too ne muwìkalà kùciyikù mwa kwela kabidi mbilà to, kayiyikù mwa kukenkesha to. Kadi wèwè mwenzè bilondèshile mikenji ya nzembu, díbà adi's neupetè bukènkè.

³⁸ Ee, ki mushindu wumwewumwe wùdibi ne Nzambi. Nzambi m'Mufùki munene wa maulu ne buloba, umwèumwè awu makèlèlè, leelu, too ne kashidi. Yèyè ùcidi anu Nzambi. Kadi Yèyè neàkwatè mudimu anu paùdi ulonda mikenji ne dileeja Dyèndè dya njila. Balundà bàànyì, ndi ngamba nunku: Kacya ncitukù mwanji kucimòna cipangile to, ne kacyàdyàkupangilakù to.

³⁹ Mpindyewu, tùmònààyi. Yesu mu Luukà 24:49 wàkatùma bapostolo ne mudimu paanyimà pàà bòbò bamanè kusungidiibwa ne kujidiibwa bilondèshile Díyi; babingishiibwe mu kwitabuuja kwa Mukalenge Yesu; bajidiibwe mu Yone 17.17 pàakambà Yesu ne: “Bàjidilè, Taatù, ku Bulelèlè. Díyi Dyebe ki Bulelèlè.” Ne Yèyè ùvwa Díyi.

⁴⁰ Mpindyewu, kubàpèèsha bukolè bwa kwondopa babèedi, kwipata baadémons, kujuula bafwè; ne bààkaalukila bènda bàcyònkomoka. Ne ménà àbò àvwa mu Mukàndà wà Mwoyi wà Mwànà wa mukooko. Nwènù's nudi bavùlùke mutùdi balongè cyòci aci mpindyewu. Kadi kabàvwa banjì kwikala bakùdimùne mucimà to. Yèsu wàkambila Peetèlò bufùkù bwa dipoopediibwa Dyèndè dya pa nkùrusè, Wàkamba ne: “Paanyimà pà wèwè mumanè kukùdimuna mucimà, díbà adi ùkankamikè bànà beenu.”

⁴¹ Nyuma Mwïmpè ùdi cidi... Udi witabuuja bwa Mwoyi wà Cyendelele, kadi pàdi Nyuma Mwïmpè ùlwa Yèyè

ngudi Mwoyi wà Cyendeleele. Udi witabuuja bwa... Udi mwimita kùdì Nyuma ku dijidiibwa, kadi kwénaku mwanji kulediibwa kùdì Nyuma to anu pàdì Nyuma Mwímpè ùbwelà. Neya bushuwa. Mwànà ùdi ne mwoyi mu difù dya maamù, tuumisunya tukese atu tüzakalala; mmwoyi kampànda awu. Kadi mmwoyi mushiilàngàne pàdiye wèyela mweyelu wà mwoyi mu tuumimpèmpè twèndè amu. Mmwoyi mushiilàngàne. Ki cidi bwalu ncyôci aci, cidi . . .

⁴² Mwanèètù munanga Méthodiste, ne Pèlerin de la Sainteté, ne Nazaréen, dibàtiiza dya Nyuma Mwímpè ndishiilàngàne ne dijidiibwa. Dijidiibwa ndikezudiibwa, didi dilongolola dya Mwoyi. Kadi pàdì Nyuma Mwímpè ùlwa, Yèyè ki Mwoyi. Dilongolola ndisukula dya dibùngù; Nyuma Mwímpè ndyuja dya dibùngù. *Dijidiibwa* mbwena kwamba ne “musukula ne mutèeka ku luseke bwa mudimu.” Nyuma Mwímpè nkucitèeka kwa mu mudimu. Wèwè udi dibùngù didi Nzambi musukùle.

⁴³ Ne tudi tusangana ne Nyuma Mwímpè n’Nzambi Yèyè mwine munda mwebe. Nzambi ùvwa kumutù kwebe mu Dikunji dya Kapyà ne Mòsà. Nzambi ùvwa neebe munda mwa Yesu Kilisto. Mpindyewu Nzambi ùdi munda mwebe mu Nyuma Mwímpè. Kaciyi nzambi yisatu to, Nzambi umwèpelè ùkwàta mudimu mu midimu yisatu.

⁴⁴ Nzambi ùpweka milongo, ùpweka ùmuka kumutù kwa muntu. Muntu kàvwa mwa kuMulenga to, bwalu wàkenza mpekaatu mu budimi bwa Edènà ne wàkaditàpulula ne bwobùmwè Bwèndè. Dìbà adi cyàkenzekà ncinyi? Byàkakèngela bwa kwikalaYè kumutù kwèndè. Mashì a bimpàngà bya ngombe ne a mbùji kaàvwa mafwànyine kuMulekela wènza cyàkàbidì bwobùmwè ne muntu to; kadi ku mikenji ne mèyi, biikàle bileeja mu mundidimbì cikondo cìvwà cìlwa eci, cya dilàmbula dya bimpàngà bya ngombe, ne bikwabo, ne mikooko . . . Pashiishe pààkapwekà Nzambi ne kusòmbela mu mubidi mujidila, mulela kùdì mukàjì virgo, bwa Nzambi Yèyè mwine . . . Nudi bamanyè cyàkenzà Nzambi anyi? Yèyè—Yèyè kààkenza cintu nansha cimwe to pa kuumusha . . . Wàkatèeka Ntentà Wendè munkaci mwa yetu twètù. Nzambi wàkasòmbela mu Ntentà wàkabiikidiibwa ne n’Yesu Kilisto. KwasaYè anu Ntentà Wendè pàmwè neetù, kulwaYè . . . (Nèngikalè—mwa kuyiisha pa cyôci aci mu dinda, pa nanku mbimpè ncilekèle nanku.) Mpindyewu, aci—mwàkaasà Nzambi ntentà anyi kusòmba pàmwè neetù . . .

⁴⁵ Nenku mpindyewu Nzambi ùdi munda mwetu. Yesu wàkamba mu Yone 14 ne: “Mu ditùkù adi nenùmanyè ne Mèmè ndi munda mwa Taatù, Taatù munda Mwànyì, ne Mèmè munda mwenu, ne nwènù munda Mwànyì.” Nzambi munda mwetu. Kiipàcilà kàvwa cinyi? Kukùmbaja ndongamu Wendè.

⁴⁶ Nzambi ùvwa ne ndongamu kampànda. Ùvwa muswe kukwàcila mudimu munkaci mwa bantu, ne Wàkawùtwàla

mu Dikunji dya Kapyà, òwà Kapyà kàà kakàyi kùmvwika kàvwà kalembèlèle kumultù kwa bânà bàà Izaleela aku. Pashiishe Kapyà kàmwèkàmwè aku kàakamwèneshiibwa mu mubidi wà Yesu. Ne Yèyè wàkamba ne Úvwa kiine Kapyà aku ne: “Kumpàlà kwa Abraham kwikalakù, NDI.” Yèyè úvwa Kapyà aku. KwambaYè ne: “Ndi mufùme ku Nzambi, ne Ndi ngaalukila ku Nzambi.” Ne paanyimà pàà lufù, dijiikiibwa, ne dibìikà Dyèndè dya ku lufù, Pólò Munsantu wàkatwilangana Nèndè mu njila—pàcivwà òwà dyèndè Shawùlà apu—mu njila wa ku Damàsèkè, nenku Yèyè úvwa mwalùkile cyàkàbìdì ku Dikunji dya Kapyà adi. Bukènkè bwàkamufomija mèsù. Neya bushuwa.

⁴⁷ Kadi’s ki Yèyè ewu leelu ewu, Dikunji dya Kapyà òmwèdìmwè adi, Nzambi umwèumwè awu mwikàle wènta bimanyinu bimwèbimwè abi, byenzi bimwèbimwè abi. Bwa cinyi? Údi munkaci mwa kukwàta mudimu munkaci mwa bantu Bèndè. Údi munda mwetu. Mèmè. . . Údi neenù mpindyewu, “kadi Mèmè nèngìikalè munda mwenu. Nèngìikalè neenù, munda mwenu mene, too ne ku ndekeelu kwa dikumbana dya maalu ònsò,” nshìikidilu wa buloba. Yèyè úvwa mwa kwikala neetù.

⁴⁸ Mpindyewu, mònaayi. Yesu wàkabàtùma ne mudimu bwa kubàndabò ku Yelusàlèma ne kwindila. Mwakù *kujànguluka* mbwena kwamba ne “kwindila,” kí mbwena kwamba ne kusambila to, mbwena kwamba ne “kwindila.” Kabàvwa banji kukumbana bwa kuyiishabò to, bwalu bàvwa bamanyè dibìikà Dyèndè dya ku lufù anu ku Mupersona Wendè, ku diMumòna dya pambèlupambèlu. Yèyè—Yèyè wàkabàtùmina òyi bwa kabàyiishi kabidi to, kabànji kwenza cintu nansha cimwe to too ne pàvwàbò mwa kwanji kuvwàdikiibwa ne Bukolè bwa ku dyulu.

Ncyèna ngiitabuuja ne muyiishi mmutùmìibwe kùdi Nzambi anyi ùdi mwa kujidiibwa mu mushindu mwímpè mu mudimu wà bwambi. . . Bwalu Nzambi kèna ne mikàlu to. Ne cidì Nzambi wènta musangu wumwe aci, Yèyè ùdi úcyènta díbà dyònsò. Mpindyewu, piikalàbi ne Nzambi kàakaswa kubàlekela bàyiisha anu too ne pàvwàbò mwa kuya ku Mpenta ne kupetabò dilabula dya Mpenta, muntu nansha umwe, ambà anu mudyènzèle mu yèyè ku dijinga kampànda dya ndòndò anyi bulongolodi kampànda bumutùme’s, kènàku ne bukenji bwa kubànda mu cyambilu to pàdiye kàyi mùle tètè ne Nyumà Mwímpè. Aci neya bushuwa menemene. Bwalu ùdi ùbàlombola ku didifwikakajila dya mu meeji a mu mutù dya bulongolodi kampànda pàdiye kàyi mùle tètè ne Nyumà Mwímpè to; ne pashiishe, mpàdiye ùbàpèesha cyàkudyà cya nkuci; *Mwàna Wa Mukòòkò Nè Nkuci*, mutúvwa bacyàmbè makèèlèlè dilòòlò amu.

⁴⁹ Mpindyewu mònaayi. Yèyè wàkamba ne: “Nùbandè ku Yelusàlèma ne nùshaalèku; nwindile anu cyanààna kuntwaku

too ne pânNgààtùmà mulayi wà Taatù.” Nenku dībà adi, cyàkenzàbo ncinyi? Bàvwamù lukàmà ne makumi abidi, balùme ne bakàjì. Bààkabwela mu cibambalu cya kuulu mu ntempèlù.

Mpindyewu, ditùkù dya Difestò dya Mpenta dikaavwa dyènda diseemena, kuumukila ku dikezula dya ntempèlù, dishebeya dya mwànà wa mukooko wa paasàkà too ne—ne ku dilwa dya Mpenta, uvwa mamuma a nzànzànzà a dinowa, cibilù cya disànka, cibilù cya disànka cya Mpenta. Nenku pa nzùbu. . .

⁵⁰ Mpindyewu, mèmè nkààdikù mukafikè mu matùnga awu. Matùnga a kùdì dībà dipàtukila mmpùùkàpùùkà bwa kwikalawù ne cibàndilu cya munda mwa nzùbu. Cibàndilu cìvwa pambèlu. Pambèlù pàà ntempèlù, mudìbo batùlondele, kùvwa cibàndilu cìvwa cìfila ku kaacibambalu kakese kuntwaku; udi ubànda, ubànda, ubànda, too ne paùdì ukafika mu kaacibambalu kakese kuulu aku, kenzè bu diyeebà ku lusongo lwà ntempèlù aku, kaacibambalu kakese kàà mushindu kampànda, kaacibambalu kàà kuulu. Ne Bible mmwambe ne bàvwa muntwamu ne biibi bìvwa bikànga, bwalu bàvwa ne bwòwà bwa beena Yudà, bwalu bàvwa bafwànyine kubàsùsulula bwa dikuukwila dya Mukalenge Yesu, paanyimà pàà Kaayifà mwakwidi munene awu, ne Ponsiyo Pilaatù, ne bakwabo abu bamanè kuMushebeya. Mushindu awu bàvwa bàtùùkakanakù ne beena Kilisto bònsò bàà ku dìnà abu. Nenku biibi bìvwa bikànga, ne bòbò bàvwa munkaci mwa kwindila.

⁵¹ Mpindyewu, mu bibambalu bya nanku awu abi, kakùtu màdìdiishì to. Màdìdiishì àvwa ntuntu tukese tucyàmakaja twènzè bu tuubiibi nanku, tùvwàbo bàkòka bwa kuunzulula. Mu bibambalu amu mùdì tuumyèndù tukese twà màfutà a mabengu tukùdika ne twikàle tuteema. . . Ní ukààdikù mufikè mu Californie ku Cafétèria kàà Clifton, pwekà mu nzùbù wa mwìnshì mwa buloba amu, neùsanganè cimwè cya mushindu awu menemene, wà cibambalu cya kuulu aci. Kacya nukààdikù bakùfikè anyi? Mbanganyì mwab'ewu bàkaadiku bakùfikè? Ndi mmòna bantu bàshikula mitù. Ee, nudi bamanyè cìndì ngamba aci. Eyo. Ùpwekè muntwamu, neùmone Lupangu lwà Getsèmànè; kumpàlà kwa aci, neùbwelè mu cimwè cya ku bibambalu bya kùdì dībà dipàtukila abi. Aci ncilelèlà menemene. Udi usanganamù kaamwèndù kakese kuuja tèntè ne màfutà a olèvà ne kaamukùsù kàà cilàmbà katèèkamù, kàteema.

⁵² Mpindyewu, twàmbè ne bòbò bàvwa kuulu aku, babàndile pa cyòci eci lwà pambèlu. Bàvwa babànde muntwamu bakasokòme, bwalu bàvwa ne bwòwà bwa beena Yudà. Yesu kàvwa mubàmbile bwa kuyabò mu cibambalu cya kuulu to. Ùvwa mwambe anu ne: “Nwindilè mu Yelusàlèma.” Bu bòbò mu nzùbu kampànda panshì apu, s'biìvwa bikolè bwa kumanya cìvwa mwa kwenzeka. S' bàvwa mwa kubwelamù ne kubàkwàta. Pa nanku kuyabò mu kaacibambalu kakese kàà kale mu nzùbu wa kuulu, muulu menemene amu mu cisàsà, nenku mwómò amu,

bakàngè cibambalu aci mu mushindu wa beena Yudà kabàyikù mwa kubwela mùvwàbo amu to. Ki kusòmbabò muntwamu bindìle munda mwa matùkù dikumi.

⁵³ Mpindyewu, mpindyewu, tudi mu Byenzedi 1. Mpindyewu, tèèlejàayaaku ne ntèmà yònsò mpindyewu. Nwamònu cimfwànyì aci anyì? Pambèlù pàà nzùbu awu kaacibàndilu kakese aku kàvwa kabànde, ne bòbò bàvwa babwelè mu kaacibambalu kakese aku amu. Panshì mu ntempèlù amu bàvwa munkaci mwa kwenza Difestò dya Mpenta. Kaa, s'kùvwa maalu manene munkaci mwa kwenzeka. Mpindyewu, ditùkù dya Mpenta pàakakùmbanàdi, bàvwa bònsò ne meeji àmwè, meeji àmwè, biitabùùje ne Nzambi ùvwa ne cya kutùma mulayi awu. Muntu ne muntu mwab'ewu àbwelèku mu meeji àmwèàmwè awu dilòlòlò edi ne àmonèku cidi cyènzekà. Cidi ne cya kwenzuluka. Mmulayi anu wumwewumwe wùvwàbo bòbò nawu awu. Nwamònu anyì?

⁵⁴ Cìvwàbo bènza ncinyì? Bàlonda dileeja dya njila, bàlonda mi—mi—mikenji ya Nzambi ya ne: “Nwindilè too ne. . .”

⁵⁵ Mpindyewu, bàvwa ne bwòwà bwa beena Yudà. Mpindyewu, vùlukàayi aci. Bàvwa ne bwòwà bwa beena Yudà. Mpindyewu, dyàkàmwè kulwakù cyonà cyenzè bu cipeepèlè cya cìvuma. Kacìvwa cipeepèlè cya cìvuma to; cìvwa bu cipeepèlè cya cìvuma. Nèmbalè tuumaalu twà dyela nsèke mu ndambu wa tusunsa emu pa mukùdimunyi awu. Cìvwa bu cipeepèlè cya cìvuma. Mu ngaakwilù mukwabo, cìvwa ncipeepèlè cya citàmbe mfùkìlu (kaa!), cintu kampàndà cìvwàbo mwa kuumvwa pambidi's. Cipeepèlè aci cìvwa munda mwabo. Kwàkalwa ci—cipeepèlè cya cìvuma, cyenzè bu cipeepèlè cya cìvuma. Cipeepèlè aci kacìvwa cìvuma to, kadi cìvwa cyùmvwika anu bu cipeepèlè cya cìvuma, cyenzè bu cintu kampànda cya cyèna ne: Hyu! Kacya nukàadikù bacyùmvwè anyì? Kaa, ekelekele! Cyenzè bu cipeepèlè cya cìvuma. Mpindyewu tàngilàayi. Nenku cyàkuuja. . .Mpindyewu, mwòmò emu ncyambè ne “mujimà,” kadi mu cyena Ngelikà mbambè ne “Mujimà (M-u-j-i-m-à ne dileetà dinene), Nzùbu Mujimà,” myaba yònsò munda amu. Mutanta wònsò, ditumba dyònsò, kaamutanta kakese kònsò kàvwa kàmwèke anu kuujibwe naaci. Kabìyi bya dyamba ne: “Ambàayi tǔng, Bàna beetu, nudikù bumvwè cìndì mèmè muumvwè eci anyì?” to. To! Cìvwa mmyaba yònsò, bu cipeepèlè cya cìvuma. Mpindyewu tàngilàayi. “Kwàkalwa cyonà bu cipeepèlè cìkolè cya cìvuma ne (mutwàngaji. Mpindyewu tàbaleelàayi miine *ne* ayi. Bwa cyanàànà, nudi nuCyàmbishisha cintu kampàndà cidiCi kacyi cyàmba to. Nwamònu anyì?)—ne bu (cyàkenzèkà kumpàla cìvwa ncyonà, cintu kampànda bu cipeepèlè cya—cya cìvuma cilwè pambidi pààbò)—ne (nudi bavùlùke ne, makèèlèlà dilòlòlò mvwa muye ku cisùmbishidi cya byàkudyà ne mèmè kusùmba mulungu wà dyàmpà ne munyiinyi. Ncintu cìvwa cyendè naadi. Dyàmpà

ncintu, munyìinyi ncikwabo ncintu. Nenuku cyonà cìvwa ncintu cìvwa cibàlengè)—ne kwàkamwènèka kùdìbo, (kumpàlà kwabo) ndimì—ndimì mipandùlùke.”

⁵⁶ Kùdikù muntu mwab’ewu ukàadi mumòne *Mikenji Dikùmì* ya Cecil DeMille anyi? Nuvwakù bamòne pàpwa Mikenji ayi munkaci mwa kufùndiibwa anyi? Mwakàcikwàtàyè mwine’s, ncìvwa mumanyè to. Kùvwa bintu bibidi anyi bisatu bìmva mumòne muntwamu bingàakanangà cya bushuwa. Cintu cya kumpàla mbukènkè bwa diikala ditwile dya màyi a matàmbà abu, ki mùdi mmwènèkelu waCì menemene. Nwamònu anyi? Cìkwabo cintu cìvwa mpàakafùndiibwà Mukenji awu apu, ne paanyimà pàa cimanè kujika, nuvwakù bamòne tupyà tùvwà tùtùka ku Dikunji dinene dya Kapyà adi atu, ne kùvwa tuundimì tukese twà kapyà tùtùkakù anyi? Nuvwakù bamòne aci anyi? Mpindyewu, ki cìndi ngeela meeji ne ncìvwa dya Mpenta. Kwàkabàmwènèkela... Mu mushindu wà ne bàvwa mwa kuCimòna. Kì mbambè ne: “Yàkamata munda mwabo” to. Kadi kwàkabàmwènèkela ndimì (mutwàcibìikilà), ndimì, bu ludimì mùdi ludimì *elu*, mmwènèkelu wa ludimì ewu, ludimì lwà kapyà. Mpindyewu, dici—mùngàmbi, dici ndici; munu mmunu. Munu kawèna wùmvwija ne udi mucyùmvwè to; cici cyùmvwija ne cìvwa ne mmwènèkelu wa munu. Ne byòbi ne cìvwa ndici, kacyèna cyùmvwija ne bàakacyùmvwà to; cìvwa ne mmwènèkelu wa dici. Eci cìvwa kapyà kàvwa ne mmwènèkelu wa ludimì, kacìyi muntu kampàndà wàkula to, kapyà kàvwa ne mmwènèkelu wa ludimì.

⁵⁷ Mpindyewu, tèèlejàayi. Tàngilàayi mùdi cyena Ngelikà cìcyàmba kaaba aka:

Nenuku dyàkamwè kwàkalwa cyonà... cyenzè bu cipeepèlè cìkolè cya cìvuma... (Mvensà mwi3—mwi3.)

Ne ndimì myabùlùke *yàkabàmwènèkela*,... (Kabiyyi ne ndimì myabùlùke yìvwa munda mwabo, anyi ne bòbò bàvwa bàakula ne ludimì lwabùlùke to; cìvwa nndimì myabùlùke *yàkabàmwènèkelà*. Mpindyewu, tàngilàayi. Kì nCyanjì kwikala pambidi pààbò to. Cìdikù mu cibambalu amu, cinyùngùluka eku ne eku bu cipeepèlè eci)... *kùdìbo... cyenzè bu... kapyà... ndimì myabùlùke... yàkabàmwènèkela... (aci nkumpàla kwabo) cyenzè bu... kapyà*, (ndimì myenzè bu kapyà) *ne lùmwè* (ku bùmwè) *lwàkiikila pa yònsò wa kùdìbo*. (Kabiyyi ne lwàkabwela munda mwabo to; lwàkiikila pamutù pààbò.)

⁵⁸ Mpindyewu, mònaayi mùdi Roi Jacques mufwànyine kusàka aci ku luseke: “Ne ndimì mipandùlùke yàkalwa pamutù pààbò, anyi yàkiikila (tudi tucibala bishi mu Roi Jacques amu?) yàkasomba pamutù pààbò.” Nwamònu anyi? Mpindyewu, kayìvwa mifwànyine kubànda muulu mwàmwa kadi kusòmba

to. Aci tudi bamanyè. Kadi nkùdimwinu wa ntwàdijilu mmwambe ne: “Lwàkiikila pamutù pààbò,” ngeela meeji; kî mmwômò anyi? Lekèlaayi ncìvwijè mu cyôci menemene. Eyowa! “. . .yàkiikila pamutù pàà yònsò wa kùdìbo.” Ludìmi lwa kapyà lùmwe lwàkiikila pamutù pàà yònsò wa kùdìbo. Nwamònu mwaba awu anyi? Nudi nucyùmvwu anyi? Aci ki cintu ciibìdi cyàkenzekà. Cya kumpàla cìvwa ncipeepèlè, pashiishe dimwènèka dya ndimi ya kapyà.

⁵⁹ Cìvwa mmu kaacibambalu kakese aka kàvwà ne tuumyèndù tukese tìvwà tùteema ne mäfutà a mabengu etu. Elààyibì meeji ne bôbò bàvwa basòmbe kuulu aku. Ne unwe wamba ne: “Kaa!” Ùtàngila mu cibambalu cijimà amu; cìvwa mu cibambalu cijimà amu. Dìbà adi kwambabò ne: “Tàngilàayi!” Ndìmi ya kapyà yàkabanga kulwa mu nzùbu mujimà amu. Mpindyewu tàngilàayi. Ne kwàkamwènèka ndimi ya kapyà eyi.

Mpindyewu tàngilàayi cìdi cìlondà:

Ne (Mutwàngaji mukwabo; cintu kampànda cikwabo cyàkakenzekà.) bààkuujiibwa bònsò tètè ne Nyuma Mwímpè, . . . (Cintu ciibìdi cyàkenzekà.)

⁶⁰ Mpindyewu mònaayi, twètù tudi baswe kushintulula aci bwa kwambaci ne: “Bàvwa ne ndìmi ya kapyà, ne kaaba aka bàkukumina; ne pashiishe bààkapàtuka ne bààkabanga kwakula mu mwakulu mwenyi.” Cintu bu nanku kaciyènakù mu Mifundu to, mulundà wanyi. Muntu kanà yònsò udi wakula mu mwakulu mwenyi dìbà dya kupeta kwa Nyuma Mwímpè awu ùdi wenza bibèngangana ne Bible. Nenku nènnùleejè mu tusunsa tukese etu ne nnujaadikila ne mèmè ntu ngiitabuujja dyakula dya mu myakulu myenyi, kadi kabiyi pa dipeta dya Nyuma Mwímpè nansha. Aci ndipà dya Nyuma Mwímpè. Nyuma Mwímpè n’Spiritù.

⁶¹ Mpindyewu tàngilàayi. Ndìmi eyi yìvwa mu cibambalu amu myenzè bu kapyà, ne yàkasòmba pamutù pàà muntu yònsò. Dìbà adi bààkuujiibwa tètè ne Nyuma Mwímpè (cintu ciibìdi), ne pashiishe, paanyimà pàà bôbò bamanè kuujiibwa tètè ne Nyuma Mwímpè, bààkaakula mu myakulu, kaciyi mu ndimi to, mu myakulu. Nukààvwakù bamòne aci anyi? Bààkabanga kwakula mu myakulu mikwabo bilondèshile mùvwà Nyuma mubàpèèshe mwa kwakula. Mpindyewu, mutooyi ewu wàkuumvwika too ne pambèlu.

⁶² Mpindyewu tàngilàayi. Mpindyewu, twàngatàayi cyàkàbìdi cìfwànyikijilu aci bwa kanùlu kucìpwa mwoyi to bwa mpindyewu. Bilondèshile Mufundu awu, bôbò mu cibambalu cya kuulu bindile, dyàkàmwe cyonà cyenzè bu cipeepèlè cikolè cya cìvuma, cìvwà pamutù pààbò; cìvwa n’Nyuma Mwímpè. Mbanganyi bàdi biitabuujà ne aci cìvwa ndimwènèka dya Nyuma Mwímpè? Cyenzè bu cipeepèlè, cipeepèlè citàmbe mfùkilu. Dìbà adi kumònabò. Nenku mwaba awu kùvwa

tundimì tukese twà kapyà, twôto atu lukàmà ne makumi abidi, ne kubangatu kupweka ne kusombatù pamutu pàà yònsò wa kùdibo. Cìvwa ncinyi aci? Cìvwa ncinyi aci? Dikunji dya Kapyà, òvwa Nzambi Yèyè mwine kadi munkaci mwa kuDyàbanya kùdi bantu Bèndè, ùbwela munda mwa bantu. Yesu ùvwa ne cintu cyònsò mu kaabujimà; Yèyè ùvwa ne Nyuma kàyi mupima to; twètù tudi tuMupeta mutùpimina (Nudi numòna cìndi muswe kwamba aci anyi?), bwalu twètù tudi bàna bapyàna. Mwoyi Wèndè—Mwoyi Wèndè wà Cyendelelele nguvwa wùbwela awu. Mpindyewu, cyàkenzekà ncinyi? Dìbà adi bònsò bàakuujiibwa tètè ne Nyuma Mwimpè.

⁶³ Mpindyewu, ndi muswe nnùkonkèku cintu kampànda. Manungànyi awu àkabanga dìbà kaayi? Pìikalàbi ne byàkakèngela bwa kupàtukabò mu cibambalu cya kuulu aci bwa kutùlukilabò ku bibàndilu abi ne kupàtukilabò mu mbàlandà wa nzùbù wa bukalenge awu amu—anyi mu—mbàlandà wa ntempèlù amu, uvwa pàmwàpa mu ntàntà wa kupita mìsèèsù yibidi ne mwaba wùvwàbo bàsanganyibwa, mu nzùbù wa kuulu awu ne panshi, pambèlu mu mbàlandà mùvwà bantu bònsò bakùngwile . . . Nenu bàakapàtuka muntwamu benzè bu bakwàcike ne Nyuma. Bwalu bantu abu bàakamba ne: “Bantu aba mbùle ne mvinyò mupyamùpyà.” Kacya kabàvwakù banji kumòna cya nanku to.

⁶⁴ Nenu muntu ne muntu ùvwa ùteeta kwamba ne: “Nyuma Mwimpè wàlu. Mulayi wà Nzambi wùdi pambidi pàanyi. Ndi—ndi muujiibwe tètè ne Nyuma.” Ne yèyè mwikàle mwena Ngalèlè, muntu uvwayè wàkula nendè awu, Arabe anyi mwena Peelààsà, ùmuumvwa mu mwakulu wa kwàbò kumulelè.

⁶⁵ “Mmunyi mutùdi tuumvwa (kaciyi mwakulu mwenyi to)—mmunyi mutùdi tuumvwa muntu ne muntu mu mwakulu wà kwàbò kumulelè? Bònsò bàdi bàakulà aba kì mbeena Ngalèlè anyi?” Ne mwikàle pàmwàpa wàkula cyena Ngalèlè . . . Kadi pàvwàbo bàcyùmvwa, cìvwa mmu mwakulu wà kwàkabàlelelèbo. Kabiya nanku to, ndi muswe nùkonkè—nùngandàmùnèku ku lukonko elu: Mmunyi mwàkenzekàbi ne Peetèlò wàkajuuka mwaba awu ne kwakula mu cyena Ngalèlè, ne musùmbà mujimà awu bùmvwà cìvwàye wàmba aci? Misùùkà binunu bisatu yàkalwa kùdi Kilisto anu mwaba awu pèndè Peetèlò wàkula mu mwakulu wùmwe. Bushuwa’s! Cìvwa n’Nzambi munkaci mwa kwenza cishimà. Peetèlò, kùdi batèèleji bàmwèbàmwè abu benza ne bàvwà basòmbèle mu Mèzòpòtaamiyà, ne beenyi, ne bàvwà biitàbe diitabuujya dyabo, ne bakwabo bònsò bafùmìne pa buloba bujimà bàvwà biimàne mwaba awu . . . Kadi Peetèlò mwimàne ùyiisha mu mwakulu wùmwe, muntu ne muntu ùmuumvwa, bwalu bantu binunu bisatu bàakanyingalala ne bàakabàtijiibwa dyàkàmwè mu Dìnà dya Yesu Kilisto. Aci cidi bishi?

⁶⁶ Mònaayi, nwènù balundà bàanyi, ncyènàku mwa

kutèkemena ne mwanèètù mwena dingumba, anyi mwena Mpenta neitabè aci mpindyewu mene to. Kadi londèshaayi cyôci aci mu Bible nùngambilè dîbà kanà dyônsò mwaba wùkaadibo bapetèku Nyuma Mwímpè ne baakùle mu mwakulu wùvwàbo kabàyi bamanyè civwàbo bàmba aci. Ne piikalàbi ne mushindu awu ngwàkaMupetàbo kwòkù aku, Nzambi mudìshikàmìne...Bìdì ne cya kwenzeka musangu wònsò mushindu anu wumwewumwe awu.

⁶⁷ Mpindyewu, ncyèna mwa...Mpindyewu, kwa Kònee... Tudi bavùlùke ne, patwàpweki ku Sàmaalèyà, makèèlèlà dilòòlò awu, twàsanganyi ne kakùvwakù cintu nansha cimwè cilonda ne bààkuumvwa mu mwakulu mukwabo to, cintu nansha cimwè cyambiibwe pa bwalu abu. Kadi pààkayàbo kwa Kòneeliyò, kùvwà bantu bàà matùnga asatu mashiiàngàne aku, bàkaakula mu myakulu. Ne pààkaakulàbo, piikalàbi ne bààkaakula, bàkaMupeta, mwàkambà Peetèlò, mushindu anu wumwewumwe wàkaMupetàbo bôbò ku cibangidilu awu. Nenku bààkamanya ne bàà Bisàmbà bya bendè bààkapeta ngàsà kùdì Nzambi, bwalu bààkapeta Nyuma Mwímpè anu mwàkapetàbo bôbò ku cibangidilu. Ndi ne lukonko kaaba aka, cintu kampànda pa bwalu abu mu tusunsa tukese emu. Mwua muswe bwa kutèeka bishimikidi, bwa nwènù kumòna ne bwalu bùdì cinyi.

⁶⁸ Mpindyewu ncyèna mwa kutèkemena ne bantu bàdì balongeshiibwe bishiilàngàne...Nenku ntèèlèjaayaaku, nwènù bânà beetu bananga, beena Mpenta, bàà mushinga mukolè. Ncyèna mufwànyine kulongesha eci pambèlu to. Eci cidi... Ncyèna mufwànyine kwenza cintu nansha cimwè bwa cijuula dikòkangana to. Kadi kwètù katùyi bapetè Bulelela to, netwàsè lwendu dîbà kaayi? S'bìdì bìkèngela bwa kwikalèku cintu kampànda mwab'ewu bwa kutwòlolaci. Bikèngela tùpetè ngàsà wa Dyambwibwa mwaba ewu mpindyewu. Bikèngela bwa Bulelèlà bùpatukilè patòòke.

⁶⁹ Cidi muntu mufwànyine kwenza ncinyi yéyè mwikàle mpudimaci, kamàmà, ne kàyikù mwa kwakula to nansha kakese? Mmufwànyinekù kupeta Nyuma Mwímpè anyi? Kadi bu ne kàtukù ne ludimi lwine, ne mukwàcikwètù awu pèndè ùjinga kusùngidiibwa? Nwamònu anyi? N'Nyuma Mwímpè, ndibàtiiza. Ne pashiishe, mapà ônsò aa bu mùdì dyakula dya mu myakulu, dyandamuna dya myakulu, mpaanyimà pàà wèwè mumàne kubwela mu Mubidi ku dibàtiiza dya Nyuma Mwímpè. Bwalu mapà awu àdì mu Mubidi wà Kilisto.

⁷⁰ Mpindyewu, cìndì ngambidila cyôci eci...Mpindyewu, tàngilàayi kùneeku. Nudikù bafwànyine kutèkemena ne ekeleeziya wa Katolike, uvwa ekeleeziya wa nzànzànzà wàkavwijiibwa bulongolodi pa buloba paanyimà pàà bapostolo awu...Pashiishe ekeleeziya wa Katolike wàkavwijiibwa bulongolodi, kaa, ndambu wa nkàmà ya bidimu paanyimà pàà

lufù lwà mupostolo wa ndekeelu, bidimu bitwè ku nkààmà yisambombo ne—paanyimà pàà bapostolo, paanyimà menemene pàà Nsangilu wa Nicée, pààkadisangishà baataatù bàà ku Nicée ne kudyenzabò bulongolodi; pashiishe kwenzabò ekeleeziya wa buloba bujimà, uvwa ekeleeziya wa Katolike awu. Mwômò amu mmwàkenzàbo ekeleeziya wa buloba bujimà. Ne mwakù *katolike* mbwena kwamba ne “wa buloba bujimà”; mbwena kwamba ne myaba yònsò. Bòbò...wa cyena Loomò—Loomò wa cimpàngaanù awu wàkakùdimunyiibwa kulwayè Loomò wa ciipaapà. Ki kushikikabò paapà kampànda bwa kwikalayè mfumu bwa kwangatayè kaaba kàà Peetèlò, bu mwàkeelàbo meeji ne kwambabò ne yèyè nguvwa Yesu mupèèshe nsapi ya Bukalenge. Nenku paapà awu kàvwa mwa kutùpakana to, ne ki mùcìdibi too ne leelu bwa ekeleeziya wa Katolike. Bwa ne... Dyèndè díyì yèyè ki mukenji ne díyì ditùma. Yèyè mpaapà udi kàyi mwa kutùpakana to. Aci ki cyàkiitabiibwà.

⁷¹ Nenku díbà adi, bwalu bantu kabàvwa mwa kwitaba dilongesha edi dya Katolike, bàvwa bàbàshebeya, bàbòòshila ku dikunji, ne bikwabo byònsò. Tudi bònsò bamanyine aci ku mifundù minsantu ya Josèphe, ne *Mukàndà Wà Bafwile Diitabuuja Wà Fox*, ne mikwabo minsantu yàbùngì... *Babùlònà Yìbìdì wà Hislop*, ne maalu-malonda ma—manene. Pashiishe, cyòci—paanyimà pàà bidimu cinunu ne nkàmà yitaanu, mutùdi bamanyè, bya Bikondo Bya Mìdimà, Bible ùvwa munyèngiibwa ku byanza bya bantu. Ne Wà—Wàkasokokiibwa kùdi nsaserdose kampànda wa mutekète, ne bikwabo byònsò, mutùdi tuumvwa bàmba.

⁷² Pashiishe paanyimà pàà aci kulwakù Dilongolola dya kumpàla, òvwa dya Martin Luther adi. Nenku yèyè wàkapàtuka wàmba ne kòòmunyò udi Katolike mwinyike ne mmubidi—mubidi mwena—diinà wà Kilisto awu, wùvwa anu wùleeja mubidi wà Kilisto cyanàànà. Ki kwimanshayè kòòmunyò awu pa kabàsà kàà kutwila binù ku cyàltàr, anyì pa bibàndilu, ne kubèngayè bwa kucibìikila ne mmubidi mwena—diinà wà Kilisto, ne kuyiishayè ne: “Mwakàne neikalè ne mwoyi ku diitabuuja.” Mpindyewu, kwèna mwa kutèkemena ne ekeleeziya wa Katolike neàtwe ku cyèndè to, nansha kakese, pàdi mfùmwbàbo udi kàyi mwa kutùpakana awu ùbambila ne to. Eyo.

⁷³ Pashiishe paanyimà pàà Martin Luther, ùyiisha Dibingishiibwa, John Wesley wàkalwa pèndè ùyiisha Dijidiibwa. Ki kuyiishayè ne muntu, paanyimà pàà mumanè kumbingishiibwa (bìdi anu bimpè) kadi bìdi bikèngela ùjidiibwè, ùkezudiibwè, muji wà bubì wùmushiibwè mu wèwè kùdi Mashì a Yesu. Mpindyewu, kwèna mwa kutèkemena ne ba-Luthériens nèbàyiishè Dijidiibwa nansha, bwalu kabàakuciyyiishakù to.

⁷⁴ Paanyimà pàà Wesley mumanè kuyiisha Dijidiibwa, ne tusùmbusumbu twà tukese-tukese tumanè kwabulukanganakù,

twàkalwà: ba-Méthodistes bàà Wesley, ne ba-Nazaréens, ne bikwabo, twòtò atu twàkalamà kapyà kàteema mu cikondo cijimà cyabo aci atu, pashiishe kulwakù Mpenta wàkamba ne: “Mòna’s, Nyuma Mwímpè ndibàtiiza adi, nenku tudi twakula mu myakulu pa kuMupeta.” Bushuwa. Dìbà adi pàdì aci cilwa, kwèna mufwànyine kutèkemenà ne ba-Nazaréens, ne ba-Méthodistes bàà Wesley, ne bakwabo abu ne nebiitabuuje aci to. Kì mbafwànyine kuciitabuuja to. S’bààkacibiikila ne ndémon. Eyo. Cyàkenzekà ncinyi? Bààkabanga kupweka; Mpenta wàkabanga kubànda. Mpindyewu ncijuukè too ne mwàlu Mpenta kupeta dyèndè pèndè dinyùkushiibwa. Wàdivwiji bulongolodi ne wàpàtuku, kàciyi wìtaba cintu cikwabo nansha cimwe to. Bàkaadi ne tunungu ne tukenjikenji twàbò sungasunga, ne aci cyàkòsu bwalu.

⁷⁵ Mpindyewu, pàdì Nyuma Mwímpè ùbwela ne ùsokolola Bulelèlà bwa cintu kanà cyònsò ne ùcijaadika ku Bwikadi Bwèndè Yèyè mwine ne ku Dìyi Dyèndè, kwèna mwa kutèkemenà ne beena Mpenta nebàmbè ne: “Néncitàbè” to. Bikèngela wìmanè pàà nkààyeebè mwàkiimanà Luther, mwàkiimanà Wesley, ne mwàkiimanà bakwabo bònsò amu. Bikèngela wèwè kwimanyina cyòci aci bwalu dìbà dyàfikì. Nenku cyòci aci ki cidì cimvwijà mémè kazòòlò kàà cizubu ku mukòlò. Aci ki cidì cimvwijà mushiilàngàne.

⁷⁶ Ne mémè ncyèna mwa kwasa lwendu mùdì Mwanèètù wa mushinga mukolè Oral Roberts, ne Tommy Osborn, Tommy Hicks, ne bakwabo abu to, bwalu ekeleeziya kayàakutwà ku cyànyì to. Bàdì bòbò bàmba ne: “Yèyè ùdì wìtabuuja dikùbiibwa dya Cyendeleele. M’Baptiste. Kèna wìtabuuja dyakula dya mu myakulu bu cileejì cya mbangilu cya Nyuma Mwímpè to. Tàpulukàayi ne mulùmyànà awu!” Nwamònu anyi?

⁷⁷ Kadi lwàku ùkungamanganè naaci tǔng. Twàku cyàdì. Bàdì mwa kukùngamangana ne ba-Luthériens, Ba—ba-Méthodistes’s. Beena Mpenta bàdì mwa kukùngamangana ne ba-Méthodistes. Mémè ndi mwa kukùngamangana ne beena Mpenta naaci. Ncya bushuwa menemene. Ncilelèlà. Mbwa cinyi? Twètù tudi twendela mu Bukènkè bu mùdìYe Yèyè mu Bukènkè. Nwamònu anyi? Twètù tudi twenda tubànda ne Cibeeba cya Mfumu, ne pàdici citàmba kuya kule, mpàdì ngàsà ùtàmbe kufidiibwa, mpàdì bukolè bütàmbe kufidiibwa, mpàdì citàmbe-mfùkìlu citàmbe kufidiibwa. Nenku’s ki bwalu abu. Dìbà ndyòdì edi dìdì Nyuma Mwímpè mupwekè mu mmmwènekulu wa Bukènkè mùvwàYe ku cibangidilu amu, Dikunji dya Kapyà, ne muDimwènèshe, wènza bintu anu bimwèbimwè byàkenzàYe pàvwàYe pa buloba apa abi. Ne Yesu wàkamba ne: “Mmunyi munùdì numanya ne mbabingè anyi kì mbabingè? Ku mamuma àbò nkunwàbàmanyinà. Ewu udi ungiitabuuja Mémè, byenzedi bìNdì ngenza yèyè neàbyènzè pèndè. Bimanyinu ebi nebifilè bàdì biitabuuja.”

⁷⁸ Mpindyewu nwênù bânà beetu beena Mpenta. Mémè ndi neenù. Ndi umwe wenu. Ndi mupetè Nyuma Mwímpè. Nkàadi mwakùle mu myakulu, kadi ncitu muyipetè pa kupeta kwa Nyuma Mwímpè to. Ndi mupetè dibàtiiza dya Nyuma Mwímpè; ntu nkàadi mwakùle mu myakulu, mwambe biprofeta, mupetè mapà a dimanya, lungènyi, dyandamuna, ne byònsò abi biikàle byènzeka. Kadi ndi muswikiibwe ku cyònsò cya ku bintu abi, bwalu mpindyewu ndi mwànà wa Nzambi. Bukolè, Kapyà kàà Nzambi, bìdi mu musùukà wànyi; ludìmi lwà Kapyà lwàkiikilà—lwàkabwelà munda mwànyi ne kwosha cyònsò cìvwa cìbènganganà ne Nzambi aci alu, ne mpindyewu ndi mulombola kùdi Nyuma Wendè. Yèyè mmufwànyine kwamba ne: “Ndà *eku*,” pàanyi kuya. “Ndà *eku*,” pàanyi kuya. “Akùlà *apa*,” pàanyi kwakula. “Ne enzà *cikampànda*, ne *cikansanga*, ne *cikankènga*.” Ki bwalu abu’s, anu bu. . . Udi mulombola kùdi Nyuma. N’Nzambi munda mwebe, wènzà diswa Dyèndè. Nansha ciikàle cinyi, Yèyè ùdi wènzà diswa Dyèndè.

⁷⁹ Mpindyewu, tèèlejàayi. Ngánjì mmonè mbalè kaaba aka kumpalà kwa kubanga nkonko pa nkòngamyakù ewu. Mpindyewu, mu Nkùdimwimu wa Vatican, Cibungu cya 7, 190—1205:

“Mbikolè bwa kushindika ní cìvwa ndiyi dya bantu abu bàakula mu mwakulu mwenyi; anyi mulubù anyi manungànyi a bwenzeji bwa cipeepèlè citàmbe mfùkilu cya cìvuma aci bwàkasalulà musùmbà awu.”

Kabàvwa mwa kucyùm vwa to. Mpindyewu tàngilàayi. Ní cìvwa mbantu. . .

⁸⁰ Nèmfilè anu cìfwànyikijilu cyanààna. Musùmbà wà bantu ngwòwò ewu wà beena Ngalèlà bapèlè, bavwàle mbondya. Ne ki bôbò aba mu mùsèèsù mwàmwa. Kacya kabàvwakù banjì kumòna cintu bu nanku to; ne byanza byela muulu, batùùlùke mu cibambalu cya kuulu aci, pashì pa bibàndilu abi, babwelè muntwamu, buujiiibwe anu tètè; kabàvwakù banjì kwakula to. Nwamònu anyi? Ki bôbò bàdi batùùlùka bàpìcilà mwaba awu abu. Nenu mpindyewu, twàmbè ne, bàvwa bènda bàtetuka mu cyòci eci. Ki bantu kwambabò. . . Mwena Ngelikà kampanda ùlwa lubilu kùndi, twàmbèbi ne, mémè ndi ngaakula cyena Ngalèlà.

Wèwè uya kùdiye lubilu wamba ne: “Mbwalu kaayi ebu kùdi’s, Mulùmjànà?”

⁸¹ “Ndi muujiiibwe tètè ne Nyuma Mwímpè. Bukolè bwa Nzambi mbutùùlùkile mu cibambalu mwàmwa. Cintu kampànda ncingenzèkèle. Kaa, butumbi kùdi Nzambi’s wè!”

Ki mukwabo ewu apa, ùvwa yèyè wàkula ne Arabe kampànda, kadi yèyè mwena Ngalèlà wàkula mu mwakulu wà ci-Arabe—Arabe.

⁸² Mpindyewu, kabèèna mwa kumanya ne, cívwa ncipeepèlè cya cívuma cívwa cikòke bantu abu pàakakúngwilà musumbà awu apu anyì, anyì ndyakula dya mu mwakulu mwenyi wùvwàbo bàakula awu? Mpindyewu, Bible kèna wàmba anu menemene . . . Nudi ne bintu bibidi binùdi mwa kutàngila. Cívwa ne . . . Bantu bàà—bàà pambèlu bàakamba ne: “Mmunyi mutùdi tuumvwa muntu ne muntu mu mwakulu wètù wà kwàkatùlelelàbo?” Kì ncyambè ne ngùvwàbo bàakula to, kadi bôbò mbàvwà bàwùmvwa.

⁸³ Pashiishe kasumbù kàmwèkàmwè aku, bantu bàmwèbàmwè abu, umvwijaayaaku cyôci eci’s. Peetèlò ùtùpikila pa cintu kampànda e kwambayè ne: “Nwènù beena Ngalèlà, ne nwènù bàdi basòmbèle mu Yelusàlèrà, eci cimanyiibwè kunùdi (bantu bàakamba ne bôbò kabàvwà ne mwakulu wà cyena Ngalèlà to) eci cimanyiibwè kunùdi ne tèelejàayi mèyi àanyi (mmu mwakulu kaayi—kaayi mùvwàye wàkula amu, ne bônsò abu?); mònà’s, bantu aba kì mbakwàcike maalà munùdi nwènù nucinka amu to, pa kumòna ne tucidi anu pa dibà citeema dya ditùkù, kadi eci ncyàkambàbo kùdi mupròfetà Yowèlà ne: ‘Nebyènzekè ku matùkù a ndekeelu, mùdi Nzambi wàmba, ne Mèmè nèngìcìkijè Nyuma Wanyi pa mubidi wònsò. Bàna beenu balela balùme ne bakàji nebàmbè bipròfetà.’” Ki wènda ùya wènda ùya, kwambayè ne: “Nwènù ne byanza bya lwonji nudi bapoopèle Mwànà wa Nzambi pa nkùrusè kàyi mwenzè bwalu to. Davidi wàkamba bwa bwalu Bwèndè . . . ‘kàvwa mwa kushiya musùkà Wèndè mu iferno, anyì Yèyè kàvwa mwa kwitaba bwa Wa Cijila Wèndè àmonè dibola nansha.’” Ki yèyè ne: “Bimanyiibwè kunùdi ne Yesu umwèumwè unùdi bapoopèle pa nkùrusè ewu Nzambi mmumuvwijè Mukalenge ne Kilisto.” Nenku pàakumvwàbo cyôci eci . . . Amen! Nganyi? Muntu yònsò wa mwinshì mwa maulu. Ncinganyi cívwa munkaci mwa kwenzeka aci? Yèyè kàvwa wàmba ne: “Mpindyewu, nèngàakulè mu cyena Ngalèlà; nèngàakulè mu *cikampànda*; ne nèngàakulè mu *cikansanga* nansha . . . ? . . .”

⁸⁴ Pàcívwa anu Peetèlò wàmba mèyi aa, bôbò kwamba ne: “Balùmyànà ne bàna beetu, tudi mwa kwenza cinyi bwa kusungidiibwa?” Ki Peetèlò kubàpèeshayè mèyi àvwà àkèngelà kwamba. Ki mushindu wùdibi byènzeka misangu yònsò ngwòwò awu. Nwamònu anyi?

⁸⁵ Nditungunuka, kukolesha bwa kubwela mu Nzambi, lwendu lwà sheemàsheemà. Udi umanya munyi? Nenku mpindyewu, Luther pàakapètaye dibingishiibwa, wàkabiikila aci ne n’Nyuma Mwímpè. Úvwa n’Yèyè. Nzambi ngwàkazabikamù ndambu wa Cyôci aci. Pashiishe kwambaYè cinyi? Wesley kupètaye Dijidiibwa, kwambayè ne: “Balùmyànà, paùdi wela mbilà, wàmupeci.” Kadi bàabúngi bàà kùdìbo bààkeela mbilà kadi kabàyi baMupètè to. Beena Mpenta pàakaakulàbo mu myakulu—myakulu myenyi, bàakamba ne: “Balùmyànà,

nwâMupeci.” Kadi bààbúngì bàà kùdìbo kabààkaMupeta to.

Kakùtu bintu pààbì ne mbimanyinu bya kumanya aci to. “Mushindu wùmwèpèlè wunùdì numanya mucì,” mwàkambà Yesu, “nku bimuma bidìwu wùkwàma,” byenzedi bya Nyuma, mamuma a Nyuma. Dìbà adi paùdì umòna muntu udi mùle tètè ne bukolè, udi mùle tètè ne Nyuma Mwîmpè, dìbà adi udi umòna nsòmbelu udi mushintùlùke. Udi umòna bimanyinu ebi bifila aba bàdi bìtabuujà: “Mu Dìna Dyànyì bóbò nebìipatè baadémons, nebàakulè myakulu mipyamìpyà. Nyòka yèyè mubàsùme, kî mmufwànyine kubènzela bwalu to. Bóbò bapetè cintu cya cishebeyangana, banwè, kî ncifwànyine kubàshebeya to. Nebàtentekelè babèèdi byanza, ne babèèdi nebàsangalè.” Ekelekele! Bimanyinu bya mushindu ewu mbidì bifila aba bàdi bìtabuujà. Kadi nudi nubwelamù bishi? Mapà awu àdi mu Mubidi. Nudi nubwela mu Mubidi bishi? Kí nku dyakula kunùdì nubwelamù to; kadi ku dibàtìijibwa nkunùdì nubwela mu Mubidi wùmwè (Kolintò wa Kumpàla 12.13). Ku Nyuma umwe nkutùdì bònsò tubàtìijibwa mu Mubidi awu ne biikàle ne bukenji ku mapà ònsò. Mukalenge ànùbènèshè.

⁸⁶ Mpindyewu, bu muntu mwa kutèeleja mukàbà wà mèyì ewu anyì muntu mwab’ewu mufwànyine kubènga kuciitaba, vùlukàku ne, ùcyènzèku ne musàngeelu, wèwè mwanèètù, bwalu mèmè ndi mukunangè.

93. Lukonko lwà kumpàla dilòlò edi: Mwanèètù Branham, mèmè ndi ngeela meeji ne télévision ùdi mulawu kùdì bàà pa buloba. Udikù wela meeji kaayi pa bwalu abu?

⁸⁷ Ee, udi mucifùnde ewu nì nganyì, mèmè nèntwe ku cyebe. Mbamuvwijè mulawu kùdì bàà pa buloba. Úvwà mwa kwikala dibènesha kùdì bàà pa buloba, kadi bóbò mbamuvwijè mulawu. Cintu kanà cyònsò cya bu nanku, nwènù bananga bàànyì, ncyùdì wèwè mwine ubandila’s. Byòbì ne télévision ùdi mulawu, nanku’s cibèjibeji cidi mulawu, nanku’s cisanji cya kadyòmbà cidi mulawu, ne misangu yàbúngì télèfonè ùdi mulawu. Nwamònu’s, nwamònu’s, nwamònu’s, nwamònu anyì? Mbilondèshile cyùdì wenza nendè. Kadi bu mùdìbi ne mwanèètù wa balùme ewu úvwà mwambè dilòlò adi ne, kakùcyèna kabidi ndongamu miine ku télévision to; ayi’s mmfrangà búngì cyanàànà’s. Muiyishi wetù wa kàyi dyeyà ewu udi uyiisha Evanjeeliyo mu Kaabujimà kènàku ne mushindu wà kufuta bwa ndongamu ku télévision to. Nenku ki bwa cinyi... Mwanèètù wa balùme awu úvwà wàmba dilòlò adi, ngeela meeji, mwaba kampànda, ne: “Tuutùlà lupwishi ku cisanji cyebe cya kadyòmbà,” anyì muntu kampànda, anyì ne: “Cyàngatùlùlè mu ditumba amu úteelejèku ndongamu ayi.” Ncya bushuwa’s.

⁸⁸ Kadi, mukwètù munanga, nansha wèwè mwikàle nganyì, ncya bushuwa ne mèmè ndi ntwà ku cyebe. Ncilwè cimwè cya ku bintu bya kutàmba kwela mulawu bwa bukwàbantù.

Mwômò amu bàdi bàngata mfrangà yònsò eyi yìvwà yìkèngelà kuya ku bitàdi bya mbùlámàtadi, kadi kubyèla mu mamanyisha a ndongamu yònsò ya mfwankà ne maalà a wiskí eyi ne bintu bya mushindu awu, ne bàkòselamù bitàdi bìvwà ne cya kuya kùdi mbùlámàtadi abi; ki pashiishe bànyùnguluka nunku bàkwàta bayiishi bàya naabò ku tubàdi bwa kubàdìila mfrangà pambidi. Mémè ndi ntwà ku cyebe, ncintu cibì be. Mpindyewu, aci kacyèna. . . Nudi bamanyè's, cidi anu ncintu cyùdi pèèbè mumòne's. Twasàkidila, mwanèètù wa bakàji, mwanèètù wa balùme, yònsò uvwa mwelè lukonko alu awu.

94. Mpindyewu, lùmwè lwa lwïmpè ndwòlò elu. Lukonko: Kùdi myaba mu Bible bu mùdi Samwèlè wa Kumpàla 18.10, udi wamba ne nyuma mubi wa kùdi Nzambi wàkenza bintu kampànda. Ncyèna ngumvwa cya ne “nyuma mubi wa kùdi Nzambi” aci to. Bu wèwè mwa kuswà umvwijàku bwalu ebu.

⁸⁹ Ee, pàmwápa ku dikwàcisha dya Mukalenge, ndi mwa kucyùmvwija. Kí mbwena kwamba ne Nzambi n'Nyuma mubi nansha. Kadi nyuma wa cintu cyònsò ewu ùdi ùkòòkela Nzambi. Ne Yèyè ngudi wènzeja bintu byònsò bilondèshile cidiYe Yèyè muswe. Nwamònu anyi?

⁹⁰ Mpindyewu, mu lukonko lwebe, udi wamba bwa nyuma mubi wàkapàtuka ùfùmina kùdi Nzambi bwa kutàcisha Shawùlà. Yèyè ùvwa ùsanganyibwa mu mmwènekelu—ngiikàdilù wa dibungama, mucibùlùke, bwalu, dyàmbedi yèyè ùvwa mutwè cimpingà. Nenku paùdi utwà cimpingà, nyuma mubi—Nzambi neànyishilè nyuma mubi bwa kukutàcishayè.

⁹¹ Ndi muswè nnùbadilèku cintu kampànda mu—mu katanci kakese. Ndi ne dyeji dikwabo kaaba aka pa bwalu abu. Nwamònu anyi? Nyuma yònsò ewu bùdiye naabù mbwa kukòòkela Nzambi. Nudikù bavùlùke pàvwà Yèhoshàfàtà ne Aakàbà bàkèba kuya mu mvità apu anyi? Kadi katanci aka, kùvwa—bàvwa basòmbe mu bibweledi bya cimenga. Kadi Yèhoshàfàtà ùvwa muntu mwakàne, ne wàkamba (bamfumu babidi abu bàvwa basòmbe mwaba awu, ne bàakasanga makolè àbò pàmwè) nenku kwambayè ne: “Twanji kukonka Mukalenge ní tudi mwa kuya anyi kubènga kuya.”

⁹² Ki Aakàbà kuya kangata bapròfetà nkàmà yinaayi bàvwàye naabò, bònsò, bàvwàye mulamè ùdiisha ne mudyundishishe mafù ne bikwabo byònsò; bàvwa ne mubidi tumatuma. Ki kulwabò mwaba awu, ne kwambabò bònsò cipròfetà ne díyì dimwe, bàmba ne: “Ndà, Nzambi neàkupèèshè bucimunyi. Ndà ku Laamòtà-giilàdà ne Nzambi neàkukwàcilè cintu aci kuntwaku.” Umwe wa kùdibo ùvwa mudyènzèle nsèngù yibidi ne wàkabanga kusempela eku ne eku cyènzè bu cifwànyikijilu, wàmba ne: “Ku nsèngù ya byamù eyi, wèwè neubàsakè too ne pambèlù pàà ditunga; ndyebe wèwè.”

⁹³ Kadi nudi bamanyè's, kùdi cintu kampàndà kùdi mulùme wa Nzambi cya kàyikù wa bàdingidija kùdi byònsò abi to. Nwamònu anyi? Cyòci kaciyi cipetangana ne Mifùndu to, kùdi katanyì. Bwa mwena kwitabuujwa wetu yònsò mulelèlè ewu. . . Ki Yèhoshàfàtà kwambayè ne: "Ee, bapròfetà nkàmà yinaayi bàba bàdi bàmwèka anu bimpè. Bàdi bàmwèka bantu bimpè."

"Kaa, s'mmwòmò's," mwàkambà pàmwàpa Aakàbà.

Kadi Yèhoshàfàtà kwambayè ne: "Kwènàku ne mukwabo anyi?" Bwa cinyi mukwabo pèèbè naabò nkàmà yinaayi biikàle ne diyì dimwe? Bwalu wàkamanya ne kùvwa cintu kampàndà cìvwà kaciyi cyùmwiki mu cyòci to. Nwamònu anyi?

Yèyè ne: "Eyowa, tudi ne mukwabo, mwànà wa Imla, kuntu eku," yèyè ne, "kadi mèmè ntu mumukine." Bushuwa's. Wèwè's neùkangè wendè ekeleziya dibà kanà dyònsò dyùdi mwa kucyènza. S'neùmwiipàtè mu ditùnga. Nwamònu anyi? Bushuwa's. "Mèmè ntu mumukine."

"Cyùdi mumukinyine ncinyi?"

"Yèyè misangu yèndè yònsò ùtu anu wàmba bipròfetà bìndwisha mèmè." Ngeela meeji ne Yèhoshàfàtà wàkamanya dyàkàmwè ne kùvwa—cintu kampàndà cìvwà kaciyi mu cyòci to.

Ki kwambayè ne: "Anjì ndàayi nùkakèbè Miikà awu."

Ki kuyabò kamukèba, nenku ki yèyè ulwàlwa ewu. . . Nenku pààkayàbo, bààkatùma mùsànjeelà wàkamba ne: "Mpindyewu, anjì indilà kakese. Mpindyewu, bóbò nya' bàdi ne ba-Docteurs mu Bunzambi kuntwaku nkàmà yinaayi. Bóbò ki bàdi batàmbe bwimpè mu ditùnga, ne màpòlomè a Ph, LLD, ne bikwabo byònsò." Yèyè ne: "Mpindyewu, udi mumanye's, wèwè kaamuntu kàdi kakàyi kalongè mukàndà aka, kùyi kabèngangana ne cisùmbù cijimà cya balombodi bàà ekeleziya cyàcya to."

⁹⁴ Imla kwambayè nunku, anyi ndi muswe kwamba ne, Miikà kwambayè nunku ewu: "Mèmè ncyàkwambakù cintu nansha cimwe to anu pàdi Nzambi ùcitéeka mukana mwànyì, ne dibà adi nèngàmbè anu menemene cidiYe Yèyè wàmba aci." Mèmè ntu muswe bya nanku. Mèmè ntu muswe bya nanku. Mu ngaakwilù mukwabo ne: "Mèmè nènshaalè ne Diyì." Cìvwà bakwabo abo bàmba nansha ciikàle cinyi. Awu ne: "Ee," yèyè ne, "mèmè's ngudi ukwambila awu. Wèwè kùyi muswe kwipaciibwa to, mbimpè wàmbe naabò cintu cimwèmwè aci."

Ki kuyayè kuntwaku. Kwambayè ne: "Nye anyi?"

Yèyè ne: "Ndàaku." Yèyè ne: "Mpèèshaayi bufùku ebu. Ngànji nyiikilanganè ne Mukalenge pa bwalu abu." Mèmè ntu muswe bya nanku. Ki bufùku abu Mukalenge kumumwènekelaYè, nenku pààkacyàbu yèyè kuya. Ki kwambayè, pàvwàye wènda ùya apu, kwambayè ne: "Ndàaku; kadi ndi mumòne Izaleela bu mikooko kayiyi ne mulami

to, mitangàlàkàngàne pa tukùnà.” Kaa, ekelekele! Aci kadi kumupátula mupúuyà wónsò.

Ki yêyè ne: “Ncìvwa mukwambìle anyi? Mémè’s mvwa mucimanyè. Ki mùtùye wènzèza menemene dîbà dyónsò, wàmba cintu kampànda cibi cya cindwisha.”

⁹⁵ Bwa cinyi? Ûvwa mushàale ne Dîyi. Bwa cinyi? Mupròfetà uvwa mumudyànjidìle, Dîyi dya Nzambi difùmina kùdì Eliyà, mupròfetà mulelèlà, yêyè wákamba ne: “Bwalu wedi panshi mashi a Naabòtà kàyi mwenzè bwalu, mbwa neyilakè èbè pèèbè mashi.” Ki kumwambìlayè cintu cibi. Elishà ùkaavwa mumanè kuya mu Dyulu. Kadi yêyè ùvwa mumanye ne Elishà ùvwa ne Dîyi dya Nzambi, pa nanku yêyè kushàala ne Dîyi. Mémè ntu muswe aci. Kushàala ne Dîyi.

⁹⁶ Piikalàbi ne Bible mmwambe Yesu Kilisto umwèumwè awu makèlèlèlà, leelu, too ne kashidi; bukole Bwèndè bùcidi anu bùmwebùmwebè abu; Nyuma Mwímpè mbwà ewu yónsò udi muswe, àlwe, àshaalè ne Dîyi. Eyowa’s, mukalenge! Cidì bakwabo bàmba nansha ciikàle cinyi. Nansha badìshìibwe bilenga bya bishi ne mu bilongelu bùngì kaayi mùdìbo bapicìle, aci kacýèna cipetangana naaci to.

Ki dîbà adi kwambayè. . . Mulùmyànà munene menemene udi ne nsèngù kumutù ewu, wíkala mwa kucisàka—pambèlù pàà ditunga kumpàlà kwa mfumu awu, kuseemenana e kumunàngulayè dipi ku mishìku (muyiishi mukese ewu). Ûvwa mumanye ne yêyè’s ùvwa anu munsantu mukese mubùnguluki wa mu malaba ewu pa nanku kakùvwakù cintu cívwa cifwányine kwambiibwa pa bwalu abu to, pa nanku kumunàngulayè anu dipi ku mishìku’s. Kwambayè ne: “Ndi muswe nkukonké cintu kampànda.” Yêyè ne: “Njila kaayi udi Nyuma wa Nzambi muyiilè pàpàtukuYè mu mémè piikalàbi wèwè udi muMupètè?”

⁹⁷ Yêyè kwamba ne: “Neùmvwè pawikalà ukàadi musòmbe mu nsànji kuntu kwàka bu mupika.” Yêyè ne: “Ndi mumòne Nzambi musòmbe pa nkwaswa wa butùmbi (Amen! Mpindyewu tèèlejàayi!), ne cilwilu cya mu Dyulu cívwa ciMunyùngùlùkile.” Bwalu búvwa cinyi? Mupròfetà Wèndè ùkaavwa mumanè kwamba cívwa mwa kwenzekela Aakàbà. Nzambi. . . Kàvwa ng’Eliyà wákamba aci to; ùvwa mmupròfetà mwela maanyi awu. Cívwa n’Dîyi dya Mukalenge, EMU MMÙDÌ MUKALENGE WÀMBA. Ki Miikà kwambayè ne: “Ndi mumòne cilwilu cijimà cya mu Dyulu cinyùngùlùkile Nzambi mu muyiiki munene. Ne bàvwa bàakula ewu ne ewu. Ki Mukalenge kwambaYè ne: ‘Nganyi uTùdiku mwa kutùma pa buloba, nganyi wa kunùdi udi mwa kuya pa buloba, bwa kuseeswisha Aakàbà, bwa kumufikisha ku diya kuntu kwàka bwa kuuja Dîyi dya Nzambi, bwa kumufikisha ku dimwasabò? Nganyi uTùdiku mwa kutùma pa buloba?’”

⁹⁸ Ee, ewu wàmba ne n’kampànda anyi n’kansanga. Kadi paanyimà pàà katanci, nyuma mubi, nyuma wa mashimi kubàndayè ùfùmina mwinshì mwàmwa e kwambayè ne: “Bu Wèwè anu mwa kungaanyishila mémè. Mémè ndi nyuma wa mashimi. Nèmpwekè pa buloba nkabwelè munda mwa bayiisha bônso abu, bwalu kabèèna ne Nyuma Mwimpè to; nenku nèmbàfikishè (bàdi anu nsongààlùmè milongeshila mu tulaasa)—nenku nèmpwekè pa buloba, ne nèmbwelè mu yônso wa kùdibo, ne nèmbàseeswishè, nenku mbàfikishè ku dyamba dya cipròfetà cya mashimi.” Ncyàkambàye anyi? Ki yèyè ne: “Ki mutwàseeswishangana nanku.” Ki kupwekaye pa buloba.

Yèyè kwamba—Nzambi kwambaYè ne: “Wèwè udi ne dyanyisha Dyànyì bwa kuya.”

⁹⁹ Ki kupwekayè pa buloba ne kubwelayè munda mwa bapròfetà bàà mashimi abu, beena mudimu wà bwambi mulongela mu tulaasa abu, ne kubàfikishayè ku dyamba dya cipròfetà cya mashimi. Ùvwa nnyuma wa mashimi ùkwàta mudimu ku diswa dya Nzambi. Ngànji. . . Anu cintu cikwabo kampànda cinùdi bafwànyine kumòna kaaba aka, katanci kakese cyanààna. Tàngilàayi eci. Ndi muswe bwa nùbuululèku naanyi mu Kolintò wa Kumpàla mu nshapità mwi5, mvnsà wa kumpàla, katanci kakese cyanààna. Kolintò wa Kumpàla. . . Nenku tàngilàayi eci panwikalà baswè kumòna cintu kampànda, mùdi Nzambi wènza cintu kampànda—mùdi nyuma mibi ayi, mwikalàayi—mwikalàayi mwa kukwàta mudimu. . . Eyo, Pòlò ngudi wakula:

Bàdi bàmba kùdi bantu bààbùngi ne kùdi masandi a bajikè munkaci mwenu, ne miine masandi a bajikè awu àtù kaàyikù. . . matèèdiibwe munkaci mwa bàà Bisàmbà bya bendè to, . . . (Nudikù nwela meeji kaayi pa bwalu abu munkaci mwa ekeleeziya?). . . mu mushindu wà ne muntu mwikalè ne mukàji wa tatwèndè.

Kadi nwènù nudi nudyùja makaaya, ne kanùyikù. . . (Tùmonèbi. Ngeela meeji ne ndi mubuulùle mabeji abidi ku. . .) . . . Nwènù nudi—Kadi nwènù nudi nudyùja makaaya, ne kanùyikù nudila mwadi mùrwàbi bikèngela to, bwa. . . (Mpindyewu, anji indilaayi kakese kaaba aka. Ndi. . . Eyowa, ncyà bushuwa. Eyowa.) . . . nudila mwadi. . . (Ki cyòci aci.) . . . nudyùja makaaya, ne kanùyikù. . . nudila mwadi, bwa ne yèyè udi mwenzè cyenzeni eci ùvwakù mufwànyine kwikala muumùshùibwe munkaci mwenu.

¹⁰⁰ Ncyèna mumanye to. Ncyèna ngeela meeji ne muntu kanà yônso ewu mmufwànyine kusàkidilakù dīyì anyi kuumushilakù to, kadi mémè ndi anu ntwà nyama ku mikolo bìndi ngiitabuuja: Muntu yèyè mùle tètè ne Nyuma kèna mwa kuMujìmija to. Nwamonu’s, nwamonu anyi?

Bwalu mémè mu bulelèlà mwikàle ncìyipù mu mubidi, kadi mwikàlepù mu nyuma, nkààdi mumanè kulumbulwisha, byenzè bu ne mwapù, pa bìdi bitàngilá ewu udi mwenzè cyenzedi eci awu,

Mu dîna dya Mukalenge wetù Yesu Kilisto, panùdi badisangishe, ne wanyì nyuma, pàmwè ne bukolè bwa Mukalenge Yesu Kilisto,

Bwa kwelela Sàtaanà muntu wa nanku awu bwa dibùtudiibwa dya mubidi, bwa nyuma wàmòna mwa kusùngidiibwa mu ditùkù dya Mukalenge Yesu.

¹⁰¹ Nzambi, mwikàle wàmabila Ekeleeziya wa cijila's, mwine udi Mubidi Wendè pànu pa buloba awu, mwikàle (mpindyewu, eci mpaanyimà pàà Dipungila Dikùlukulu, mu Dipyadipyà) wàmabila muntu uvwa wa bukooyà ne manyaanù bya menemene munkaci mwa cisàmbà ne ùvwa musòmbe ne mukàji wa tatwèndè mumuledi. Kwambayè ne: "Cintu cya mushindu awu mu Mubidi wà Kilisto...Nwènù, Ekeleeziya, nùmwelèlaayi dyabùlù bwa dibùtudiibwa..." Nwamònu anyì? Nzambi ùtu wànyishila...Ne pàdiYe ne cintu cidiYe muswe kumòna cyènjùbwa, bwa kwela muntu kampànda mfimbù, Yèyè neàmulekelèlè nyuma mubi pambidi pèndè bwa kutàcishayè muntu awu bwa—bwa kumwaluja. Mpindyewu, tudi tusangana mwine muntu ewu paanyimà...

¹⁰² Ki lutàtù lùdi naalu maekleeziya leelu ewu ndwòlù alu. Pàdi muntu ùbwela mu Mubidi wà Kilisto ne ùlwa cìmwè cya ku bidimba kadi ùbanga kwenza bubì, pamutù pàà nwènù bònsò kudìsangisha ne kwenza cintu cìmwècìmwè eci...Kadi nwènù, beena Branham Tabernacle, enzàayi nanku. Bwalu panùdi anu numutwà nyama ku mikòlò apu, yèyè ùdi mwinshì mwa Mashì. Ne yèyè ùdi anu ùtùngunuka ne kwenza kwenzulula cintu cìmwècìmwè cya kale aci dîbà dyònsò. Dìsangìshaayi nùmwelèlè dyabùlù bwa dibùtudiibwa dya mubidi, bwa nyuma wendè—bu—wàmòna mwa kusùngidiibwa mu ditùkù dya Mukalenge. Kadi nùtangilàayi nùmonè mùlwalwà mfimbù wa Nzambi awu. Nùtangilàayi nùmonè mùdi dyabùlù ùmupyà. Nyuma mubi ngudi umukwàta awu.

¹⁰³ Nenku nsongàalùmè ewu's wàkadìlongolola. Wàkaalukila. Tudi tusangana mu Kolintò Mwibidì mwaba wàkadìsukulàye anu menemene kumpàlà kwa Nzambi.

¹⁰⁴ Tàngilàayi Yobò, muntu mupwàngàne, muntu mululàme. Kadi Nzambi's wàkaanyishiila nyuma mubi bwa kulwayè pambidi pèndè, ne kumunyooka, ne bikwabo byònsò bwa dipwàngaja dya nyuma wendè. Nwamònu anyì? Pa nanku nyuma mibi yìtu ne...Nzambi ùtu misangu yàbùngì ùkwàta mudimu ne nyuma mibi bwa kukumbaja ndongamu Wendè ne diswa Dyèndè.

95. Mpindyewu, lwà kapanda—mutù menemene ndwòlù elu, Lukonko (Ngeela meeji ne ùdi anu yèyè muntu umwèumwè

awu, bwalu mbimwèke anu bu ne ncyanza cimwecimwe aci): **Byòbi ne muntu ùdi ne cya kwikala ne Nyuma Mwîmpè bwa kwikala—kwikala ne Nyuma Mwîmpè bwa kwikala mukùdimùne mucima ne bwa kuya mu Dyambwibwa, ngiikàdilù wa bânà bàkaadi bafwè kumpàlà kwa bidimu bya dijingulula dya maalu neikalè cinyi? Ne bôbò abu nebàjuukè ku lufù dîbà kaayi?**

¹⁰⁵ Mpindyewu, mwanèètu wa balùme, mwanèètu wa bakàji, ncyèna mwa kukwambila aci to. Kakwèna Mufùndù nansha wumwe pa bwalu abu mu Bible wùndiku mwa kupeta mwaba nansha wumwe to. Kadi ndi mèmè mwa kwamba cìdì àànyì meeji. Mpindyewu, eci necinùkànkàmikèku nwènù bàdì biitabuujà ngàsà wa Nzambi abu. Nudi numòna's, muntu ewu mmuswe kumanya (bu mudìbi ne ndukonko lwîmpè lutàmbe. Nwamònu anyi?) muntu ewu mmuswe kumanya cìikalà dibiikà dya ku lufù—cìikalà mwa kwenzekela mwànà wa mu dibòko, piikalàbi ne bidi bikèngela bwa kwikalayè ne Nyuma Mwîmpè bwa kuyayè mu Dyambwibwa... Anu mûngàmbì amu, ncyà bushuwa. Aci mbilondèshìle Bible. Aci ndilongesha dya mu Mifùndu. Kaciyi—kaciyi bwa kuya mu Dyulu to... Bwalu bantu bàdì bùle tètè ne Nyuma Mwîmpè mbiikalà mu dibiikà dya ku lufù dya kumpàlà, Basungula. Kadi bàshààdilè bàà ku bôbò abu... Bakwabo bafwè kabàkwikala ne mwoyi to munda mwa bidimu cinunu. Paanyimà pà Bukalenge bwa bidimu cinunu, pashìshe dibiika diibìdì, cilumbulwidi cya Nkwasa Mutòòke munene. Nwamònu anyi? Aci cìdì menemene dilondangana dya Bible. Kadi muntu ewu mmuswe kumanya bwalu bwa bânà bàà mu mabòko aba. Bôbò... Mu ngaakwilù mukwabo, bôbò bàkaavwa ne Nyuma Mwîmpè kumpàlà kwa kulediibwabò anyi? Bàkaavwa baMupetè anyi? Mpindyewu, aci mèmè ncyèna mwa kukwambilaci to.

¹⁰⁶ Kadi mpindyewu, twàmbèbi nunku ewu: Tudi bamanyè ne bânà bàà mu mabòkò bàdì bàfwa, baledi bààbò nansha biikalè banganyì, bôbò mbasungìdiibwe. Mpindyewu, mèmè ndi mbèngangana ku mèyì ne cilongelu cya bapròfetà pa aci. Bôbò mbambè ne yèyè ní ùvwa—ní mmufwè mwikàle ne muledi mubiipe, ne mwànà awu mmufwànyìne kuya mu iferno, ùbola ùbolelamù; bwèndè bwalu kabùciyikù kabidi to. Ee, Yesu... Yone wàkamba pàakalwà Yesu apu ne: “Mònaayi Mwànà wa mukooko wà Nzambi udi umusha mpekaatu wa bàà pa buloba.” Nenu kwànà ní ùvwa muntu wetu ewu, uvwa ne cya kupicila ku dilumbulwisha dya Nzambi awu, pèndè Yesu's mufwe mbwà kuumusha mpekaatu, mpekaatu ne mpekaatu yònsò's wàkuumushiibwa kumpàlà kwa Nzambi pàakafwà Yesu bwa kiipàcìlà aku apu. Mpekaatu yebe yàkafwidiibwa luse. Mpekaatu yànyì yàkafwidiibwa luse. Ne mushindu wumwepele wùdiku mwa kufwidiibwa luse ngwà kwitaba dikufwilà Dyèndè dya luse adi. Mpindyewu, mwànà wa mu dibòko kèna mwa

kwitaba difwidiibwa dyèndè dya luse to, pa nanku yèyè kî mmwenzè bwalu nansha bùmwè to. Kî mmwenzè bwalu nansha bùmwè to nansha kakese. Nenku kakùyì mpatà to yèyè ùdi ne cya kuya mu Dyulu kakùyì dibànzà to.

¹⁰⁷ Kadi newămbè ne: “Neàye mu Dyambwibwa anyi?” Mpindyewu—mpindyewu, edi ndiyi dyanyi mêmè mwine; aa mmeeji àanyi mêmè mpindyewu. Kanwikadi. . . Ncyèna mwa kujaadika cyôci eci ne Bible to. Kadi tàngilàayi. Pìikalàbi ne Nzambi, kumpàlà kwa difùkà dya dyulu ne buloba, ùvwa mumanye muntu yònsò uvwa mwa kwikala pa buloba ewu. . . Nudi nwitabuujà aci anyi? Yèyè ùvwa mumanye kajijijiji kònsò, nkùpà yònsò, dîna lujiji lwònsò, Ùvwa mumanye kantu ne kantu kònsò kàvwàku mwa kwikala pa buloba. Pìikalàbi ne Ùvwa mumanye nanku. . .

¹⁰⁸ Tàngilàayi. Twàngatàayi cileejilu, Mòsà. Mòsà pààkalediibwàye, ùvwa mupròfetà. Kumpàlà kwa Yelèmiya. . . Nzambi wàkambila Yelèmiya ne: “Kumpàlà mene kwa wèwè kuvùngiibwa munda mwa mamwèbè, kumpàlà mene kwa wèwè kuvùngiibwa munda mwèndè, Mêmè nkààvwa mukumanyè, ne mukujidile, ne mukujaadike mupròfetà wa bàà bisàmbà.” Yone Mubàtiji, bidimu nkàmà mwandamutekète kumpàlà kwa kulediibwàye, Yeshàayi wàkamumòna mu cikhèna-kumòna, kwambayè ne: “Yèyè ndiyi dya ewu udi wela lubilà mu cipèèlà.”

¹⁰⁹ Didyanjila-kulongolola anyi didyanjila-kumanya dya Nzambi ndimanyè byònsò bya bàna bakese bàà mu mabòko (nwamònu anyi?), ciwàbo ne cya kwenza. Ne Yèyè ùvwa mumanyè ne nebàfwe. Ùvwa mumanyè. Kakwèna cidi mwa kwenzeka Nzambi kàyi mucimanyè to. Kakwèna cidi mwa kwenzeka bwa. . . Anu mùdi Mulami Mwîmpè wa mikooko amu, mùdiYe ùbwela. . . Mpindyewu, bwa kwangata eci ku Mifundu, ncyèna mufwànyine kwamba ne Mufundu mmwambè *cikampàndà-ne-cikansanga* to. Ndi ncyàngata pàanyi anu nanku ne mmeeji àanyi.

96. Mpindyewu, lukonko lùdi lùlondà ndùndi mêmè ndyèlela meeji ne pàmwàpa muntu kampàndà ùvwa pa cîmvwà mwambè dilòlò adi aci. **Umwijaku cya ne mukàji udi ùsùngidiibwa ku dilela dya mwànà aci.**

¹¹⁰ Mukàji kèna ùsùngidiibwa ku dilela dya mwànà nansha. Kadi twànji tùbuululàayi mpindyewu mu Timòtè wa Kumpàla 2.8 bwa katanci kakese cyanààna. Nenku twànjàayi anu kujandula cidi Bible wamba bwa mwànà. Mpindyewu, ndi mumanyè ne aci ndilongesha dya Katolike, mùdi beena Katolike bamba ne mukàji ùdi ùsùngidiibwa ku dilela dya bàna, ku dilela dya mwànà. Kadi katwikadi. . . Mêmè ncyèna ngiitabuujà nanku nansha. Timòtè wa Kumpàla nshapità mwi2, tùbangilàayi ku mvensà wa 8, nenku tùbalè anu katanci kakese cyanààna mpindyewu. Eyo, tèelejàayi.

Bya mwomumwe kabidi, bakàji beenu bàdilengèjè ne mwádilu wa bupwekèle... (Kabivwa bikèngela bwa twètù kulomba ciine aci to, mmwômò anyi? Tèelejàayi eci nùnkù)... ne didipòpa; kabiyi ku diluka dya bipya bya nsukì yèndè, anyi ngòlò, anyi masàngà, anyi bilàmbà bya mushinga mukolè to; (Bànà beetu, ndi nnwàmbulwishakù kaaba aka, mündi ntèkemenà. Tufulu twònsò twà bijèngù tupyatùpyà etu ku ditùkù anyi matùkù ónsò àsàtù atu. Nwamònu anyi? Abi kî mbikùmbànyìne beena Kilisto to.)

Kadi (bìdi bikùmbànyìne bakàji bàdi bàmba mùdìbo ne difwànà dya Nzambi) biikàle ne byenzedi bìmpè.

Bakàji beenu bàyilè mu cinyàànyà mu dikòòkela dyònsò.

Kadi ncyèna ngiitaba bwa mukàji àlongeshè, anyi àngatè bukòòkeshi kumutù kwà... mulùme to, kadi ikalè... mupùwe.

Bwalu Adàmà ngwàkenjiibwa dyàmbedi, ne pashiishe Evà.

...Adàma kî ngwàkaseeswishiiibwa nansha, kadi mukàji pààkaseeswishiiibwàye wàkasanganyiiibwa mu dishipa dya mikenji.

Kadi yèyè neàsungidiibwè ku dilela dya bânà pìikalàye... (Mpindyewu, kèna wàmbila mukàji wa pa buloba, udi ulela bânà awu to)... pìikalàye mutùngùnùke mu diitabuujà... (Nwamònu anyi? Pìikalàye mutùngùnùke. Yèyè ùkaadi... Ki mukàji udiyè wàmba nyèyè awu, mukàji ukàadi mumanè kusungidiibwa awu. Nwamònu anyi?) ... ne dinanga ne cijila pàmwè ne didipòpa dyònsò.

¹¹¹ Kî ndilela dya mwànà didi dimuvwija musungidiibwe nansha, kadi mpàdiye ùkolesha bânà, wènza wèndè mudimu, kàyi ùkolesha tumpuusù, tubwà, ne bikwabo byònsò abi bwa kwangatabi kaaba kàà mwànà, mùdìbo bènza leelu ewu emu to, bàbìpèèsha dinanga dya maamù bwa wàmòna mwa kwikala ùpàtuka ùya mu lunyaanya bufùkù bujimà. Bàmwè bantu's ki cidìbo bènza. Nwamfwilaayikù luse, kadi ncidìbo bènza. Awu ngaakwilù mukolè be bwa mémè kwamba nanku, kadi bulelèlè bìdi anu bulelèlè. Nwamònu anyi? Bòbò kî mbaswe mwànà to bwa kushààlabò balamina panshi kùdiye. Kadi mu kulela kwa bânà, pìikalàye mutùngùnùke mu diitabuujà, cijila, ne didipòpa dyònsò, yèyè neàsungidiibwè. Kadi pìikalàbi ngudikù, wèwè neàsungidiibwè pèèbè, pìikalàbi ne udi mulediibwe cyàkàbìdi. Newikalè mwa kwondopiibwa pìikalàbi ne udi mwitàbùùje. Wèwè udi mwa kupeta Nyuma Mwìmpè pìikalàbi ne udi muMwitàbùùje, udilongolola Bwèndè Yèyè, pìikalàbi ne

udi mudilongòlòle Bwèndè Yèyè. Nenku yéyè neàsungidiibwè pìikalàbi ne mmutùngùnùke ne kwenza maalu aa (nwamònu anyi?), kadi kî nne bwalu mmukàjì to. Pa nanku aci ncyà bushuwa, mwanèètù wa balùme, mwanèètù wa bakàjì. Kî ndilongesha dya Katolike to nansha kakese. Mpindyewu ndi muswe. . . Lukwabo ndwòlò elu lùdì lukolè lwà menemene. Pashìishe tudi ne lukwabo kabidi. Ndi ngeela meeji ne tudi pàmwápa ne díbà bwa kulwàndamuna. Nkààdi mwangàte díbà dyònsò ditùvwà naadi. Mpindyewu, ebi bìdi anu—ebi bìdi anu bipeta bya paanyimà pàà ditàbuluja's. Ebi mbipeta bya paanyimà pàà masangisha awu, nkonko eyi.

97. Mpindyewu: Mwanèètù Branham (mbalùtuutè ku màshinyi a mikàndà), kùdikù Mufùndù bwa muntu wàkula mu myakulu ne wàndamuna mukenji wèndè yéyè mwine anyi? Byòbi nanku, swàku ùmvwijè. Kolintò wa Kumpàla anyi Kolintò 14.19 ne Kolintò 14.27 kabidi.

¹¹² Eyo, tuyaayi ku Mufùndu awu bwa tùmone cìdìwu wàmba. Ne pashìishe netùmone ní tudi tulama cyòci eci mu Mifùndu. Tudi baswè misangu yònsò kwikala anu mu Mifùndu. Ne Kolintò 14. Mpindyewu, muntu ewu mmuswe kumanya ní mbya mu Mifùndu pàdi muntu wàndamuna mukenji wèndè yéyè mwine wùdiye mufile ku dyakula dya mu myakulu. “Byòbi nanku, swàku ùmvwijè Kolintò 14.19.” Tùmonebi, 14 kùdì 19. Eyo, tudikù.

Kadi mu maèkèleeziyà ndi. . . mbìmpè bwa mèmè kwakula myakù yitaanu ne luumvu lwànyì, bwa ku dìyi dyànyì ngaamòna mwa kulongeshakù bakwabo kabidi, pamutù pàà binunu dikumi. . . mu. . . myakulu myenyi.

Mpindyewu, udi ulonda mmvensà wa 27, udiyè muswe kumanya.

Muntu yéyè wàkula mu mwakulu mwenyi, cìikalè kùdì babidi, anyi ku. . . bóbò bàábàngì basatu, ne ciine aci ku muntu ku muntu, ne muntu umwe àndamunè.

¹¹³ Mpindyewu, ndi ngangata kùdì muntu ewu ùteeta kafika (cìndì muswe—nènnùbadilè cintu kampànda katanci kakese cyanàànà). Kadi ndi ngeela meeji ne kùdì mwanèètù wa balùme anyi wa bakàjì ewu ùteeta kafika nku ne: “Mbikùmbàne bwa muntu udi wakula mu myakulu bwa kwandamunayè kabidi mukenji wùdiye mufile awu anyi?” Mpindyewu, mulundà wanyi munanga, bu wèwè anu mwa kubala mvensà wa 13 mu nshapità umwèumwè awu, neàkwambilè:

Ki bwa cinyi ewu udi wakula mu mwakulu mwenyi àsambilè bwa yéyè kwandamuna.

¹¹⁴ Bushuwa's. Yéyè ùdi mwa kwandamuna mukenji wèndè yéyè mwine. Mpindyewu, bu twètù anu mwa. . . Twánjààyi anu. . . Ee, wèwè. . . Balà cyònsò aci kaaba aka, nenku neùmone ne Cidi. . . Balà anu nshapità mujimà awu. Mwìmpè be, ùdi ùcyùmvwija.

¹¹⁵ Mpindyewu, dyakula dya mu myakulu...Mpindyewu, patùcidipu apa...ne bu mùdi eci munkaci mwa kukwàciibwa pa mikàbà ya mēyi, ndi muswe kwamba ne ndi ngiitabuuja dyakula dya mu myakulu anu mūndi ngiitabuuja dyondopa dya kùdi Nzambi amu, ne di—dibàtiiza dya Nyuma Mwimpè, dilwa dya Cyàkàbìdi dya Kilisto, ne bukolè bwa buloba bùciwawwà; ndi ngiitabuuja cyôci aci anu mūndi ngiitabuuja, kadi ndi ngiitabuuja ne dyakula dya mu myakulu didi ne kàadi kaaba anu mùdi dilwa dya Kilisto ne kàadi kaaba amu; dyondopa dya kùdi Nzambi didi ne kàadi kaaba; bintu byônsò bìdi ne kàabi kaaba.

¹¹⁶ Mpindyewu, kunùdi nwênù, ndi mupetèku mpungà bwa kwamba byôbi ebi mpindyewu, ne ndi muswe kubyùmvwija. Kadi mēmè mutàpe muntu ku mwoyi, kī nku bukole to. Ncyēna ne meeji a kufila cibwejàkàji to. Kadi tèèlejàayi. Lutàtù lùtùbo naalu kùdi beena Mpenta mu dyakula dya myakulu myenyi (cīndi mēmè mwine; ndi mwena Mpenta. Nwamònu anyi?)... Mpindyewu, citù lutàtù ncyôci eci: ncyā ne kabātu bàbīneemeka to. Ne cikwabo cintu, bàdi bôbò bàbilekela anu mùyaayàbi amu. Kabèna bàalukila ku Dīyi to.

¹¹⁷ Mpindyewu tèèlejàayi. Mushindu ngwôwò ewu—lekèlaayi—mushindu ngwôwò ewu wùdi ekeleeziya ùlongolodiibwa. Mpindyewu, mu ekeleeziya wa beena Mpenta, bu mēmè mwa kwikala mpaasàtā wa ekeleeziya ewu, nēnnwāmbilè mūndi mufwānyine kumulongolola (nwamònu anyi?), bu ne mvwa—bu ne mvwa kaaba aka dībā dyônsò bwa kwikala mpaasàtā wendè. Mvwa mufwānyine kwitaba dipà dyônsò dya mu Bible. Kwanji kwambila beena kwitabuuja bwa kubàtīiibwabò mu Nyuma Mwimpè. Ne pashīshe, bivwa bikèngela bwa dipà dyônsò dya mu Kolintò wa Kumpàla 12 kwikaladi dikwàta mudimu mu ekeleeziya wanyī, bu mēmè mwa kuàpetamù, mubidi mujimà wùkwàta mudimu.

¹¹⁸ Mpindyewu, nwênù baswè kumòna... Mpindyewu kī mmēyi a kadyuwù ngamba to. Ne vùlukàayi ne, ncyēnàku mufwānyine kwamba dīyi nansha òmwè dibèngàngàne to—ndi mufwānyine kupenda Nyuma Mwimpè. Ne Nzambi mmumanye ne ncyēnàku mufwānyine kucyàmba bibi to. Nwamònu anyi? Kadi ndi ngamba eci anu bwa kunùpèeshakù mmwēnenu wa Mifundu paanyimà pàà mēmè mumanè kucilonga mpindyewu munda mwa bidimu makumi abidi. Ndi nyiisha kùkaadi bidimu bitwè ku makumi asatu. Ne ndi anu mupicile mu bintu byônsò, mupàndùke ànu bwoyà mu cibàalà's; s'nudi mwa kudifwānyikijila mùvwābi mwa kwikala. Ne ntàngila muntu ne muntu, ne dilongesha dyèndè, pa buloba bujimà. Ne mbyàngata bwalu mbwa dyàkalenga dyànyī. Mbwa dyàkalenga dya bantu pa kuumusha anu dyànyī mēmè mwine to. Bidi bikèngela ngùumukè pànwapa. Bidi bikèngela bwa nwênù nùumukè pànwapa. Kadi mēmè muumukè bu mupròfetà wa mashimi, nēnjimijè musùkà

wànyì sungasunga ne nènjimijè misùùkà yenu pàmwè naanyì. Pa nanku ncitàmbe ne—ncitàmbe ne cyàkudyà cya bwàcyàbwàcyà; ncitàmbe ne dimanyika; ncitàmbe ne cintu cikwabo kanà cyònsò; cìdi Mwoyi bwànyì mèmè. Nwamònu anyì? Nenku ndi muswe kwikala misangu yònsò anu ne meeji matòòke matàmbe kwikala a ndòndò.

¹¹⁹ Mpindyewu, paùdi ubwela mu ekeleeziya kampànda wa Mpenta, cintu cya kumpàla . . . (Ncyèna nswà kwamba ne nyònsò to. Yimwè ya kùdiyi yìdi . . .) Misangu yàbùngì paùdi ubwela mu ekeleeziya kampànda ne ubanga kuyiisha; paùdi uyiisha apu, muntu ùjuuka wàkula mu myakulu. Mpindyewu, munanga awu ùdi mwa kwikala anu menemene mùle tètèntè ne Nyuma Mwïmpè, ne cìdi mwa kwikala Nyuma Mwïmpè wàkwila mu muntu awu, kadi bwalu bùdi ne, kí mmulongèshìibwe to. Mudimu wà bwambi ewu pa cibùmbà cya ku cyambilu piikalàbi ne wùdi wàkula ku disonsodiibwa, nyuma wa bapòfetà ùdi ùkòòkela mupòfetà. Nwamònu anyì? “Bintu byònsò byènjiibwè . . .” Mpindyewu, ndààyi kùdi Pòlò kaaba aka nùmonè bwa cinyi ùdi wamba ne “pàdi umwe wàkula,” ne bikwabo . . . “pàvwàye ùbwela, mùvwa anu cibwejàkàji pa cyòci”

¹²⁰ Mpindyewu, mèmè ngenza dibìikila dya ku cyoshelu, muntu ùjuuka wàkula mu myakulu. S’cìdi anu . . . Ee, s’mbipiciibwe ne mwimànyìke dyanza dya dibìikila dya ku cyoshelu adi’s. Bìdi bìdìimanyika’s. Nwamònu anyì?

¹²¹ Ne pashìishe, cikwabo cintu. Misangu yàbùngì bantu bàdi bàjuuka bàakula mu myakulu, ne bantu basòmbe bàcyànkunya bàzòkà, munkaci mwa kukènzakana. Nzambi Yèyè wàkula, shààla mupùwe, tèèlejà! Piikalàci Bulelèlè, cyòci ciikàle Nyuma Mwïmpè wàkwila mu muntu awu, shààla mupùwe ùteelejè, ikalà ne kaneemu. Mbifwànyìne kwenzeka ne dyandamuna dilwe kùdi wèwè. Nwamònu anyì? Sòmba mupùwe; tèèlejà bwa dyandamuna. Mpindyewu, kwòkò kakùyì mwandamunyi mu ekeleeziya to, dìbà adi bantu bàdi ne cya kushààla bapùwe mu Mubidi.

¹²² Nenku dìbà adi, pàdibo bàakula mu mwakulu mwenyi, Bible mmwambe ne, bàdyàkwilè bòbò biine ne Nzambi. Ewu udi wakula mu myakulu myenyi ùdi ùdikolesha yèyè mwine. Mpindyewu, ki myakulu myenyi nyòyi ayi: mishindu ya mwakulu, myakulu mbishìilàngàne. “Bìdi bintu cyanàànà,” mùdiye wamba . . . Kadi cìdi cìpàtula dìyi cìdi ne cìdici yàmba. Kadi nwènù . . . Mpungi yèyè ùpàtula dìyi, bìkèngela umanyè mùdiye ùpàtula dìyi adi (. . . mwelè wèwè anu cyanàànà) pàtupù kwàkumanya mwa kudìlongolola ku mvità to. Muntu yèyè wàkula mu myakulu, wènza anu “tuut”; piikalàbi ne ki cyònsò cìdiku pa bwalu abu, nganyi wàmanya cya dyanza. Kadi yèyè ùpàtula dìyi dya *ditàbulujangana*, dìdi dyùmvwija ne “juukàayi panshi!” Yèyè ùjima *midilu*, cìdi cyùmvwija ne “lààlaayi panshi.” Nwamònu anyì? Yèyè ùtuuta *mazaji* cìdi cyùmvwija ne “asàayi

màzajì.” Bikèngela cìfìlè dyumvwija kampànda, kabiyi anu kwakula nàka to. Pa nanku mu ekeleeziya, kwòkò kakùyì mwandamunyi to, kadi kwòkò mwandamunyi, dîbà adi myakulu yìdi ne kààyi kaaba mu ekeleeziya amu.

¹²³ Mpindyewu, ku lukonko lwebe, mulundà munanga, lùdì lwàmba ne: “Mbipiciibwe ne mèmè mwakùle myakù binunu bitaanu . . .yitaanu, mu mushindu wà bantu mwa kungumvwa pamutù pàà binunu bitaanu (anyì cinyì cikwabo cidici cyàmba) mu mwakulu mwenyi.” Aci’s ncilelèlè. Kadi tũngunukà ne kubala: “. . . ambà anu ciikàle ku dibuulula anyì ku dyandamuna bwa dikoleshangana.” Nwamònu anyì? Bwa kukoleshangana.

¹²⁴ Mpindyewu, nènnpèèshèku anu kaadyeji kakese kàà ne kadi bu—kadi. . . Bu ne mvwa mpaasàtà wa ekeleeziya ulwàlwa ewu, bu Nzambi mwa kumbiikila bwa kwikala mpaasàtà wendè, mushindu wùndì mufwànyine kumulombola ngwówò ewu: Ndi mufwànyine kuteeta kupetakù muntu yònsò udi ne dipà muntwamu. Ne mvwa mwa kulomba bwa bantu abu kудisangishabò bu dîbà dijimà nanku kumpàlà kwa masangisha kubangawù, mu cibambalu cya pàà nkààyabò. Kubàlekela bàsòmba mu bwenzeji bwa Nyuma. Nenku katanci aka, muntu ùlwamù, mwikàle ne dipà dya dyakula dya mu myakulu. Nenku ùdì wàkula mu myakulu. Bònsò bàshààla basòmbe bapùwe. Ne pashìishe mukwabo ùjuuka wàndamuna cidì yèyè awu wàmba aci. Mpindyewu, kumpàlà kwa cyòci aci kufidiibwaci kùdì ekeleeziya, Bible ùdì wàmba ne bikèngela bàcìjingùlùle kùdì bantemu babìdì anyì basatu. Mpindyewu, abu mbantu bàdì ne dijingulula dya nyuma (nwamònu anyì?), bwalu misangu yàbùngì makolè mabì àtu àbwelamù. (Nwamònu anyì?) Pòlò wàkacyàmba. Kadi dîbà adi, bukolè bwa Nzambi bùdimù pààbù. Ngambilaayi disangisha didì bubì kabùyì bùsanganyiibwamù. Ngambilaayi mwaba wùdì bânà bàà Nzambi basangile wùdì Sàtaana kàyi munkaci mwabo. Mmu byònsò’s. Pa nanku kubìipishi kwìsù bwa aci to. Nwamònu anyì? Sàtaana ùdì myaba yònsò. Mpindyewu, ki bwalu abu’s. Muntu kampànda wàkula mu myakulu. Mpindyewu, kùdì basatu basòmbe mwaba awu biikàle ne Nyuma wa dijingulula. Nenku umwe wàkula mu myakulu ne ùfla mukenji. Mpindyewu, kacyèna mwa kwikala ditèèlèlè dya Mufundu to, bwalu Nzambi kàtu ùkwàta mudimu ne dyambulula didì kadiyi ne musinga to, ne Yèyè mmutwàmibile bwa katùcyènji to. Nwamònu anyì? Pa nanku kî ng’aci to. Mmukenji mutùmina ekeleeziya.

¹²⁵ Tudi bapetè bintu bibidi mu ditàbuluja edi bwa too ne mpindyewu. Tàngilààyi ne cyònsò cya ku byòbì cívwa—cipwàngàne, mu kantu ne kantu kònsò. Nwamònu anyì? Cìbwelè mu mudimu. Muntu umwèpelè mujuukè kuulu, mwakùle mu myakulu, ne bafìle dyandamuna, ne mwalùkile buludì ne mushìndike mukenji wùvwà mufùme ku dipàtuka awu. Mukwabo wàkajuuka dilòlò adi, ne mwambè ku—ku

disonsodiibwa dya cipròfetà, ne mwambè cintu kampànda, kàyi mumanyè cìvwàye wàmba aci to; kadi pashìishe ku ndekeelu kwambayè ne dīyī dikolè ne: “Wa disànka ng’ewu udi ulwa mu Dìna dya Mukalenge.” Ne lùkàsà lwònsò cintu kampànda kunkwàtaci ne kwambaci ne: “Mu mushindu mukwabo wa disànka ng’ewu udi witabuuja ne eci m’Mukalenge udi mulwè.”

¹²⁶ Mònaayi munda amu—dìbà adi ki Nyuma Mwìmpè kumataYè mu citanda makeèlèlè dilòòlò awu. Nwamònu anyi? Aci mbwà dikoleshangana. Mvwa mwimàne mwaba awu nteeta bwa kwambila bantu ne bàvwa ne cya kupeta Nyuma Mwìmpè. Kadi dyabùlù ùvwa mulwè mu nyungulukilu wa bantu amu, wàmba ne: “Kanùtèeleji to; shààlaayi bapùwe.”

Mwakùnyàànyī wa bakàji kwambayè ne: “Bill, mvwa ne disànka dyàbùngì be paùvwa uyiisha apu; mèmè kudyùmvwa anu bu ne mvwa mwa kujuuka kutùpika mpìcila mu cimanu’s.”

Mèmè ne: “Juuka ùtupikè’s.” Ki cyònsò cidìku.

Ki kwambayè ne: “Kadi wèwè mubange kwenza nanku,” ki yèyè ne, “bantu’s nebàbangè kwela mbilà,” yèyè ne, “dìbà adi mèmè kudyùmvwa anu bu ne mvwa kantu cyanààna.”

¹²⁷ Mèmè ne: “Awu’s ndyabùlù. N’Sàtaanà awu. Pààluyè kwenza nanku awu apu,” mèmè ne, “bìvwa bikèngela anu wèwè kujuuka nansha bìshi.” Twètù’s tudi baakwidi bàà Nzambi, biikàle tufila mulàmbù—mulàmbù wà nyuma, mamuma a mishikù yetu biikàle tutùmbisha Dìna Dyèndè. Nwamònu anyi?

¹²⁸ Mpindyewu, mpindyewu, cyènzèki ncyeci. Dìbà adi Nyumà Mwìmpè kubwayikaYè, bwalu cìvwa anu. . . “Wa disànka ng’ewu udi witabuuja.” Malòòlò abidi, anyi asatu malondàngane mùndi muteete kwadija aci mwòmò amu; ki pashìishe, Nyuma Mwìmpè kwakulaYè e kwamba (ku disonsodiibwa’s) kwamba ne: “Wa disànka ng’ewu udi ulwa mu Dìna dya Mukalenge.” Kadi kumpàla kwa mèmè kwamba nī ncinyī nī ncinyī, nkààvwa mucyàmbè cyònsò. “Wa disànka ng’ewu udi witabuuja ne Mukalenge mmulwè mu eci.” Nudi numòna anyi? Nenku ki cyòci cìndi mfùma ku dyamba eci ne, Nyuma Mwìmpè n’Nzambi Yèyè mwine munda mwebe. Nwamònu anyi? Nenku bòbò kucibàkula. Nwamònu anyi? Ki dìbà adi Nyuma Mwìmpè kupòna munkaci mwa bantu amu. Nwamònu mùdiYe—mùdiYe ùkoleshangana anyi, cipròfetà aci?

¹²⁹ Mpindyewu, kùdi dishìllangana pankaci pàà cipròfetà ne mupròfetà. Cipròfetà cidi cyùmuka kùdi muntu cìya kùdi mukwabo, kadi mupròfetà mmulela mupròfetà kubangila anu ku kalààlù. Bàdi bòbò ne EMU MMÜDÌ MUKALENGE WÀMBA! Kakwèna dibàlumbulwisha to. Kwèna umòna bìimana kumpàla kwa Yeshàayi, anyi Yelèmiyà, nansha umwe wa ku bapròfetà abu to, bwalu bàvwa ne EMU MMÜDÌ MUKALENGE WÀMBA! Kadi nyuma wa cipròfetà munkaci mwa bantu; bikèngela

nùmutabàlèlè, bwalu Sàtaanà neàdifindèmu. Nwamònu anyi? Mpindyewu. Kadi cidi ne cya kujinguludiibwa.

¹³⁰ Mpindyewu, netwikalè—netwikalè mwa kwenza ditàbuluja. Mpindyewu, eci nùcitàbàlèlèlaayi ne ntèmà yònsò mpindyewu, nwènu bambi. Tudi pabwîpî ne kwenza ditàbuluja. Eyo. Anyi pàmwàpa tudi twenza anu disangisha dya ciibidilu dya ekeleeziya. Ekeleeziya ùdi ùlàkuka kapyà. Bivwa bikèngela kwikalabi nanku dibà dyònsò. Ee, pàmwàpa tudi ne bantu bataanu anyi bàsambombo bàdì ne mapà; umwe wàkula mu myakulu, babidi anyi basatu pàmwàpa bàkula mu myakulu, banaayi anyi bàtaanu biikàle ne myakulu, biikàle ne dipà dya myakulu, bààkula mu myakulu myenyi. Babidi anyi basatu bàà kùdìbo biikàle mwa kwandamuna. Pàmwàpa kùdi umwe—babidi, anyi basatu bàà kùdìbo biikàle ne mapà a lungenyi. Eyo. Bàdi bàdisangisha bònsò, bantu bàdì ne mapà abu. . . Nwènu. . . Mapà awu mmanùpèèbwe kî mbwà kunaya naawu to, kî mbwà kwamba ne: “Butùmbi kùdi Nzambi’s wè, mèmè ndi ngaakula mu myakulu! Aleluuyah!” to. Newikalè—udi—udi udipwekesha wèwè mwine milongo. Mmanùpèèbwe mbwa kukwàta naawù mudimu. Nenku wèbè mudimu mu ekeleeziya bìvwa bikèngela kulwawù kumpàlà kwa disangisha dyena diinà kubangadi, bwalu ewu udi kàyi mulongèshiibwe neikalè munkaci mwetu.

¹³¹ Dìbà adi nudi nuya pàà nkààyenù mu cibambalu aci, ne nusòmba muntwamu, nwènu bònsò pàmwè, bwalu nudi bakwàcishanganyi mu mudimu wà Evanjeeliyo. Dìbà adi nudi nusòmbamù. “Mukalenge, kùdikù cintu cyŪdi muswe bwa twètù kumanya dilòlò edi anyi? Akùlaaku neetu, Èyi Taatù wa mu Dyulu,” nwenza disambila, misèngelelu; nwimba misambu. Dyàkàmwè Nyuma ùtùuluka, wikila muntu kampànda, awu wàkula mu myakulu. Muntu ùjuuka wàmba ne: “EMU MMŪDÌ MUKALENGÈ WÀMBA.” Ncinyi aci? Tèèlejàayi. “Ndàayi nùkambilè Mwanèètù Jones àmwangalè mwaba wùdiye musòmbèle awu, bwalu mààlabà mu mapingaja nekùlwe mvùla wa kajoomona wànyangakaja citùpà cya buloba aci; ne neàjoomonè nzùbu wendè awu. Àngatè bintu byèndè àkebè kwa kuya àye!”

¹³² Mpindyewu, aci’s—aci’s cidi cyùmvwikakù cimpè. Kadi nwìndilè kakese. Bidi bikèngela mwikalè bantu basatu biikàle ne Nyuma wa dijingulula. Umwe wa kùdìbo wàmba ne: “Cìvwa cya kùdi Mukalenge.” Mukwabo wàmba ne: “Cìvwa cya kùdi Mukalenge.” Abu mbantèmù babidi pa basatu—babidi anyi basatu. Eyo. Bàdi bàcifùnda pa dibèji dya mukànda. Aci ncìdì Nyuma mwambe. Eyo. Bààlukila ku disambila, biikàle bàsàkidila Mukalenge.

¹³³ Paanyimà pàà katanci: “EMU MMŪDÌ MUKALENGÈ WÀMBA (mupròfetà ùdi ùjuuka kuulu) EMU MMŪDÌ MUKALENGÈ WÀMBA, dilòlò edi, nekùlwe muntu mukàji ùfùmina ku New York City; ùdi mu kalààlù kàà dyambwila

babèèdi; neàbwele mu citanda emu mwambwila mu kalààlù kàà dyambwila babèèdi. Udi ne mushwalà wà munshingù wà màyi a matàmbà mudijingila ku mutù. Ûdi ùpunga ne lufù lwà kànsère. Cidì cyenzè bwa kwikalayè mu mushindu awu, Mukalenge ùdi nendè cilumbù: musangu kampànda yèyè wàkiiba mfrangà ya mu Ekeleeziya Wendè pàcivwàye ne bidimu dikumi ne bisambombo. Ambilaayi Mwanèètù Branham àmwambilè maalu awu. EMU MMÛDÌ MUKALENGE WÀMBA, yèyè mulongòlòle bwalu abu, neòndopiibwè.” Nwindilè katanci. Aci’s ncyumvwiike cimpè cya dikèma, kadi nwìndilè katanci. Neufundè dìnà dyebe pa dibèji dya mukàndà adi anyi, wèwè mujinguludi? Neufundè dìnà dyebe anyi?

¹³⁴ “Civwa cya kùdi Mukalenge.” Umwe wàmba ne: “Civwa cya kùdi Mukalenge.” Dìbà adi—dìbà adi nudi nuci fùnda ne: “EMU MMÛDÌ MUKALENGE WÀMBA, dilòlò edì nekùlwe muntu mukàji, bwalu kampànda.” Ewu udi ne dijingulula dya nyuma, babidi anyi basatu bàà kùdibo bàdi bàfùndapù mènà àbò. Mikenji yònsò ayi yidi yifidiibwa. Eyo.

¹³⁵ Pashiishe paanyimà pàà katanci bàdi bàbanga kuumvwa kangonga kàdila. Ekeleeziya wàbangì. Pashiishe bàdi bàlwa ne mikenji ayi, bàyitèeka anu pa cyambilu apa. Anu apa mpàdiyi ne cya kutèekiibwa. Mèmè ndi mwaba kampànda ndonga, nsambila. Paanyimà pàà katanci mpàtuka paanyimà pàà misambu munkaci mwa kwimbiibwa. Ekeleeziya yònsò mujimà ùdi mu bulongàme, bantu bènda bàlwa, bàsòmba, bèèlangana meeji, bàsambila; ki cidì cikèngelà bwa nwènu kwenza. Kì nkulwa mu ekeleeziya kudìtwa mu diyikilangana muntu ne mukwèndè to, nudi nulwa mu ekeleeziya mbwa kuyiikila ne Nzambi. Enzèlaayi bwobùmwe bwenu pambèlù pàapa. Nwamònu anyi? Nzambi ngutùdi twenza Nendè bwobùmwe mpindyewu. Kadi twètù tudi tulwa apa twakula, bintu byònsò mu cimùmà, mu kaneemu kònsò, Nyuma ùkwàta mudimu. Mwimbi wa cisanji cya pyànò ùdi ùlwa ku cisanji aci tusunsa tutwè ku tutaanu kumpàlà kwa dimbisha dya misambu kubangadi, ùbanga bitùùlùbitùùlù menemene ne:

Ku nkùrusè kwàkafwilà Musungidi wanyi,
Kúngààkadilà mwadi bwa kukezudiibwa ku
mpekaatu;

Anyi musambu kampànda mwìmpè ne mutalàle, bitùùlùbitùùlù menemene. Wòwò awu wùdi wùbweja Bwikadi bwa Nyuma Mwìmpè mu disangisha. Nwamònu anyi? Eyo.

¹³⁶ Bantu mbasòmba mwaba awu. Bàmwè bàà kùdibo bàdi menemene—bàbanga kudila myadi ne bàlwa ku cyoshelu, bànyingalala kumpàlà mene kwa disangisha kutwàdijadi. Nyuma Mwìmpè ùdi mwaba awu. Nwamònu anyi? Ekeleeziya ùdi mu didinyèngà dya pa kulela. Beena Kilisto bàdi munkaci mwa kusambila, bàkaadi pa myaba yabo. Kì mbasòmbemù

biikàlè bàcyànkunyangana ne bàzòkà, bàmba ne: “Ê, Liddie, mpèeshèku kàpèntà kèèbè aku; ndi muswèku. . . Udi mumanye’s. Udi mumanye’s. Ndi dijinga ne. . . Udi mumanye’s, ditùkù adi pâmvwà muyè kuntu kwàka mukasùmbe bintu ku màkàjiiinyi apu, ndi nkwambila’s, nkààvwa mwambe kukudyata pa bânà bàà nkàsà’s. Nkààvwakù mumòne cya nanku. . . Udi wela pèèbè meeji kaayi bwa bwalu abu?” Kaa, luse’s wè! Kadi kubiiikila aci ne nnzùbù wa Nzambi. Mòna’s, s’mbundù. Mubidi wà Kilisto munkaci mwa kudisanga. Ki twètù bàdi basòmbemù abu.

Muntu musòmbè ku luseke aku ne: “Twàmbè ne, udi mumanye patùvwà bayè kuntwaku, *cikampàndà* ne *cikansanga* eci. . .” Aci ncìmpè bwa pambèlu, kadi mùneemu nnzùbù wa Nzambi.

¹³⁷ Bwelàayi biikàlè mu disambila; sòmbaayi pa myaba yenu. Mpindyewu, ncyèna ngambila ekeleeziya yenu to, nwènù bânà beetu. Ncyèna mumanye cinùtu nwenza to; bàndi ngambila mbeena tabernacle ewu. Ndi ngambila bàànyì mèmè bàà kwànyì kumbèlu. Nwamònu anyi? Ncyà bushuwa.

¹³⁸ Mpindyewu, panùdi nubwela mushindu awu, pashiiishe katanci aka, mpaasàtà ùpàtuka. Ùdi mu citaleela. Kabyèna bikèngela bwa kwikaleyè wàndamuna *cikampànda*, *cikansanga*, ne *cikankènga* to. Ùdi ùpàtuka buludì mu—mu cyashima cya mudimu wèndè wà bwambi. Ùvwa ùsanganyiiibwa mwinshì mwa bukolè bwa Nyuma Mwîmpè. Ùdi ùbwela buludì mu mwaba wùdi ndimì mikwabo ya kapyà mitwilànganle awu. Ncyambè kwikala dikunji mpindyewu (nwamònu anyi?), didi munkaci mwa kunyunguluka. Ùdi ùpàtuka apa, wàmbula eci. “Mukenji wà kùdi ekeleeziya: ‘EMU MMÙDÌ MUKALENGE WÀMBA, Mwanèètù Jones àmwangalè ku nzùbù kwèndè aku. Mààlabà mu mappingaja pa dîbà ibidi jaajaaja mvùla mukolè wa kajoomona neànyangakajè citùpà cya buloba cidiye aci. Àmbulè bintu byèndè àkwatè njila àye.’” Mwanèètù Jones ùdi wàngata aci. Eyo. Aci twàlamì. “EMU MMÙDÌ MUKALENGE WÀMBA, nekùlwe mukàji kampànda kaaba aka dilòòlò edì dinà dyèndè *Kampànda*, ne cìvwa—mmwenze *cikampànda*.” (Mùngǎfùmu ku dyamba amu, nwamònu’s, mushindu awu.) Eyo, aci nciètèeka mwaba awu. Ki cyòci aci. Bàkaadi mpindyewu bamanè kusòmba pa myaba yabo mu ekeleeziya. Eyo.

¹³⁹ Pashiiishe ùdi wàngata mukenji awu. Nenku katanci aka, ùdi ùbanga kuyiisha. Kabyèna bikèngela bwa cintu nansha cimwè cìcyamakanè to; cìkaadi cimanè kwenzeka. Mpindyewu, tudi tutùngunuka, tudi tuyiisha diyiisha.

¹⁴⁰ Ne paanyimà pàà katanci pàdi. . . Katanci aka pàdi diyiisha ne dyàjikì, mulongo wà dyondopa wùdi wùbanga. Ki muntu mukàji ulwàlwa ewu. Muntu kampànda ùvwa mwakùle mu myakulu mwambe ne mukàji awu ùvwa ùlwa. Nwamònu anyi? Yònsò wa kutùdi mmumanye ciikalà mwa kwenzeka. Yònsò

wa kutùdì mmucimanyè. Mònaayi mùdì diitabuuja dibanga kwibakiibwa ku ndimì ya kapyà yidì miimàne kumutù kwenu aku ayi mpindyewu. Dyàbangì kuungwila mushikì. Mòna's, cìdì anu mudimu mumana kujikija; kwàjikì.

Mukàjì awu . . . Nèngàmbè ne: “Màndamù *Kampànda*, wa mu New York City, musòmbe kaaba aka . . .” Nwamònu anyi?

“Kaa, ncyà bushuwa's. Udi mumanye ciine aci bìshi?”

“Mmukenji wà kùdì Mukalenge mutùmina ekeleeziya. Paucìvwà ne bidimu dikumi ne bisambombo, kùvwakù mu mwaba *kampànda* ne mwenzè—mwàngàte mfrangà *kampànda* mu ekeleeziya, ne muyìbè, mupàtùke muyè, ne mukasùmbe naayi bilàmbà bipyabipyà anyi?”

“Kaa, aci ncyà bushuwa. Ncyà bushuwa.”

“Ncyòcì aci menemene cìdì Nzambi mutwàmbìle dilòlòlò edi mwambidìle kùdì Mwanèètù *Kampànda*, mwakùle mu myakulu; Mwanèètù *Kansanga* mwandàmùne; Mwanèètù *Kankènga* ewu mwambe, mwena dijingulula, mwambe ne cìvwa cya kùdì Mukalenge. Ne mbulelèlà.”

“Eyowa's!”

“Nenku, EMU MMÙDÌ MUKALENGE WÀMBA, ndà ùkacìlongòlòlè, nenku newòndopiibwè kànsèrè keebe aku.”

¹⁴¹ Mwanèètù Jones wàlukila kumbèlu, wàngata matempu, wàlukila, wàngata nkwasà yèndè ne mèèsà, ùmba ùmwàngala ne mwine mwaba awu. Pa dìbà ibidi jaajaaja mààlabà mu mapingaja: Bùù! ncintu cyònsò nkòong cìyaayà cyàcya. Nwamònu anyi? Dìbà adi ekeleeziya ùdì ùtùmbisha . . . “Twasàkidila, Mukalenge Yesu, bwa bwìmpè Bwebe.” Mpindyewu, ki mùdì bwalu nanku, bwa kwibaka, bwa ekeleeziya.

¹⁴² Mpindyewu, kadi cyòcì kaciyi cyenzèke paanyimà pàà bôbò bacyàmbè? Dìbà adi nudi ne nyuma mubì munkacì mwenu. Kanwèna baswè cintu cibì aci to. Bwa cinyì nuswà cintu *kampànda* cya cibì pàdì ma—maulu mùle tètè ne bya bushuwa bya Mpenta? Kanwàngaci mupinganyi wà kalekale wà kùdì dyabùlù awu to. Angàtaayi cintu cilelèlà. Nzambi ùdì naaci bwenu nwènu. Dìbà adi kanwènjikù kabidi masangisha to, ne kanùtèèki cintu kaaba aka to, too ne pààshìndikà Nzambi ne nudi nwàjaalàmì, bwalu nudi mukwàcishi wa ekeleeziya mu dikwàtà dya mudimu dya Evanjeeliyo. Mpindyewu, nwacyùmùvù ne ncinyì anyi?

¹⁴³ Nenku myakulu, myakulu myenyi. . . Muntu nansha umwe udiyè—kì mmumanye cidiye wàmba to. Yèyè ùdì wàkula; kadi dīyì dyònsò dītu ne dyumvwija *kampànda*. Aci cidi ne dyumvwija *kampànda*. [Mwanèètù Branham ùdì ùtuutakaja byanza—Muf.] “Klak, klak, klak!” Aci cidi ne—aci cidi—aci cidi mmwakulu mu mwaba *kampànda*.

144 Pâmvwà mu Afrike, ncivwakù ncìtabuuja to, kadi cintu cyònsò cìvwà cyènza mutooyi cìwva ne dyumvwija dya mushindu kampànda. Bible mmwambe ne kakwèna díyì nansha òmwè dídì kadiyi ne cídìdì dyàmba, kadiyi ne dyumvwija to. Díyì dyònsò dikaadiku dipàtùdìbwe edi dídì ne dyumvwija bwa cintu kampànda. Mòna's, mvwa mwa kuumvwa bantu bàmba. . . Mvwa ngamba ne: “Yesu Kilisto, Mwànà wa Nzambi.”

145 Umwe wa kù bóbò ùvwa wènza ne [Mwanèètù Branham ùdi ùpàtula díyì dya mwandamunyi wa beena Afrike—Muf.] Mukwabo wàmba [Mwanèètù Branham ùdi ùfila cyàkàbidi cìfwànyikijilu—Muf.]. Ne ciine aci cìwva: “Yesu Kilisto, Mwànà wa Nzambi.” Nwamònu anyì? Cìwva ne. . . Kadi kaciyi ne dyumvwija nansha òmwè bwànyì mèmè to, kadi kùdìbo bóbò cìwva mmwakulu anu wà mwomùmwe ne mùndì mèmè ngaakula neenu emu. Mwandamunyi wa mu ciiZùlù, ciiXhosa, cyena Basuto awu, ne bikwabo, pàvwàbo bàlwa, cyònsò cìvwà cyàmbiibwà, muntu yònsò ùvwa ùmvwa. Ne bintu binùdì neumvwa bantu aba bàakula bu beelè màyì mukana, ne nwela meji bu ne ndikukumina búngì cyanààna ebi, kí nnanku to; bidi ne dyumvwija. Pa nanku bìvwa bikèngela twètù kubìneemeka, kubìtèeka pa kaaba kààbì.

146 Mpindyewu, pàmwàpa kí nkufidìbwe mukenji nansha wumwe to. Mpindyewu, disangisha dyàjiki; dibìikila dya ku cyoshelu dídì munkaci mwa kwenjiibwa. Ne paanyimà pàà katanci (kakùyì kufidìbwe mukenji nansha wumwe paanyimà pààpa to) muntu kampànda ùjuuka pàdìbì anu ne wàpecì mpùngà bwa cyòcì aci. Nyuma Mwìmpè. . . Mpindyewu, Bible mmwambe ne: “Kwòkò kakùyì mwandamunyi to, àshaalè mupùwe.” Nansha cyòcì cìjinga kwakula bya bìshi, shààla mupùwe.

147 Wèwè udi wamba ne: “Ncyèna mwa kushààla mupùwe to.” Bible mmwambe ne uvwa mwa kushààla mupùwe. Nwamònu anyì? Pa nanku aci—aci ncidì cikòsa bwalu. Nwamònu anyì? Àshaale mupùwe.

148 Nanku, pàdì, pààlwà mpùngà wa bintu byònsò biikàle mu bulongame, dìbà adi pààtùpikilà Nyuma Mwìmpè pambidi pèndè bwa kufila mukenji, dìba adi kuwùfila. Kì cyòcì aci menemene cìvwà cìkèngelà bwa nwènù kwenza. Pashìishe dyandamuna dilwa, dyàmba ne: “Kùdi muntu mukàjì mwab'ewu dìnà dyèndè Sally Jones (Ndi ntèkemena ne kakwèna mukàjì wa adi dìnà kaaba aka to, kàdi. . .) Sally Jones. (Nwamònu anyì?) Tudi tumwambila ne edi dilòlò ndyèndè dya ndekeelu bwa dibìikidiibwa dyèndè. Àcìlongòlòlè ne Nzambi bwalu ùdi ne cikondo cìpì cìikalàye pànwapa.” Mpindyewu, Sally Jones neànyeemenè ku cyoshelu ne lùkàsà lwònsò (nwamonu anyì?), bwalu ndibìikidiibwa dyèndè dya ndekeelu. Nwamònu anyì? Kì difilà dya mukenji ndyòdì adi, anyì dishindika, anyì cintu kampànda.

¹⁴⁹ Ki ekeleeziya wa Mpenta mu mudimu nyèyè awu. Kakwènakù mushindu wà nyuma mibi kudifindayimu nansha, bwalu cikaadi. . . Bible ùdi wàmba anu menemene ne: “Cìikalè ku muntu ku muntu, ne bìikalè basatu; ne babidi anyi bapite apu bàjingululè.” Ki ekeleeziya nyèyè awu. Kadi tudi naabi penyì leelu ewu? Kutùpika, kwenza bikàsà, kuseka kadi kupàtuka pàdi muntu kampàndà wàkula mu myakulu apu; mukwabo ùtàngila, mwikàle wàkula bwa cintu kampànda cikwabo ne bantu bàkùngwila; mpaasàtà wènza cintu kampànda; anyi bantu bàkùngwila eku ne eku. Ee, aci kî ncîmpè to. Pàmwàpa mpaasàtà ùyiisha, kadi muntu kampàndà ùjuuka ùmwimanyika mu. . . Pàmwàpa ùbala Bible kadi muntu. . . Ùbala Bible, kadi muntu paanyimà pààpa wàkula mu myakulu. Kaa, to! Nwamònu anyi? Muyishi ùyiisha mu cyambilu, muntu ùjuuka ùmwimanyika, wàkula mu myakulu. Bìdi anu bìmpè. Ncyèna ngamba ne kî n’Nyuma Mwîmpè to, kadi bìvwa bikèngela bwa nwènù kumanya mwa kukwàta mudimu ne Nyuma Mwîmpè mwine awu (nwamonu anyi?), kukwàta Nendè mudimu.

Mpindyewu, ndi—ndi ngangata. . . Nucìdikù ne kaaba bwa lukwabo kabidi anyi? Pashiishe, màalabà ndyàlumingu. Pashiishe, netwikalè. . . Twànjàayi anu. . . Lukwabo ndwòlo elu. Ngeela meeji ne ndwà lutàmbe kwikala lwà ngàsà. Nenku mpindyewu, bu nwènù bònsò mwa kuntwàlaku kabidi katanci kakese, bu nwènù mwa kuswà. Ne pashiishe, nèngiikalè. . . Ndi muswe bwa nwènù—ndi muswe bwa nwènù kuumvwa eci nùnkù. Mvwa mulame elu nùnkù mu kiipàcilà. Elu ndwànyi lwà ndekeelu.

Mpindyewu, dyàmbedi, nèmbalè tuntu tubidi tùdi muntu ewu mukonkè. Ntufùnda pa kabèji kàà kale, tufùnda ne cyanza cilenga cya dikèma. Ncyèna ne cingènyingenyi cya ne ùvwa nganyi to, dîna dya—dya muntu nansha umwe wa kùdibo kî ndifùndapu to.

98. Mwanèètù Branham, mbîmpè bwa bambi kwenzabò ntàntà mile ya dilòmbà dya mfrangà mu masangisha àbò, bàmba ne Nzambi ngudi mubàmbilè ne bantu bùngi kampànda mu batèeleji bàdi ne cya kufila mfrangà bùngi kampànda anyi? Pùikalàbi mbîmpè, ndi muswe mmanyè. Anyi byòbi bibi, ndi muswe mmanyè. Bwalu ebu mbuntàcishe bibi be.

¹⁵⁰ Mpindyewu, udi umòna’s, wèwè mulundà wanyi, nènkwabìlè, nènkwabìlè cìndi mèmè ngeela meeji. Wamònu anyi? Mpindyewu, aci kî mbwena kwamba ne ncilelèlè to. Ndi ngeela meeji ne ncibi be.

¹⁵¹ Mpindyewu, ndi ngeela meeji nùnkù ewu. Nzambi ngudi muntùme mu budimi bwa bwambi. Nkààdikù mumòne bikondo bìmvwà mmwèka mufwànyine kwikalakù. . . Nenku ncivwa—ncivwakù ne mfrangà nansha mikese to. Nenku mvwa ngamba

ne: “Endèshaayi anu cyanààna dilòngò dya disangishila milàmbù adi.”

Kadi mulongolodi wa ndongamu ùlwa kúndi wàmba ne: “Tàngilà, Billy, tudi ne dibànzà dya ndola binunu bitaanu dilòbòlò edi, Mulùmyànà. Udi ne mfrangà ayi ku Jeffersonville bwa kudifuta anyì?”

¹⁵² Mémè kwamba ne: “Bìdi anu bímpè. Nzambi ngudi muntùme mwaba ewu, bwa cyanààna ncivwa mwa kwikala mulwe to. (Nwamònu anyì?) Endèshaayi anu dilòngò dya disangishila milàmbù adi cyanààna.”

Kadi kumpàlà kwa disangisha kujikadi, muntu kampànda kwambayè ne: “Udi mumanyè’s, Mukalenge mmutèèke mu mwoyi wànyì bwa kufila ndola binunu bitaanu bwa cyòci eci.” Nwamònu’s, nwamònu anyì? Dyàmbedi, anji kwikala mulombòdiibwe bwa kucyènza.

¹⁵³ Mémè ncitu ngiitabuuja bya dilòmbalomba, dilòmbà dya kàà pa luse, diikala ne kanza koolola bwa mfrangà abi to. Ndi ngeela meeji ne ncintu cibi. Mpindyewu, mwanèètù, pawikalà wèwè ucyènza, ncikutàpi ku mwoyi to. Wamònu anyì? Udi—udi wèwè mufwànyine kwikala ne dyanyisha dya kùdi Nzambi bwa kucyènza. Kadi ndi mémè ngamba anu bwànyì mémè mwine. Ncitu ncitàbuujakù to.

¹⁵⁴ Mpindyewu, ntu mene mumanye bambi bàtù bàya bàmba . . . Mvwa mwimane, anu abidi àdi panshi aa . . . Mpindyewu, aba kî mbeena Mpenta to, aba bàdi . . . Ee, ng’ekeleeziya (nwamònu anyì?), ekeleeziya mikwabo. Kùvwa nku disangisha dinene dya mu nntà. Gertie, wèwè’s uvwa naanyi, bakwabo bààbúngi bàvwapù. Ne bààkangata mapingaja majimà ku dingumba dya dyendè luumù—abidi anyì asatu madisangè (ng’ekeleeziya ya ciibidilu ya ciibidilu, mùdi ekeleeziya yetu ya cyena-leelu mùneemu mu cimenga emu, ne bikwabo) ku mpungilu munene—ne kwangatabò mapingaja majimà, biimàne pa cibumbà cya ku cyambilu—ne biikàle bàfuuna ne ne Nzambi ùvwa mwa kunyangakaja bya pa madimi byabo, kufila disaamà dya tunèkè kùdi bàna bààbò balela, ne bintu bya mushindu awu, bòbò kabàyi beelè mfrangà mu disangisha adi. Aci’s mbulelèlà bwa menemene, ne Bible ewu kumpàlà kwànyì. Mémè kwamba ne: “Aci nkupenda kwa Nzambi ne kwa bayiidi Bèndè.” Nzambi Yèyè mukutùme, Yèyè ngwatàngila bwalu bwebe. Yèyè kàyi mukutùme to, díbà adi dingumba ditangilè bwalu bwebe. Kadi—kadi wèwè . . . Nzambi Yèyè mukutùme, Yèyè ngwatàngila bwalu bwebe.

99. Kadi bishi bwa dinaya dya Noël mu ekeleeziya wa Nyuma Mwimpè?

¹⁵⁵ Ee, cyòci citàngile Kilisto kaayi, mbifwànyinekù anu kwikala bímpè. Kadi byòbi ne mbya Taatù Noël, mémè ncitu ngiitabuuja yèyè awu to. Nkààdi—nkààdi mumane kukola—

nkààdi mumane kukola muumùke pa aci. Ncyèna ngiitabuujakù bya Taatù Noël abi to nansha kakese. Nwamònu anyi? Nenku tùmwe twa ku tuubintu tukese twà Noël tùdibo naatù etu, ndi ngeela meeji ne mbintu bya macimbu. Nenku . . . Kadi ndi ngeela meeji ne bôbô bàkaadi buumùshe Kilisto yònsò mu Noël amu kadi kupingajamù bya Taatù Noël abi.

¹⁵⁶ Kadi Taatù Noël awu's mbwalu bufwikakaja. (Ncyèna munkaci mwa kutàpa nì nganyì nì nganyì wa kunùdi ku mwoyi nansha, mùndi ntèkemena, pa bìdi bitàngila bânà.) Kadi nènwwàmbilè. Mùneemu emu kì nkwanji kwenza ntàntà mule to, bidimu bitwè ku makumi abidi ne bitaanu, anyi makumi asatu, pàvwà mwambi kampànda mu cimenga emu, mpaasàtà wa— wa ekeleziya kampànda munene mu cimenga emu, ùmvwàku mèmè ewu mumanye bìmpè menemene, mulundà wanyì wa pa mwoyi, kulwayè kùndi. Nenku Charlie Bohannon (Mwanèètù Mike, wèwè's udi muvùlùke Charlie Bohannon, mulundà wanyì mwïmpè). . . Twètù basòmbe mu birò byèndè ne yèyè kwamba ne: "Ncyàdyàkwambilakù bàànyì bânà anyi kulekelakù bàmbila bàànyì biikùlù mashimi awu kabidi to." Yèyè ne: "Mwanàànyì mulela wa balùme mmulwe kùndi paanyimà pàà mumane kukùmbaja bidimu dikumi ne bibidi, wàkula bwa mwine Taatù Noël awu. . ." Ki yèyè, kwambayè ne: "Mòna's. . . Munanga wanyì, ndikù ne bwalu bwa kukwambila," yèyè ne: "Maman. . ." Nudi bamanyè's, ki kutùngunukayè ne kwamba bwalu bùvwàye mwenzè abu.

Pashiishe paanyimà pàà yèyè mwalùkile, kwambayè ne: "Nenku, Papa, mbya mwomùmwe bwa Yesu mwine ewu anyi's?"

¹⁵⁷ Ambilàngànaayi bulelèlè. Taatù Noël awu's mbwalu bukwàtakaja bwa beena Katolike bwa muntu kampànda, Kriss Kringlé anyi Nicolas Munsantu, munsantu mwena Katolike wa kale wa beena Allemagne wa kùkaadi bidimu ne bidimu uvwa wendakana eku ne eku wènzela bânà bintu bìmpè. Kadi mbajuukè kwendesha bwalu abu bùkaadi cilèlè. Kadi Yesu Kilisto ùdi Mwànà wa Nzambi. Yèyè ngwa cya bushuwa, ne Ùdi ne mwoyi.

Mpindyewu, ki lukonko ndwòlò elu, lwà ndekeelu, lùdi lwà dikèma. . .

¹⁵⁸ Mpindyewu tàngilààyaaku. Nudi bafwànyine kubènga kutwà ku cyànyì pa bwalu abu. Kadi pawikalà cya bushuwa mubènge kutwà ku cyànyì, wavùluka, bìikalèku mu meeji a bulundà's, kì mmwòmò anyi? Ndi mukunangè, ne ncyèna muswe bwa—ncyèna muswe bwa kukutàpa ku mwoyi to. Mèmè ndi anu, ndi muswe anu kwikala ne meeji matòòke. Mèmè nciyi mwa. . . mèmè ngambila mwanàànyì wa balùme mashimi, dîbà adi mèmè's ndi mwena mashimi. Nwamònu anyi? Ndi muswe kwikala mmwambila bulelèlè.

¹⁵⁹ Mpindyewu, ndi mmwambila bwa Taatù Noël, ngamba ne: “Eyowa, ncyá bushuwa, Taatù Noël útukù. Ikàlà utàngila Papa mu bufùkù bwa Noël.” Nwamònu anyi? Eyowa.

¹⁶⁰ Nudi bamanyè’s, ditùkù adi mvwa kuntwaku, ne mèmè kutèeta cyòci aci pa mwànà mutekète wa bakàji anu bwa kumòna cyanààna. Ki kunguuji labò cya bushuwa dyàbwàbwa adi. Mvwa nsanganyibwa mu nzùbu awu. Ne bòbò bàvwa biimàne mwaba awu, lwà ku Quaker Maid eku. Nenku mvwa muyè kuntwaku bwa kusumba byàkudya. Ki twètù, mèmè ne mukajàànyì, tuvwa muntwamu. Nenku kùvwa kànà kakese kàà bakàji, kakàyi ne ngondo mipite pa dikumi ne mwandamukùlù to, nenku ùvwa mwimàne mwaba awu, wèntza, wimba ne: “Taatù Noël, Taatù Noël...” Ki mèmè kwamba... Mu kankwasa kèndè kakese aku, nudi bamanyè’s, musòmbèle paanyimà pàà kaaditempu kakese aku.

Mèmè kwamba ne: “Udi ukèba Taatù Noël anyi?”

Yèyè ne: “S’m’papa wanyì’s, Mukalenge.”

Mèmè kwamba ne: “Ùbeneshiibwè, Munanga wanyì. Wèwè nyawu udikù ne lungènyi.”

Mpindyewu, lwà lukolè menemene ndwòlò elu, balundà bàànyì. Ne mu eci... Pashiishe nèngiimanyikè. Kaa, cidi—cidi m’Mufundù mwìmpè be, kadi ndwà kapanda-mutù bwa muntu yònsò udi ne mmwènekèlu awu. Ne lùkaadi lumpandè mèmè mutù munda mwa bidimu ne bidimu; kadi anu ku ngàsà wa Nzambi... Nenku mukajàànyì wa musinga mukolè, udi musòmbè mpindyewu paanyimà pààpa wàwa, pùmvùye ne ndi mupetè lukonko alu mu mapingaja emu, kwambayè ne: “Bill, newàdamunè lwine alu bishi?” Yèyè ne: “Nkàadi mudyèlèele lukonko alu mèmè mwine ewu.” Yèyè ne: “Kacya ncìvwakù mwa kucyùmvwa to.” Ki yèyè ne... .

Mèmè kwamba ne: “Lwàku dilòlò edi, Munanga wanyì. Nèngènzè ne mwanyì mwònsò ku dikwàcisha dya Nzambi.”

100. Mwanètù Branham, bu wèwè mwa kuswà umvwijàku Ebèlù 6.4 too ne ku 6.

¹⁶¹ Awu mmusangu kampànda wùvwàci menemene... Nwamònu’s, mpindyewu nebikengelè bwa nwènù kutàngilakù kaaba aka pa diitabuuja dyetu, ngàsà, dikùbiibwa dya beena kwitabuuja, disuminyina dya bansantu, disuminyina’s wè, eyowa, dya bansantu. Ebèlù nshapità mwi6, 4 too ne ku 6.

Mpindyewu, pàdici anu ne... njikija eci, dībà adi ndi ntèkemena ne Nzambi neànkwàcishèku bwa mèmè kunùtòokeshilaci bikolè. Mfwilaayikù luse, ndi—ndi ne Diyishi dyànyì bwa dilòlò edi; pàmwàpa nènyiishè cintu cimwecimwe aci mu dinda ku—ku disangisha adi. Pashiishe nènkwatè njila nye.

¹⁶² Mpindyewu, elu ndwà kapanda-mutù menemene. Nwamònu anyi? Mpindyewu, bikèngela nùtangilàayi bïmpè. Mpindyewu nùvulukàayi ne, twètù ku ekeleeziya eku tutu twitabuuja ne tulongesha, kî nne bônso bàdi bàlwa ne bèèla mbilà, bônso bàdi bàkulà mu myakulu, bônso bàdi bàlabulanganà ku cyanza ne muyiishi, ne bàdi ne Mwoyi wà Cyendelele to. Kadi tudi twitabuuja ne wêwè ne Mwoyi wà Cyendelele, Nzambi Yèyè mukupèeshe Mwoyi wà Cyendelele, udi naaWù mbwà kashidi. Nwamònu anyi? Bwalu tàngilàayi. Byòbi kabiyi nanku to, Yesu ùdi ùmwèneshiibwa mulongeshi wa mashimi. Mu Yone Munsantu 5.24, Yèyè mmwambe ne: “Ewu udi umvwa Mèyi Àanyi ne wítabuuja Ewu udi muNtùme ùdi ne Mwoyi wà Kashidi, ne yèyè kàakupicila ku cilumbulwidi to, kadi mmumùke ku lufù muyè ku Mwoyi.” Mpindyewu, kòkanganàaku Nendè’s. “Bônso bàdi Taatù muMpèeshe. . . Muntu nansha umwe kèna mwa kulwa kùNdi pàdi Taatù kàyi mumukòke nansha. (Mémè ndi ntèèla Mufùndu’s.) Bônso bàdi bàlwa. . . Muntu nansha umwe kèna mwa kulwa kùNdi pàdi Taatù Wanyi kàyi mumukòke dyàmbedi nansha. Ne bônso bàdi Taatù Wanyi muMpèeshe nebàlwe kùNdi. (Nwamònu anyi?) Ne yònsò udi ulwa kùNdi, Mémè nèmmpupèeshè Mwoyi wà Kashidi (Yone Munsantu 6), ne nèmmpujuulè ku lufù ku matùkù a ndekeelu.” Ki Méyi Èndè ngòwò awu.

¹⁶³ Mpindyewu tàngilàayi. Mémè muswe kwalukila mu Efèsò nshapità wa kumpàla, Pòlò ùyiisha. . . Mpindyewu, beena Kolintò, muntu ne muntu ùvwa ne mwakulu ne musambu. Nudi numòna ne ekeleeziya mikwabo kayivwa ne lutàtu alu to. Kàakambakù cintu nansha cimwe pa bwalu abu to. Yèyè wàkatèèlakù dyakula dya mu myakulu kaaba nansha kàmwè mu ekeleeziya wa beena Efèsò, mu ekeleeziya wa beena Loomò anyi? To! Bòbò’s bàvwa ne myakulu ne bikwabo byònsò anu mùvwà beena Kolintò naabi amu, kadi bàvwa naabi bitèèka mu bulongàme. Beena Kolintò kabàvwakù bòbò mwa kubitèèka mu bulongàme to. Nwamònu anyi? Kadi Pòlò wàkayakù ne wàkatèèka ekeleeziya awu mu bulongàme.

Mpindyewu, yèyè. . . Ndi ngiitabuuja, mùdi Oral Roberts wàmba ne: “Nzambi ùdi Nzambi mwïmpè” amu. Nwènù kanwèna nwitabuuja nanku anyi?

¹⁶⁴ Kadi wêwè udi wamba ne: “Ee, kadi bishi dîbà adi bwa beena Mpenta bàdi ne myakulu aba, Mwanèètù Branham?” Ndi ngeela meeji ne bàdi ne Nyuma Mwïmpè. Bushuwa’s. Eyo, bwa cinyi? Tàngilàayi. Nudi nwitabuuja ne Yèyè ùdi Nzambi mwïmpè anyi? Musangu kampànda Toomààsè wàkamba ne: “Nudi bamanyè’s, Mukalenge. . .”

Bakwabo abu bàvwa baMwitàbùùje. Bàakamba ne: “Kaa, twètù tudi bamanyè ne Yèyè ngwa cya bushuwa!”

“Kaa,” mwàkambà Toomààsè, “to, to, mémè ncyèna

nciitabuujakù to. Mushindu wumwepele wúngaàciitabuujà mèmè, bikèngela mpetèku cileeeji kampànda. Bikèngela ngèlè minu mu lubadi Lwèndè ne mu mpùtà ya misonso mu byanza Byèndè.”

Yèyè ùdi Nzambi mwímpè. KwambaYè ne: “Lwâku, Toomààsè. S’ki yôyi eyi.”

“Kaa,” mwàkambà Toomààsè, “bwa mpindyewu kaayi ngitàbùùjì.”

¹⁶⁵ KwambaYè ne: “Eyowa, Toomààsè, paanyimà pàà wèwè muMmòne, ne muMbaabâte, ne mwelè cyanza Cyànyì. . . byanza byebe mu lubadi Lwànyì, udi witabuujà. Kadi difutu ditàmbe bunene ndya aba bàtù kabàyìkù banjì kumòna kadi biitabuujà.” Yèyè ùdi Nzambi mwímpè. Ùdi ùkupèèsha dijinga dya mwoyi webe, mu bushuwa bwa bwalu. TùMwitàbùùjaayi anu cyanàànà. Aci’s—aci’s—aci’s ndikofi dya lufù dituuta Sàtaanà. Pàdi muntu ùkwàcila Nzambi pa Dìyì Dyèndè, mwanèètù, aci’s necishebeyè Sàtaanà musangu wònsò. Aci’s ncisùsù cya citàmbe bukòlè cidi Sàtaanà ùpeta, mpàdi muntu ùkwàcila Nzambi pa Dìyì Dyèndè. Eyowa’s, mukalenge. Múmvwà mwambe ne: “Muntu kààkwikala ne mwoyi anu nkààyèndè to (Yesu’s, dilòlò adi), kadi ku Dìyì dyònsò didi dipàtukà. . .”

¹⁶⁶ Mpindyewu, mònaayi eci. Mpindyewu nêmbangilè ku mvensà wa kumpàla:

Ki bwa cinyi tushìya maalu a cibangidilu a dilongesha dya Kilisto, tütungunukàayi too ne ku bupwàngàne; . . .
(Mpindyewu, cintu cya kumpàla cindi muswe bwa nùmanyè ncyòci eci: bàdi Pòlò wàmabila kaaba aka mbanganyi? Beena Ebèlù. Bàdi bàmba ne: “Ebèlù,” kuulu aku, Mukàndà wà Ebèlù. Mmwòmò anyi? Beena Yudà bàvwà babènge Yesu abu. . . Nudi mwa—mwa kucyùmvwa mpindyewu anyi? Ùdi wàmabila beena Yudà, ùbàleeja mundidimbi wà mikenji mùvwàyi cifwànyikijilu cya Kilisto. Bintu byònsò bya kale abi bivwa ncifwànyikijilu cya bipyabipyà. Mpindyewu tàngilàayi.)

. . . tushìya maalu a cibangidilu a dilongesha dya Kilisto, tütungunukàayi too ne ku bupwàngàne; . . .

¹⁶⁷ Mpindyewu, mmufùme ku dyakula naabò pa malongesha. Tùbwelàayi mu diyikila pa bintu bipwàngàne. Mpindyewu, nudi bavwijìbwe bapwàngàne mu Nzambi panùdi batwibwe citampì kùdi Nyuma Mwímpè *too ne* ku ditùkù dya bupikudi bwenu. “Ewu udi mulediibwe kùdi Nzambi (Yone wa Kumpàla) kàtu wènta mpekaatu to; bwalu yèyè kèna mwa kwenza mpekaatu to, bwalu Dìmiinu dya Nzambi didi dishààla munda mwèndè.”

¹⁶⁸ Muntu udi muujìbwe tètè ne Nyuma Mwímpè, kì ngudi udyàmbidila ne muujìbwe tètè to, kadi ewu udi mulediibwe kùdi Nyuma wa Nzambi kàtu wènta mpekaatu to, bwalu

Dimiinu dya Nzambi didi munda mwèndè, ne yéyè kèna mwa kwenza mpekaatu to. Nwamònu anyi? Aci ncidì Bible wàmba anyi? Pa nanku's ki cyôci aci. Wêwè udi. . . Kî ncyûdi wêwè wenza to, cidì, ne ki cidì bwalu to, kî ncidì bàà pa buloba bèèla meeji bwebe wêwè to, ncidì Nzambi wèla meeji bwebe wêwè. Nwamònu's, nwamònu anyi? Kwèna mwa. . . Mmunyi mûndiku mwa kwikala ne dîyi ditûma difûnda kùdì mfumu wa cimenga ne, ndi mwa kunyeemesha màshinyi kilòmèètà makumi asambombo ne yinaayi ku dîbà dîmwè mu cimenga cijimà emu, kadi mpùlushi kanà yònsò ewu pèndè ùnkwàta? Ncyèna mwa kwitabakù to. Mmunyi mûndiku mwa kwenza mpekaatu pàdîku mulàmbù wà mashi dîbà dyònsò kumpalà kwa Nzambi, mùdiYe kàyikù nansha mwa kummona; pàdîku cikàndiki pa—pa. . . kumpalà kwànyì ne Nzambi, ngabu wa Mashi? Bwalu twètù tudì bafwè, ne mwoyi wètù mmusokoka mu Kilisto kupicila ku Nzambi, batwibwe citampì kùdì Nyuma Mwîmpè. Nansha twamba mwine mmunyi mùdiku mwa kwenza cintu cibì ku mèsù kwa Nzambi? “Twètù twenza mpekaatu ku bukolè (Ebèlù 10) paanyimà pàà bamanè kupeta dimanya dya Bulelèlè, kakùcyèna kabidi mulàmbù bwa mpekaatu to.” Mwómò emu kabyènakù mwa kwenzeka (nwamònu anyi?) bwa kwenza mpekaatu ku bukolè to.

¹⁶⁹ Mpindyewu, tütungunukàayi ne kubala. Eyo.

. . . bupwàngàne; katùciyi kabidi tutèèka bishimikidi bya—bya kanyinganyinga kàà ku midimu mifwè, ne. . . diitabuwa kùdì Nzambi,

Bya dilongesha dya mabàtiiza, . . . ditentekelangana dya byanza, ne bya dibìshuibwa dya bafwè, ne. . . cilumbulwidi cya cyendelele to.

Kadi cyôci eci. . . nciwèna, bu Nzambi mwa kwanyisha.

(Mpindyewu mwaba ewu ngùvwàbo baswè kubangila, kuumukila ku mvensà mwi4.) *Bwalu kabyèna mwa kwenzekakù to bwa aba. . . musangu kampànda bakenkeshila, ne bamanè kulabula dipà dya ku dyulu, ne bavwijibwe baabanyanganyi bàà Nyuma Mwîmpè,*

Ne balabùle dîyi dîmpè dya Nzambi, ne makolè a buloba bùcilwalwà,

Bòbò badìshinde, bwa kubààlujulula—kubààlujulula cyàkàbidi ku kanyinganyinga; bu mudibi ne bàdi bàpoopele cyàkàbidi bwàbò bòbò biine Mwànà wa Nzambi pa nkùrusè, ne biikàle bàmuzànjika ku bundù bwa patòòke.

¹⁷⁰ Mpindyewu, mpindyewu, bìdi bìmwènèka bu ne, ku mushindu wùdì ucìbala mwaba awu, muntu mmufwànyine kupeta Nyuma Mwîmpè, ne pashìshe kutwà cìmpingà ne kujimina. Kadi kabyèna mwa kwenzekakù to bwa kucyènzayè.

Nwamònu anyi? Kéna mwa kucyènzakù to. Yéyè mucyènzè, Kilisto mmushimè. Nwamònu anyi? Kabyèna mwa kwenzekakù to bwa aba bàkaadi bakenkèshìibwe. Mpindyewu, tàngilàayi kaaba aka. Ùdi wàmabila banganyi? Ùdi wàmabila beena Yudà bàà ku mikàlu abu. Kàvwakù wàmaba muntu udi mùle tètè ne Nyuma Mwímpè to; mmwambe ne: “Yéyè mulabùle Dìyì dya Nzambi.”

¹⁷¹ Mpindyewu, ngǎnji ncifilèbi mu lusùmwinu, bwa nùmonè ne kacinùpici to bwa mpindyewu. Mpindyewu, ùdi ùfùndila beena Yudà aba. Bàmwè bàà kùdìbo mbeena kwitabuuja bàà ku mikàlu. Nwamònu anyi? Mmwambe ne: “Mpindyewu, netùshiyè midimu eyi bwa tùtungunukè bwa kwakula pa bupwàngàne.” Yéyè ne: “Mpindyewu, tudi twakula pa mabàtiiza, ne dibiishiiibwa dya bafwè, ne ditentekelangana dya byanza, ne bikwabo byònsò; kadi tuyaayi kumpàla mpindyewu bwa kwakula pa bupwàngàne. Mpindyewu, netwikalè mwa kwakula pa díbà dinùdi nubwela mu Nyuma Mwímpè. Mpindyewu, nukàadi balondèlònde masangisha ntàntà mule . . .”

¹⁷² Ne nukàadi bamònèmòne biine bantu abu. Bòbò nebàshalè anu mwaba awu; kí mbaswè nì nkubwela nì nkupàtuka to. Bàdi bàányisha Nyuma Mwímpè. Nebàsemenè pabwìpi. Ne pàmwàpa Nyuma Mwímpè wènta cintu kampànda, balùmyànà wa yààyà, nebàjuukè kuulu bèèla mbilà, ne bàtùpika bàya muulu bàalukila panshi bwa bwalu abu, kadi kabàyikù bàswa kuMupeta bòbò biine to. To, to! Nwamònu anyi? Kadi nebàmbè ne: “Kaa, eyowa’s, abi’s mbímpè. Kaa, mèmè ncyèna mumanyè aci mpindyewu to.” Nwamònu’s, nwamònu’s, nwamònu anyi? Beena kwitabuuja bàà ku mikàlu. Batàmbe kuseemena mu mushindu wà biikàle mwa kuMulabula, kadi kabàyi anu bàMupeta to. Nwamònu anyi? Mpindyewu, bàdi bàlonda masangisha mushindu awu too ne paanyimà pàà cikondo ne mùdìbo bàdyèla bàya biyiidi. Mèmè’s ndi mwa kutèèla mènà a bààbùngì bàvwà mu tabernacle emu, benzè cintu cimwecimwe aci. Badishinde cyàkàbidi, bwa kudyàlujulula cyàkàbidi ku kanyinganyinga, kakwèna kanyinganyina bwàbò bòbò to. Bòbò mbabungàmìje ne basàke Nyuma muyè kule naabo. Bàkaavwa baseemène bikolè mu mushindu wà ne . . .

¹⁷³ Mònaayi, bu nwènù mwa kubuululakù pàmwè naanyi (kanwèna ne díbà to, ndi mumanyè, mpindyewu) kadi bu nwènù mwa kubuululakù mu Dutèlònòmà nshapità wa kumpàla bwa kumubala, nenùpetè cintu cimwecimwe aci. Mufùndaayaaku mpindyewu, Dutèlònòmà nshapità wa kumpàla. Mpindyewu, nenku túbangilàayi ku mvensà wa 19 bwa kubala too ne ku wa 26. Dutèlònòmà . . . Nenùjandulè . . . Tàngilàayi mpindyewu. Izaleela mujimà . . . Cìdi bòbò bantu abu bènza aci, bàdi bàlwa ku Kaadèsà-baanèà. Kaa, mèmè ndi mmòna cintu kampànda! Tabernacle ewu, beena Mpenta aba bàkaadi ku Kaadèsà-baanèà patùdi twakulangana apa. Aci’s ncyà bushuwa menemene,

Mwanèètù Neville. Tudi ku Kaadèsà-baanèà, nkwasà wa cilumbulwidi wa buloba (s'ki cìvwà nkwasà wa cilumbulwidi).

¹⁷⁴ Nenku batentekedi bààkaya. Yoshùwa kwambayè kaaba aka ne: “Mpindyewu, ndi mutùme batentekedi,” anyì, Mòsà's wè. “Ndi mutùme batentekedi, dikumi ne babidi, umwe, muntu umwe mu cyònsò cya ku bisàmbà byenu. Ndi mubàtùme bwa kutentekelabò buloba abu ne kulwabò ne mulubù.” Mmwòmò anyì?

Kadi pààkaalukilàbo, kùvwa citeema pa dikumi ne babidi abu bààkambà ne: “Kaa, mbuloba bwímpè, kadi kaa, luse wè, katwènakù mwa kubùkwàta to. Kaa, ekelekele! Beena Amòlà bàdi muntwamu, ne twètù tudi tumwèka anu bu tupasu ku luseke lwàbò. Mbantu bambùle bya mvità. Ngumbu yabo mminene. Kaa, mbitàmbe kwikala...mòna's, bwànyì mèmè bìvwa bipìcìibwe ne twètù bafwile mu Èjjiipìtù mwàmwa pamutù pàà wèwè kulwa neetu kaaba aka.”

¹⁷⁵ Kadi, bakùlumpè abu Kaalèbà ne Yoshùwà kajuukilabò kuulu mwaba awu ne kubàtuuyishabò; kwambabò ne: “Twètù tudi batàmbe ne bacimunyi bwa kubùkwàta.” Eyowa's, mukalenge! Ki muntu nyèyè awu. Tàngilààyaaku mpindyewu. Ncinyì cyàkenzekà? Kaalèbà ne Yoshùwà bàvwa bamanyè ne Nzambi nguvwa mufile mulayì awu: “Nansha bwikàle bunene bìshi, nansha bipùmbishi biikàle bùngi kaayì, bantu abu nansha biikàle baleepa bàà bìshi, nansha biikàle banene bàà bìshi, aci kacyèna cìtàngila bwalu bùdi panshi ebu to. Nzambi ngudi mwambè nanku, ne twètù tudi mwa kubùkwàta.” Kadi nudikù bamanyè ne bàvwa anu bóbò babidi abu, pa bantu miliyò yibidi ne citùpà ayi, bààkasabukà kubwela mu buloba abu anyì? Bwalu bóbò bààkalama diitabuujà dyabo mu cìvwà Nzambi mwambe ne m'Bulelèlà aci. Amen!

¹⁷⁶ Tabernacle ewu, patùdi twakulangana apa, ki kwimanayè ku Kaadèsà-baanèà eku. Tàngilààyi, bantu abu bàkaavwa baseemène pabwìpì mu mushindu wà ne bààkalabula mene ne tumuma twà mvinyò twà mu buloba abu. Bààkadyà tumuma twà mvinyò atu. Pààkayà Kaalèbà ne bantu abu muntwamu ne kwalukilabò ne bisùmbusumbu bya tumuma twà mvinyò, bantu abu's bààkatùulakù ndambu e kutùdyabò. “Kaa, ntwímpè, kadi twètù katwèna mwa kucyènza to.” “Aba bàdi balabùle cyenzi cìmpè cya Nzambi, balabùle Nyuma Mwímpè, bamòne bwímpè Bwèndè, baMulabùle, balabùle Diyì dya Nzambi...” Nudi numòna aci anyì? Muntu nansha umwe wa ku bantu abu, nansha umwe wa kùdìbo kààkapetakù dyanyisha dya kusabuka kubwelamù to. Bààkabùtuka mu buloba bwàbò sungansunga, dyàmùnu mu cipèèlà. Kabààkasabukakù to, kadi pààbò's bààkafika pabwìpì menemene bwa kuMulabula, kadi kabàyi ne ngàsà ne diitabuujà bùngi bukùmbàne bwa kuMupeta to. Ki mùdi bwalu nanku.

¹⁷⁷ Mpindyewu. Mpindyewu tèèlejààyaakù munanga udi mufunde mukàndà ewu ewu. Tùbalààyi anu mvensà udi ulonda awu. Tàngilààyi anu bwa katanci kakese cyanàànà. Tàngilààyi Pòlò. Mpindyewu tùbalààyi mvensà wa 7:

*Bwalu buloba . . .bùtù bùnwa mvùla utu ulòkapù
misangu yàbùngì abu, ne bùtòlwesha bisèkiseki
byàkudyà bwa aba bàdìbo babwàkàjìle, bìdi búpeta
mabènesha a kùdì Nzambi,*

*Kadi ebu bìdi bùtòlweshà mèbà ne mingòngà
mbubèngiibwe, ne bìdi pabwipi ne kwedùbwa mulawu,
bwòbù bìdi ndekeelu ne cya kwoshiibwa.*

¹⁷⁸ Mpindyewu, nudi numòna cidiye wàmba aci anyi? Tàngilààyi mpindyewu. Kùvwa lukonko elu; mpindyewu, ne pashìshe netùjikijè. . . Cintu eci cìvwa cyambè kunshebeya munda mwa bidimu.

¹⁷⁹ Ngàkaya mu disangisha kampànda mungà musangu mùvwà bantu bàakula mu myakulu mu Mishawaka, mu Indiana. Mpindyewu, ndi kumpàlà kwa musùmbà wanyì mèmè mwine. Nukàadi bumvùmvwe bantu abu. . . bangumvwè ndonda bwalu-bulonda bwà nsòmbelu wanyì, ne bwa muntu wa bafìike wàkamba ne: “S’nyèyè ewu. S’nyèyè ewu” awu. Mpindyewu, ngàkalonda bwalu abu.

¹⁸⁰ Kadi citùpà cikwabo cya bwalu abu: Ngàkamòna bantu balùme babidi. Bàvwa. . . Umwe ùvwa ùfila mukenji, mukwabo ùwàndamuna. Mukwabo ùfila mukenji, ne mukwabo ùwàndamuna. Kadi mwanèètù, yìvwa mu yôyi’s. Anu eci. . . Mèmè kudyàmbidila ne: “Nzambi wanyì! Kacya ncitukù mwanjì kumòna cintu cya nàka to.” Mèmè ne: “Mèmè’s ndi munkaci mwa banjelo.” Mèmè kudyàmbidila ne, ncìvwakù mwanjì kumòna cintu. . . Umwe ùvwa wàkula, ne mukwabo. . .

¹⁸¹ Kadi mèmè mvwa musòmbe lwà paanyimà apu, bu muyiishi mukese wa kale, nudi. . . [Katùpà kàà mukàbà wà mèyì munda mutupù—Muf.] . . bantu bònsò babidi abu musangu kampànda mèmè kubàlabula ku cyanza. Ncìvwakù mwanjì kumòna bantu bàà mushindu wàwa kacya bàndela to. Bàvwa mwa kwamba mukenji, ne mukwabo uwàndamuna. Kadi ekelekele, ekelekele! Bìvwa bilenga bya kacya! Umwe, ùvwa wàkula ne mukwabo wàndamuna. Bònsò babidi. . . Ne bàvwa anu bàndamuka bàlwa batòòke zee bu lupèmbà pàvwàbo bèèla byanza muulu apu. Mèmè kudyàmbidila ne: “Kaa ekelekele, ekelekele! Mvwa penyì’s kacya bàndela? Cintu’s ki cyòci eci!” Mèmè ne: “Ekelekele, beena Mpenta’s mbàdi mu bulelèlà.” Ncya bushuwa menemene.

¹⁸² Kacya ncìvwakù mwanjì kumòna bwà ndolò to pa kuumusha bìvwà byènzekà mu nyùngulukilu emu abi, mùvwà. . . Pàmwàpa bakàjì ndambù biikàle ne kaacitanda mwaba kampànda. Kadi bàvwa bàkòkangana; ne ewu wàmba mukwèndè ne, “mucì wà diikilabò kùdì tubangu-nyuunyi,” ne, nudi bamanyè’s,

anu mushindu awu, bènza bu bàdì bàkòkangana ewu ne ewu. Mpindyewu kí nkudyombola kwa bakàjì abu anyì ní ncinỳì to, kadi anu. . . Bìvwa—bìvwa bya ciipanshì be. Muntu wa kunùdì. . . Vùlukà, wèwè Mwanèètù Graham. Ucìvwa anu mwànà wa balùmè mutekète mwine musangu awu. Nenku ewu, ki mushindu wùvwàbi.

Kadi mèmè kutèèleja aci, e kudyàmbidila ne: “Kaa, ekelekele, mèmè’s ndi mutwilàngàne ne banjelo.”

¹⁸³ Dìngà ditùku ngenda ndwila ku ditumba dya nzùbu, lwà pa ditùkù diibìdì, mèmè kutwilangana ne umwe wa ku bantu abu. Mèmè kwamba ne: “Wetwàwu, Mukalenge!”

Yèyè ne: “Wetwàwu!” Yèyè ne: “Udi. . . Dyèbè nganyi?”

Mèmè kwamba ne: “Branham.”

Yèyè ne: “Udi wa penyi? Wa mùneemu anyi?”

Ki mèmè ne: “To, Ndi wa mu Jeffersonville.”

Yèyè ne: “Ee, mbìmpè. Udi mwena Mpenta anyi?”

Mèmè ne: “To, mukalenge.” Mèmè ne: “Cìdibi ncyèna anu ngiitaba mushindu wà beena Mpenta wa dipeta Nyuma Mwìmpè awu to,” mèmè ne, “kadi nansha nanku,” mèmè ne, “ndi mwab’ewu bwa kuyiilakù.”

¹⁸⁴ Yèyè ne: “Ee, abi mbìmpè be.” Nenku pàmvwà nyiikila nendè apu, munkaci mwa kubàkula nyuma wendè (mùvwà mukàjì wa ku ciinà cya màyi awu), yèyè ùvwa mwena Kilisto mulelèlà. Mwanèètù, ndi nswa kwamba ne yèyè ùvwa ùmvwika bìmpè be. Ùvwa mwìmpè. Mpindyewu, nwènù bònsò. . . Mbanganyi bàkaadìku babwelè mu masangisha àànyì ne bamòne bintu abi byènzeka? Nudi numòna anyi? Kadi muntu awu ùvwa mulelèlà menemene. Ki dìbà adi, mèmè—mèmè kudyàmbidila ne: “Mwaba awu! Ekelekele, bilenga bilaya!”

¹⁸⁵ Lwà ku diine dilòlò adi, mēbà a mu mapingaja, mēmè kutwilangana ne mukwabo awu. Mēmè kwamba ne: “Wetwàwu, mukalenge!”

Yèyè ne: “Wetwàwu! Dyèbè nganyi?” Ki mèmè kumwambila. Ki yèyè ne: “Ukààdi. . . Udi—udi mwena Mpenta anyi?”

Mèmè ne: “To, mukalenge, ncyèna anu menemene mwena Mpenta to, mùndi ngeela meeji.” Mèmè ne: “Ndi mwab’ewu anu bwa kuyiilakù.”

Yèyè ne, mèmè ne, yèyè ne: “Kacya ukààdikù mupetè Nyuma Mwìmpè anyi?”

Mèmè ne: “Ncyèna—ncyèna mumanyè to.” Mèmè ne: “Bilondèshìle cinùdì nwènù bònsò bapetè, ngeela meeji ncyèna mucipetè to.”

Ki yèyè ne: “Kacya ukààdikù mwakùle mu myakulu anyi?”

Mèmè ne: “To, mukalenge!”

Yèyè ne: “Nanku kwèna muMupetè to.”

¹⁸⁶ Ki mèmè ne: “Ee, ngeela—ngeela meeji ne aci ncyá bushuwa.” Mèmè ne: “Ncyèna mumanyè to. Ndi anu nyiisha kùkaadi bidimu bibidi, anyi bishààdile ku abi,” ki mèmè ne, “ncyèna mutàmbe kuCimanya to.” Mèmè ne: “Pàmwápa ncyèna mumanyè to.” Mèmè ne: “Ncyèna mwa kuumvwa . . .” Bwalu, mvwa nteeta bwa kumulamina mwaba awu (nwamònu anyi?), bwa kucibákula. Nênkú pàngààkacibákulà, ní nkààdikù mutwilàngàne ne mwena lubombo, ki umwe wa ku bôbò ùvwa nyèyè awu. Mukàjèndè ùvwa ne nsukì mifiike; ne yèyè ùvwa musòmbe ne mukàji wa nsukì ya mitòòkòlòke, mulelè nendè bàna babidi; kadi mwikàle wákula mu myakulu, ùyàndamuna ne bupwàngàne bwònsò. Ki mèmè ne: “Mpindyewu, Mukalenge, ndi mukabwelè penyì?” Kuumuka ku banjelo, ncivwa mumanyè ne mùmvwà mukabwelè mmu binganyì to. Mèmè ne: “Mèmè—mèmè—mèmè’s ntu mwitabi wa maalu anu mùdiwu mafùnda; bikèngela cìikalè Bible. Bikèngela cìikalè cijaalàme. Kùdi cintu cipampàlàmuke mwaba kampànda, Mukalenge. Mbifwànyine kwikala nanku awu munyì?”

¹⁸⁷ Mèmè kuya mu disangisha dilòlò adi, ne Nyuma awu ùpweka; nenku mwanèètù, wèwè’s uvwa mufwànyine kuMuumvwa ne, Ùvwa n’Nyuma Mwímpè. Eyowa’s, mukalenge! Piikalàbi ne kàvwa n’Yèyè to, s’nyawu Ùvwa ùfila bujaadiki pàmwè ne nyuma wanyì ne Ùvwa n’Nyuma Mwímpè. Kadi ncicivwa anu muyiishi wa kànàkànà, nciyi mumanyè mùvwabi, menemene pa nyuma wa djingulula to. Kadi mvwa musòmbe mwaba awu. Ne ndi mumanyè ne Nzambi mene utu munsungile awu, aci civwa njiyà yimwèyimwè ayi. . . Mvwa ndyùmfvwa anu bu udi upicila mu musàkà wà nzùbu awu, yivwa nnjiyà milenga ya kacya mu citanda aci. Mèmè kudyàmbidila . . .

¹⁸⁸ Mùvwa bantu batwè ku cinunu ne nkàmà yitaanu. Mèmè kudyàmbidila ne: “Ekelekele, kaa ekelekele!” Misumbà yabo yibidi anyi yisatu nyìvwà midìsangìshe ayi. Ki mèmè kudyàmbidila ne: “Ambààyaaku mwaba awu, ekelekele! Bidi mwa kwenzeka munyì? Mpindyewu, Nyuma munene awu mu citanda eci ùpweka mushindu ewu; ne kaaba aka, tàngilàayi eci mùdìci cibànda kwàka, balùmyànà abu bààkula mu myakulu, bàndamuna, bàfila mikenji anu mu yòyi menemene— kadi umwe wa kùdìbo mwikàle mwena lubombo ne mukwabo muntu mulelèlè wa Nzambi.” Ki mèmè kudyàmbidila ne: “Mpindyewu, mèmè’s ndi mu cibwejàkàji cya menemene. Ncyèna mumanyè cya dyanza to.”

¹⁸⁹ Ee, dyàkàmwè paanyimà pàà cyòci aci, mulundà wanyì mwímpè, Mwanèètù Davis (nudi bamanyè’s), wàkabanga kwamba mùndi muntu wa bènzeja maalu. Aci nciipòpì cya bàna, nudi bamanyè’s. Nenku ewu, mvwa mujikè, ne pa nanku mvwa . . . Kubangayè wènga naanyi bikàsa, ne pashiishe ùtùngunuka, mwenzè bu udi ungelesha bilèlè’s.

190 Nenku tuvwa twenza ndambu wa...Ne mamwèbè ne twètù bònso tuvwa twenza tuumasangisha tukese mu myaba mishilèshilàngàne. Tabernacle kàvwa—kàvwa mwanji kubanga mwine musangu awu to, kadi tuvwa twenza tuumasangisha tukese mu myaba mishilèshilàngàne. Ki ndekeelu wa byònsò dīngà ditùkù, paanyimà pàà tabernacle mumanè kwibakiibwa, paanyimà pàà bidimu byàbūngi, mèmè kuya ku Green’s Mill ku nyòngòlò wanyì bwa kusambila, bwalu Mwanèètù Davis ùvwa mwambe bintu bikwabo bibi be bwànyì mèmè mu—mu cibèjibeji cyèndè. Mèmè mvwa mumunangè. Ncìvwa muswe bwa cintu kampànda kwenzekaci to, nenku mèmè—mèmè kuya kuntwaku bwa kamusambidila. Ki mèmè kuya kuntwaku, ne mèmè kubwela mu nyòngòlò amu. Ki mèmè kushààlamù matùkù matwè ku àbidì. Ki mèmè kwamba ne: “Mukalenge, mufwilèku luse. Kèna—kèna ne meeji—meeji a kwamba nanku to.” Ki mèmè kudyàmbidila ne: “Udi mumanyè. . .” Ki kumvwilabì bwa kwela meeji ku Mufundù kampànda.

191 Ki mèmè kupàtuka. Kùvwa citùpà cya mucì (citùpà cya mucì aci cìcìdi anu mwab’awu, mvwa musòmbepù anu àbidì àdi panshì aa) cìvwa cidishinde ku mukùnà ne cilààle cicyàmàkàne mu kajila kakese kàdi kàfùmina ku kasùlu aku. Ki mèmè kushààla musòmbe pa citùpà cya mucì aci cibelu eku cibelu eku, ntàngila dyàmwàmwà dya mikùnà paanyimà—paanyimà menemene pààpa, ne mèmè kutèeka Bible wanyì mushindu ewu. Mèmè kudyàmbidila ne: “Udi mumanyè’s. . .” Mvwa ngeela meeji ku Mufundù kampànda ne: “Nsenda wa byamù awu, mmungenzèle maalu mabì be, ne mwambè bintu.” Nudi bamanyè’s. . . Mèmè kudyàmbidila ne: “Ngeela meeji ne nèmبالè anu cyòci aci.” Mèmè kubuulula Bible, ne mèmè kwamba ne: “Ee. . .” Mèmè kudikùpùla kwìsù, kadi lupeepèlè kutuuta, ne kumubuululalù mu Ebèlù 6. “Ee,” mūngàakambà, “kì ng’amu mùdìci to.” Ki mèmè kuMùtèèkulula mushindu ewu. Ki lupeepèlè kutuutalù cyàkàbìdì ne kuMwalujalù cyàkàbìdì. Ki mèmè ne: “Mpindyewu, abu’s mbwalu bwa dikèma, lupeepèlè lùmubuulula cyàkàbìdì mushindu awu.” Ki mèmè kudyàmbidila ne: “Ee, ngeela meeji ne nèncibalè.” Nenku cìvwa cyàmba ne:

Bwalu kabyèna mwa kwenzekakù to bwa aba bàkaavwà musangu kampànda bamana kukenkeshila, . . . bavwìjìbwe baabanyanganyì bàà Nyuma Mwìmpè, ne balabùle. . . Dìyì dya Nzambi, ne cintu cya buloba bùcìlwalwà.

Mèmè kudyàmbidila ne: “Ee, ncyèna mmòna cintu pa bwalu abu to.” Mèmè kucibala too ne kwìnshì, cikwabo citùpà cya nshapità aci. Kamùyì cintu nansha cimwè to. Mèmè kwamba ne: “Ee, aci’s—aci’s ncikòse bwalu abu’s.” Ki mèmè—mèmè kucimòna mushindu ewu, ne kwalukilaci cyàkàbìdì. Ki mèmè kuWàmbula, ne kudyàmbidila ne: “Ee, ncinyì aci?” Mèmè kutungunuka ne kucibala, ne kucibala, ne kucibala, mèmè

kwamba ne: “Ee, ncyèna anu mwa kuumvwa to.” Pashiishe mèmè kutùngunuka. . . Ki mèmè kubala too ne kwinshe ne:

. . . kabyèna mwa kwenzekakù to bwa aba bàkaavwà musangu kampànda bamana kukenkeshila, . . .

Kufikaci kwinshe eku mu mwab’ewu wùdici cyambè ne:

Ne buloba. . . bùdi bùnwà mvùla udi ulòkapù misangu yàbùngì, bwa kutòlwesha bisèkiseki byàkudyà bwa aba bàdìbo bàbwàkajila, bùdi bùpeta mabènesha a kùdi Nzambi,

Kadi ebu bùdi bùtòlwesha mèbà ne mingònga mbubèngùbwe, ne. . . pabwìpì ne kwediibwa mulawu, dilumbulwisha dyàbù nkwohiibwa.

¹⁹² Mèmè kwamba ne: “Ndi ndìkonka cìdici cìswa kwamba’s?” Ndi anu. . . Mpindyewu, ncìvwapù ne meeji a cintu nansha cimwè to. Mvwa ngeela ànukù meeji cyanààna. Kadi anu dìbà adi pàmvwà musòmbè mwaba awu apu, mèmè kudyàmbidila ne Mukalenge ùvwa mwa kumpèèsha cìkèènà-kumòna bwa Mwanèètù Davis ne bakwabo abu kuntu aku. Nenku mvwa musòmbè mwaba awu; mèmè kutàngila, ne kumòna cintu cinyùnguluka dyàmvwàmwà dya cibandabanda cìvwa kumpàlà kwànyì aku. Kadi cìvwa mbuloba bùvwà bùnyùnguluka. Ki mèmè kubùmòna busekuna bwònsò, kumwèkabi anu bu ne bùvwa budima bwònsò. Ki Muntu kuseemena Yè ne—ne—ne cintu cinène menemene kumpàlà Kwèndè cyùle tètè ne mamiinu, ne Yèyè ùvwa wènda ùkùpa mamiinu pa buloba bwònsò pàvwà Yè wènda ùya apu. Ki kuya Yè lwà ku mfùdiilu wa buloba, ne kunjìmina Yè ku mèsù. Nenku Yèyè mmwenzè anu ùnjìmina ku mèsù, ki muntu wa mmwènekelu wa maalu a mwinshimwinshì menemene ulwàlwa ewu, muvwàle bilàmbà bifìike, wènda ùnyùnguluka mushindu ewu, wènta ne, *hwi, hwi*, ùkùpa mamiinu mabì ne, *hwi, hwi*. Ki mèmè kucitàngila, ne pàvwà buloba butùngùnùke ne kunyùnguluka apu. . .

¹⁹³ Paanyimà pàà mutanci ki blé kutòlokayè. Ne pàakatòloka blé, mwómò amu kutòlokamù mingònga, ne nyinyaacisòngà, ne mèbà, ne bisoosà bibì bya mupùyà mubì abi, ne bintu byònsò bitòloka, bisoosà bibì bya diikala dya mabèèle, ne bintu byònsò bitòloka munkaci mwa blé amu. Ne byònsò abi bìvwa bikolela pàmwè. Ki kulwakù mushipu, mubì wà menemene, ne kaablé kakese aku kwinyikakù mutù mushindu ewu, ne kaamungònga, ne kaanyinyaacisòngà, ne mèbà, bìvwa ne mitù yàbì miinyika. Cisoosà cibì cyònsò ànu, *he, he, he, he*, cyèyela mushindu awu. Uvwa anu mwa kubyùmvwa bìmpè. Ne bìvwa bìbìikila mvùla, mvùla.

¹⁹⁴ Ne paanyimà pàà mutanci, kulwakù divuba dinene menemene, ki màyi kwicikilawù bikolè. Nenku pàakamatàwu, blé awu kutùpikayè kuulu ne kubangayè kwela mbilà ne: “Butùmbi’s wè! Aleluuyah! Mukalenge àtumbishiibwè!”

Kaacisoosà kabi aku kàtùpika kèèla mbilà ne: “Butùmbi’s wè! Mukalenge àtumbishiibwè! Aleluuyah!” Mèbà ne byònsò abi, bijàngana ne maja myaba yònsò mu budimi amu byèla mbilà ne: “Butùmbi’s wè! Aleluuyah! Mukalenge àtumbishiibwè!”

Ee, mèmè kwamba ne: “Ncyèna mwa kuumvwa aci to.”

¹⁹⁵ Cikèènà-kumòna aci kunguumukaci; pashiishe mèmè kumatapù cyàkàbidi ne: “Mingònga yidi pabwipi ne kubèngiibwa ayi.” Dìbà adi mèmè kucyümvwwa. Yesu wàkamba ne: “Mvùla ùdi ùlòkela baakàne ne babi.” Muntu ùdi mwa kusòmba mu disangisha, kwakula mu myakulu, ùdi mwa kwela mbilà ne kwenza maalu anu mùdi bakwabo bònsò ne Nyuma Mwímpè wa cya bushuwa kadi kàyi anu mu Bukalenge bwa Nzambi to. Ncyà bushuwa menemene. Yesu kàakambakù ne: “Bààbùngi nebiimanè mu ditùkù adi ne nebàmbè ne: ‘Mukalenge, mèmè ewu ncitukù mwipàte baadémons mu Dinà Dyèbè anyi? Ncitukù mwambe bipròfeta (muyiishè) mu Dinà Dyèbè anyi? Ncitukù mwenzè byenzedi byabùngi bya bukòlè mu Dinà Dyèbè anyi?’” Yesu wàkamba ne: “Nguumùkilaayi apa, nwènu beena mudimu bàà bubì, kacya Ncitukù mene munùmanyè to.” Nudi nwamba bishì bwa aci?

¹⁹⁶ Ki cyòci eci menemene cidìci cyümvwija’s. Nwamònu anyi? Bàvwa balabùle mvùla mwímpè wa ku Dyulu. Kadi anu kwine kwònsò aku, bòbò bàvwa babì. Anu kwine kwònsò aku twipàcilà twàbò katùvwwa tujaalàme to; tubingilà twàbò katùvwwa tujaalàme to. Aci, kwèna mwa kumanyakù to. Kadi. . . Nudi bamanyè’s, ku dinowa yèyè wàkamba ne: “Nye nkabijoomòne byònsò anyi?”

¹⁹⁷ KwambaYè ne: “Bilekèlè bikolelè pàmwè, kadi mu ditùkù adi mèbà aa ne nyinyàcisònga awu nebyòshiibwe pàmwè, nenku blé neàye mu diyeebà.” Mpindyewu, neumanyè bishi ne eci ki dyèbà, anyi ne eci ki nyinyàcisònga, anyi ne eci ki blé? “Ku mamuma àbò ki kunwàbàmanyinà.” Udi umòna’s, mwanèètù wa balùme, mwanèètù wa bakàji, mucì mwímpè kawèna mwa kukwama mamuma mabi to. Nansha bishi, mwaba kampànda mu njila amu, necikupetè. Pa nanku, wèwè mu dikèbà dya Nyuma Mwímpè. . . Ndi ne disànka nansha byòbì ne udi mufùnde ewu ní nganyì. Nwamònu anyi?

¹⁹⁸ Mpindyewu, beena kwitabuuja bàà ku mikàlu abu, bàvwa anu pàmwè naabò. Bàvwa batengùdiibwe ne ditengudiibwa dyabo adi. Bàakaya buludì ku buloba bùvwà Nzambi mulayè abu, anu ku mwelelu kwàbù aku. Misangu yàbùngi muntu ùdi wèndela ku mwelelu aku. Yèyè neàye buludì too ne ku dibàtiiza dya Nyuma Mwímpè kadi kudibènga. Kì mmuswè kudilekela to. Neàye buludì too ne ku dibàtiiza dya mu Mifùndù mu Dinà dya Yesu Kilisto, kadi kwalukila cyànyimà, kadi kudibènga bwa ne kacimònu to.

¹⁹⁹ Kakwèna Mufùndù nansha wùmwèpelè mu Bible mujimà mùdìku muntu nansha umwe mubàtìjìibwe mu dìnà dya Taatù, Mwànà, Nyuma Mwìmpè to, Mufùndù nansha wumwe. Ekeleeziya wa Katolike ngwákacibanga, kupàtukaci e kulwa mu Luther, kulwaci mu Wesley, ne nci tungùnùke too ne patùkaadi apa. Ncya bushuwa menemene. Kadi dīyì ditùma dya mu Mifùndù dīdi n’Dìnà dya Mukalenge Yesu Kilisto. Ki dibàtiiza dya bapostolo ndyôdì adi. Kwèna mwa kwenza cyôci aci kadi kushààla mu dingumba to. Ncya bushuwa.

²⁰⁰ Mpindyewu, nudi numòna bintu abi anyi? Dibàtiiza dya Nyuma Mwìmpè, mapà a Nyuma, bintu bidì Nzambi ùtwàla . . . Mamuma a Nyuma àdi dinanga, disànka, mwoyi mule (kaa, wèwè udi wamba ne: “Kadi Mwanèètù Branham, Nzambi àbeneshiibwè, mèmè ndi ne mwoyi mule.” Mbimwènèke nanku. Mvwa muye mu Ohio anu àbidì àdi panshi aa, muntu kampànda kunkonkayè, mmufunde mukàndà mwab’ewu ùnkonka ní ntu mbàtiiza bantu mu Dìnà dya Yesu Kilisto. Ncyàkambakù dīyì to. Nansha nanku bàakacijandula, ne bambi dikumi ne basambombo bàkaavwà badisangè mu mudimu awu bààkuumuka. S’ki mwoyi mule ngwôwò awu’s kī mmwômò anyi?)—mwoyi mule, bwìmpè, bupòle, musàngeelu, lutùlù, ne Nyuma Mwìmpè. Nwamònu anyi?

²⁰¹ Kaa, mwanèètù wa balùme, mwanèètù wa bakàjì, tudì—tudì ku Kaadèsà-baanèà. Nudi munkaci mwa kulabula patùdì twakulangana apa. Makèlèlè dilòòlò awu Nyuma Mwìmpè mmutùpwekèle, mubwelè munda mwetu, bu cipeepèlè cya civuma. Úvwa musòmbe pa mitù ya bààbùngì bàà kunùdì. Leelu bambi mbakasàmbe mèkù apa ne pààpa, bàtentekelangana byanza ne bàsambidila aba bàvwà bàkèba Nyuma Mwìmpè. Kanwàngacikù mupinganyi to. Kanwàngacikù mutooyi wà mushindu kampànda to. Kanwàngacikù disaluka dya mushindu kampànda to. Wìndilè mwaba awu too ne pààkufwimbà Nzambi ne pààkuvwijàYe cifùkùibwà cipyacìpyà, mukuvwijè muntu mupyamùpyà. Nudi munkaci mwa kuMulabula mpindyewu, anu kuMulabula cyanàànà, kadi Nkuci ànùlombòle too ne ku mèsà, one—ne Mwànà wa mukooko ne Nkuci bisòmbe pàmwè, ne byènzè fète kashidi pa Dīyì dya Nzambi. Bwalu Dyôdì ndyàshààlè pìikalàku kakùciyi dyulu anyi buloba; Dīyì dya Nzambi ndyàshààlè. Aci ncilelèlè.

²⁰² Bu nwènù mwa kuswà kanwèdikù meeji ne ndi muumishi wa maalu to. Byôbì ne ki cìndì, kī nku bukolè to. Mèmè . . . ndi ntèkemena ne ngàndàmùnù ku nkonko eyi; ngáyàndàmùnù, ku dyànyì pàànyì dimanya.

²⁰³ Nenku ki bwa cinyì, mu Ebèlù 6, nwènù mwa kumòna, Pòlò ùdi wàmbila beena Yudà bàvwà bambe ne: “Ee, netùtwe ku cyebe too ne pa mwaba kampànda.” Nebàlwe. Nudi numòna anyi? Kwambabò ne: “Mpindyewu, wèwè udi . . .” Biine bààkasemena ne balabùle abu’s.

204 Mbyenzèke ne ntapè dísù mu citanda emu. Bwa kunùleja cileeji cya Nzambi udi ne Mwoyi. Ndi ntèkemenà ne ncyèna mvwija muntu ewu wa ùkòka ntema to. Ndi mulwe mufùmìne ku disangisha kampànda anu àbìdì àdì panshì aa, mulwè kaaba aka, ne munùmanyishe ne mulundà kampànda mwìmpè, mulundà wanyì wa katàpùlà-katèèka, mwena dyànyì wa mu bulembi, muntu uvwa naanyì bìmpè, muntu ukààvwakù mulwè mu ekeleeziya wanyì, ne ukààvwakù mwanèètù; mvwa mèmè mmubiikila ne Busty. Dìná dyèndè ng'Everett Rodgers; ùvwa musòmbèle mu Milltown. Mbanganyì bàdìku bavùlùke pàmvwà mulwè kucìmanyisha kaaba aka? Ùvwa mulàadika mùneemu emu mu lùpitaadi; bangàngàbukà bàvwa bamupandè, bamukàngùle munda, kadi mùle tètè ne kànsèrè mu mushindu wà ne bàakamutelulula anu cyanààna. Kwambabò ne: “Yèyè neàfyetelelè bikolè; munda mwa mbingu mikese emu yèyè neàtuulè nkinda; ki cyònsò ciikalàku. Bwèndè nebùtuukè, kwajiki.”

205 Nudi bavùlùke mungààkiimanà pa cibùmbà cya ku cyambilu apa, kumusambidila anyi? Mèmè kuya kuntwaku ne kubwela mu cibambalu amu, cintu kampànda munkaci mwa kundya mu mwoyi. Mèmè kubwela mu cibambalu amu, ne ndi mwenzè anu mpàtula bantu bònsò bwa ngaamòna mwa . . . Mwanèètù Everett ùvwa mulàadika mwaba awu. Nenku nenùvulukè cyòci eci. Mèmè kubwelamù; mèmè kwamba ne: “Mwanèètù—Mwanèètù Busty,” (Mvwa mèmè mmubiikila ne Busty.)

206 Kùkaadi ntàntà mule patùvwà twenza masangisha a mu tuumitàndà twà myonjì milambè kuntu kwàka, ba-Méthodistes bònsò abu pa kakùnà pààpa (Gertie, umwe wa kùdìbo), badìfindile eku ne eku, bàpongwela mu tuumitàndà twà myonjì ya mvinyò amu bwa kumòna címvwà mwa kwamba, ne mushindu awu, bàcìina ne nkwèpì kwàvwà ekeleeziya wa ba-Méthodistes kubìipata. Ki pashìishe, mèmè kuya ne kupeta cikèèna-kumòna mwaba awu, ne mèmè kumòna minyìinyi mipàya yònsò mu dikopo, mèmè kukwàta mushikì wà mishipa ne kuyààsa ku mbààla eyi, kuyèèla—kuyèèla ku nshinga, ne kuswikakaja nshinga ayi. Kadi pàngàakatàngilà . . . Nenku byònsò bìvwa mmu cikèèna-kumòna; mvwa mushiye—mushiye musùmbà wà bantu biimàne mu tuumitàndà twà myonjì milambè ayi dilòòlò adi ne mubànde ku lusongo lwà kakùnà kwa Mwanèètù Wright. Nenku kabàvwakù nansha mwa kumpeta pàakacyàbu mu dinda to. Mèmè kwamba ne: “Nansha umwe wa kunùdì kùkadi . . .”

207 Pàncìvwà mwimàne mwaba awu nyiisha apu, ki Bukènkè ebu pwà; Dikunji dya Kapyà adi dilembèléle anu kumpàlà kwànyì eku mene ne kwambaDì ne: “Umùka mwab'ewu ùye mu diitu; Mèmè nèngààkulè neebè.” Dìvwa nditùkù dimwedimwe adi, ditùkù dyàkalondà dyàkampetelàbo pa kakùnà apu. Nenku mvwa nsanganyiibwapù; mvwa musokòke kàshinyi

kàányi mu bisoosà, ne mubànde ku mukùnà nsambila bufùku bujimà ne ditùkù dyàkalondà adi dijimà. Bàmwè bàà kudìbo kubàndabò kuntwaku, kusanganabò kàshinyi aku ne kubàndabò kuntwaku . . . Ditùkù adi ki òwà Mwanèètù Graham Snelling, ewu nùnkù, mupetè Nyuma Mwímpè ne dibìikidiibwa dya ku mudimu wà bwambi.

²⁰⁸ Kuulu ku luseke lwà kakùnà kùmvwà nsanganyibwa aku, ki Yèyè—Yèyè kungambila bintu bishiilèshiiàngàne bya dyenza ne ciwà diyukilangana ditùvwà benzè bònsò pàmwè. KufilaYè cìkèèna-kumòna cya kumònà kwa mishipa yìvwà myasa ku mbààla eyi, wàmba ne: “Ki ekeleeziya webè wa Milltown nyèyè ewu.”

Ki mishipa yinaayi anyi yitaanu kutùkayi; ki mèmè kwamba ne: “Mbanganyi abu?”

Yèyè ne: “Umwe wa kùdìbo n’Guy Spencer ne mukàjèndè. Mukwabo mmukwabo Spencer awu, ne bàà mu dìkù dyèndè.” Ki Yèyè kutèela bashiilèshiiàngàne, bàvwà mwa kutùka.

²⁰⁹ Mvwa mubàmbile; mvwa mwambè ne: “Nansha umwe wenù kàdikù to.” Mèmè ne mukàjàányi katùvwà . . . Kùvwà nkumpàlà kwa twètù kusèlangana; ki yèyè kwalukila kumbèlu bwa kushààla bufùkù bujimà ne Mwanèètù wa bakàji Spencer, mukàji mwímpè wa kacya. Muntu mulùme mwímpè wa kacya, Guy Spencer ùtu muntu wa maalù malenga anu mùdì muntu wetù yònsò ewu. Ki yèyè—ki yèyè kuya kuntwaku, ki Opal kwambayè ne: “Mpindyewu, tàngila . . .” Wàmbila Meda’s, yèyè kwamba ne: “Mpindyewu, Meda, ntu ngiitabuuja Mwanèètù Bill.” Yèyè ne: “Kadi pàdi Opal nzala yimùsùma, bìkèngela àdye munyìinyi wà ku cibelu cya ngulube mwela mayi.” Ki kuyayè kuntwaku, kukàlangayè munyìinyi wà ku cibelu cya ngulube mwela mayi, kusòmbelayè panshi bwa kubìdya, ne kubangayè ne àsambilè bwa kubìnènesha, kadi kushààlayè mweyèmène ku mèèsà, ùdila mwadi, kàciyi mwa kubilengakù to. Pashiishe kulwabò bènda bàkèbangana naanyi.

²¹⁰ Kadi kuulu kwa mukùnà aku ditùkù adi, Yèyè ùkaavwa mungambile anu menemene ciwà mwa kwenzeka. Ùvwà mwambè ne: “Aba nebùùmukè, ne aba nebùùmukè.” Kadi Yèyè ùvwa ne mushiki munene wa munyìinyi wà mu dikopo. KwambaYè ne: “Lamà eci bwa kukwàta naaci mudimu pashiishe bwa bantu bàà mu Milltown.” Neku dilòòlò adi pàngàakumvwà Mwanèètù Creech . . . Ùvwà musòmbe kaaba aka makèlèlè dilòòlò awu. Neyèna . . . Mwanèètù Creech, udi kaaba aka dilòòlò edi anyi? Pààkalwà Mwanèètù Creech kùndì, kumbiikilayè, ne Mwanèètù wa bakàji Creech, ùdila mwadi; tatwèndè wa mwanèètù wa bakàji mulààdika pààpa. Kwambayè ne: “Mwanèètù Bill, kumwambìdiku to. Ng’wa lufù.” Yèyè ne: “Mmudyà kùdì kànsèrè; bangàngabukà mbamukàngùle difù, kadi mmùle ne kànsèrè mupangè ne mwa kuula.” Ki Will Hall (ne

nwênù bônso nudi bamuvùlùke), ngàngàbukà umwèumwè awu pààkamukàngulàye difù ne yèyè mûle tètè ne kànsèrè. . . Mwwa mwàsè lwendu lwà kuya kalemba nshindì mu dinda adi, ki mèmè kumòna bimuma bya pommes abi bilembèlèle mu cibambalu amu. (Nudi bavùlùke bwalu abu anyì?) Kadi's ki muntu awu nyèyè wàwa ne mwoyi leelu ewu. Kùkaadi bidimu. Yèyè ne Mwanèètù Busty bàvwa balundà.

²¹¹ Ki mèmè kuya ku lùpitaadi, lùpitaadi lupyalùpyà alu (ngápù mwoyi mùdìbo bàlùbùikila, mu New Albany mwàmwa) lùpitaadi lupyalùpyà alu. Nenku mèmè kuyakù bwa kumòna Busty; ne pàngààkabwelà mu cibambalu amu, mèmè kwamba ne: “Mwanèètù Busty.”

Yèyè ne: “Mwanèètù Bill.” Kushààlayè munkwàte ku cyanza ne dindabula dikolè dya ku cyanza adi; nkòlomù wa Mvità ya Kumpalà ya Buloba bujimà ayi, ncìyi ncyàmba ne bwalu yèyè ùdipù to, kadi ng'anu bu mwoyi mulenga wùkaadiku mutuutè mwinshì mwa mutèèlù wà bleu. Kushààlayè kacya wànkwàta ku cyanza. Nkààdikù mufikè mu nzùbù mwèndè; mudyè mu nzùbù mwèndè; mulààle mu nzùbù mwèndè, byenzè anu bu ne mwwa mwanààbò. Bàna bèndè ne bakwabo, tudi anu—anu bu bàna bàà muntu bàà mashi àmwè. Muntu wa maalu malenga.

²¹² Nenku yèyè. . . Kadi kacya kàvwakù mwanjì kuya mu ndòndò ne Mukalenge to. Yèyè. . . Ntu mumubàtìize mu Dìna dya Yesu Kilisto. Kadi ditùkù adi pàakambà muyiishi wa ba-Méthodistes awu ne: “Ewu yònsò udi mubàtìijìbwe mu Dìna dya Yesu Kilisto, àpatukè mu ntentà wanyì ewu.” Kakùvwa bwalu to. George Wright ne bakwabo abu kupàtukabò. Mu mapingaja amu mèmè kuyakù bwa kubàtìiza mu Dìna dya Yesu Kilisto ku Totten Ford. Disangisha dyèndè dijimà kubweladì mu màyi ne kubàtìijìbwadì mu Dìna dya Yesu Kilisto. Ki mèmè kutùngunuka. Bìvwa anu bìmpè. Nzambi Yèyè mutwè ku cyebe, nganyì wèla dyàpà muulu? Ncyèna nansha mumanyè ne muntu awu wàkaya penyì, cyàkamwenzekelà ncinyì to.

²¹³ Kadi, mèmè kubwela mu lùpitaadi amu. Ki Busty uvwa mulààdika pààpà wàwa mûle tètè ne kànsèrè, bangàngàbukà kabàyikù bafwànyine, kabàyikù ne cìvwàbo benzè to anu kumulululula difù adi cyanààna. Busty kungambilayè; kwambayè ne: “Mwanèètù Bill, eci mmu kiipàcilà kampànda. Cintu kampànda ncyenzèke's.”

Mèmè ne: “Eyowa, Busty.” Mèmè kubanga kuumvwa Nyuma awu byenzè bu cipeepèlè cya cìvuma cìmvwà ngamba aci, nudi bamanyè's, cyènda cìbwela.

Kwambayè. . . Pàngààbwedi mwab'ewu, kùvwa mwanzankòngòlò mu ditumba adi, mwimàne mu ditumba amu. Mwanzankòngòlò ncipungidi; cipungidi cya Nzambi. Nzambi wàkenza naanyì cipungidi pa mukùnà apu diine ditùkù adi. Mèmè kutentekela Mwanèètù Busty byanza ne kumusambidila.

Bangàngàbukà bàvwa bambè ne: “Yèyè neàfyetelelè bikolè. Nebyèndè anu bibiipa. Kakwèna cintu nansha cimwè cya dyenza to...Yèyè neàtuulè nkìnda anu mu matùkù makese aa.” Ki Busty Rodgers...Aci kùkaadi mbingu ne mbingu ne mbingu, kadi’s ki Busty Rodgers nyèyè ewu, musòmbe mu ekeleeziya emu dilòdò edi, ne mubidi tumatuma ne mukici ànu múnkààdikù mumumòne kacya bàndela. Juukilàbi kuulu túng, Mwanèètù Busty. S’ki yèyè awu. Tùpeeshàayi Nzambi butùmbi, twètù bònsò.

Bàvwa basangìle mu cibambalu cya kuulu,
Bònsò munkaci mwa kusambila mu Dìna
Dyèndè.

Babàtìjìbwe ne Nyuma Mwìmpè,
Ki bukolè bwa mudimu kulwabù.
Mpindyewu, cyàkabènzèlàYe ditùkù adi aci
Yèyè neàkwenzèlè bya mwomùmwe.
Ndi ne disànkà be mûndì mwa kwamba ne ndi
umwe wabò.

Ndi umwe wabò, umwe wabò,
Ndi ne disànkà be mûndì mwa kwamba ne ndi
umwe wabò; (Aleluuyah!)
Umwe wabò, ndi umwe wabò,
Ndi ne disànkà be mûndì mwa kwamba ne ndi
umwe wabò.

Nansha mùdì bantu aba kabàyi mwa kulàka
mukana bwa cidìbo,
Anyì kuditàmbisha bwa luumu lwà pa buloba,
Mbapetè bònsò Mpenta wabò,
Babàtìjìbwe mu Dìna dya Yesu;
Ne bàdi bàmbilangana mpindyewu ku nseke ne
ku nseke ne,
Bukolè Bwèndè bùcìdi anu bùmwebùmwe abu.
Ndi ne disànkà be mûndì mwa kwamba ne ndi
umwe wabò.

Ndi umwe wabò, ndi umwe wabò,
Ndi ne disànkà be mûndì mwa kwamba ne ndi
umwe wabò. (Aleluuyah!)
Umwe wabò, ndi umwe wabò,
Ndi ne disànkà be mûndì mwa kwamba ne ndi
umwe wabò.

Mpindyewu, lwàku, wèwè mwanèètù, kèba
dibènesha edi
Dyàkezulà mwoyi wèbè ku mpekaatu,
Dyàbangà kudidisha tungonga twà disànkà,
Ne dyàlamà musùukà wèbè wùlàkuka kapyà.
Kaa, ki kulàkukadi kapyà mu mwoyi wànyi
eku,

Kaa, butùmbi kùdì Dîna Dyèndè,
Ndi ne disànkà be mûndi mwa kwamba ne ndi
umwe wabò.

Tùwímbàayi!

Kaa, umwe wabò, umwe wabò,
Ndi ne disànkà be mûndi mwa kwamba ne ndi
umwe wabò. (Aleluuyah!)
Umwe wabò, umwe wabò,
Ndi ne disànkà be mûndi mwa kwamba ne ndi
umwe wabò.

Nganyì udikù umwe wa wabò? Elàayi byanza muulu. Kaa,
ekelekele! Kaa, disànkà kaayi dîndi naadi dya kwikala umwe
wabò's wè!

Umwe wabò, umwe wabò,
Ndi ne disànkà be mûndi mwa kwamba ne ndi
umwe wabò. (Aleluuyah!)
Umwe wabò, umwe wabò,
Ndi ne disànkà be mûndi mwa kwamba ne ndi
umwe wabò.

Bàvwa basangìle mu cibambalu cya kuulu,
Bònsò munkaci mwa kusambila mu Dîna
Dyèndè,
Bàakabàtijiibwa ne Nyuma Mwîmpè,
Dîbà adi bukolè bwa mudimu kulwabù;
Mpindyewu, cyàkabènzèlèYe ditùkù adi aci
Yèyè neàkwenzèlè bya mwomùmwe,
Ndi ne disànkà be mûndi mwa kwamba ne ndi
umwe wabò.

Kaa, umwe wabò, umwe wabò,
Ndi ne disànkà be mûndi mwa kwamba ne ndi
umwe wabò. (Aleluuyah!)
Umwe wabò, umwe wabò,
Ndi ne disànkà be mûndi mwa kwamba ne ndi
umwe wabò.

Mpindyewu, patùdì twimbulula cipungulujidi aci apa, ndi
muswè bwa yònsò wa kunùdì àkudimukè, àlabulè muntu
kampànda ku cyanza udi ku luseke lwèndè awu, àmbè ne: “Udi
umwe wabò anyi?” Nwamònu anyi? Eyo.

Kaa, umwe wabò (Ndi mumanye ne ki cyûdi,
Mwanèètù Neville. Ndi mumanye ne ki cyûdi,
Mwanèètù Capps. Ndi mumanye ne ki cyûdi.
Ndi mumanye ne ki cyûdi. . . ? . . .)
. . . ndi umwe wabò;
Kaa, umwe wabò, umwe wabò,
Ndi ne disànkà be mûndi mwa kwamba ne ndi
umwe wabò.

214 Kaa, kwênàku ne disànkà dya kwikala umwe wabò anyi? Mbanganyi bàdi baswè kwikala umwe wabò? Elà cianza muulu. Eyo. Mpindyewu, nênnwĩmbilè eci nũnku:

Nenku lwàku wêwè mwanèètù, kèba dibènesha
edi

Dyàkezulà mwoyi wèbè ku mpekaatu,
Dyàbangà kudidisha tungonga twà disànkà,
Ne dyàlamà musùùkà wèbè wùlàkuka kapyà.
Kaa, ki kulàkukadì kapyà mu mwoyi wányi
eku,

Kaa, butùmbi kùdì Dìnà Dyèndè,
Ndi ne disànkà be mũndì mwa kwamba ne ndi
umwe wabò.

Kaa, umwe wabò, umwe wabò,
Ndi ne disànkà be mũndì mwa kwamba ne ndi
umwe wabò. (Aleluuyah!)

Umwe wabò, ndi umwe wabò,
Ndi ne disànkà be mũndì mwa kwamba ne ndi
umwe wabò.

215 Nwavùlukaayi cìvwa mwánà wa bakàjì mutekète awu mwambile Peetèlò aci ne: “Wêwè ewu kwèna umwe wabò anyi?” Mêmè ndi ne disànkà be, kàdi nwènu? Nudi bamanyè’s, Peetèlò wàkamba mu ditùkù dya Mpenta ne: “Eci ki Cyôci aci!” Mpindyewu, mêmè misangu yònsò nkàadi mwambàmbe ne: “Pìikalà *Eci* kaciyi *Cyôci* aci to, ndi ne disànkà dya kwikala ne *Eci*, mwĩndile bwa *Cyôci* aci kulwaci.” Neya bushuwa. Ndi ne disànkà bwa *Eci*.

Bwalu ndi umwe wabò, ndi umwe wabò
Ndi ne disànkà be mũndì mwa kwamba ne ndi
umwe wabò;

Kaa, umwe wabò, umwe wabò,
Ndi ne disànkà be mũndì mwa kwamba ne ndi
umwe wabò.

216 Kaa, kî mbilenga bilayà anyi, basòmbe pàmwè mu myaba ya mu Dyulu mu Kilisto Yesu, tuyiikilangana ne Nyuma, tuyiikidilangana pa Dìyì, twakula pa bintu bimpè bicìlwalwà. Mbìmpè be. Ndi ne disànkà be bwa kumanya nanku, kàdi nwènu? Kwênàku wêwè ne disànkà bwa paùdì mwena Kilisto anyi? Kwênàku wêwè ne disànkà bwa mùdì mpekaatu yebe mwĩnshì mwa Mashì anyi? Yèyè neàlwe òmwe dya ku matùkù aa, ne twètù netùye Nendè. Dìbà adi elàbi meeji, bukùlàkàjì bwònsò nebùtùmùkè; mabèèdì ònsò, tunyinganyinga twònsò, mwoyi wà cifwàkà wònsò newùshintulukè. Kaa, ekelekele! Ndi anu mwa kwela meeji bwa bânà beetu bananga bàà kale bàvwàku biimàne mwab’ewu. Ndi mvùluka . . . Mbanganyi bàdi bàvùlukà Laabi Lawson? Ekelekele, pàmwè ne nwènu bònsò. Ndi mwa kumumòna ùkùdika dikombo dya kale adi anu apa

nùnkù. Ne mèmè mvwa musòmbe paanyimà pààpa. Ûvwa wimba kaamusambu kakese aka . . . (Indilà kakese, Teddy, mwanèètù.) Mèmè nènteetè, mmonèbi ní ndi mufwànyine kupeta cyonà cyàkù. Ncyèna mumanyè.

Nkungindile mààlabà wa disànka
Mùdi biibi bya masàngà byùnzuluka bìshìya
mishìku ya mbèlu myalàbàle
Ne pàngààkòsololà cibàndabanda eci cya
tuninganyinga,
Nèngiikishilè ku Luseke lukwabo.
Dìngà ditùkù dyàmwàmwà dya cyumvwilu cya
cifwàkà,
Dìngà ditùkù, anu Nzambi nkààyèndè ngudi
mumanyè ne mpenyi anyi ne ndìbà kaayi,
Nkàtà ya mwoyi wà cifwàkà neyìimanè yònsò,
Dìbà adi nènye kasòmbela pa kakùnà kàà
Sionà. (Eyowa.)

²¹⁷ Tukàtà tukese tùdi tùnyùngulukà munda mwetu etu—
lumònò, lulabulu, lulengu, lununku, ne luumvu, tuubyumvwilu
tukese ne tukàtà tùdi tùnyùngulukà mu mwoyi wà cifwàkà ewu
etu, dìngà ditùkù netwìmanè. Pashìishe mèmè, mèmè mwine,
ne wèwè, netùye kasòmbela pa kakùnà kàà Sionà. Kaa, ndi
munangè aci, kàdi wèwè? Ndi mumanyè ne tudi ne ditwishibwa
dibènesha adi. Eyo. Mbanganyi bàdi bamanyè musambu wètù wà
kale wà dibàtiizangana naawù awu? Mpindyewu, netùshintululè
aci. Twàngatàayi musambu wètù wà ditangalajangana naawù
awu:

Angàtà Dìnà dya Yesu wèndè naadi,
Wèwè mwànà wa tuninganyinga ne dikènga;
Nedìkupè disànka ne busàmbi,
Ndà naaDi kwònsò kùyaayà.

²¹⁸ Angàtà Dìnà dya Yesu wèndè naadi. Enzà anu aci cyanààna,
pawùyaayà apu. Eyo, bònsò pàmwè mpindyewu. Kanùpu mwoyi
to, pa dìbà mwandamukùlù jaajaaja wa dinda twarta twà
disambila netwàbanyibwè bwa disangisha adi. Disangisha
nedìbangè pa dìbà citeema ne tusunsa makumi asatu. Nènyiishè
pa dìbà dikumi. Mudimu wà disambidila babèèdi newùbangè
lwa pa dìbà dikumi ne dìmwè.

²¹⁹ Mààlabà mu mapingaja, mààlabà mu dilòòlò nekwikalè
dìyiisha dya butangadiki mu tabernacle. Nenku mààlabà mu
dilòòlò, nwènù bònsò bàdi banyingàlale ku mpekaatu yenu kàdi
kacya kanùyikù banjì kubàtijiibwa abu, nekwikalè. . . ciinà cya
màyi neciikalè bwàshi; netwikalè mwa kubàtiiza bantu mu Dìnà
dya Mukalenge Yesu Kilisto.

²²⁰ Bantu bònsò pàmwè mpindyewu, patùdi twimba banàngùle
mèyi apa. Mwanèètù Busty, kanwèna bamanyè mùndi ne
disànka ne kusàkidila kùdi Nzambi to. Nudi bamanyè's,

yêyè wàkaya kùdì ngàngàbukà. Nenku mbandondèle ne ngàngàbukà wàkamutàngila, ne kààkamanya cya dyela meeji to. Kààkiitabuuja ne ùvwa mmuntu umwèumwè awu to. Kaa, kî mmùnsokòntù to pa cìdì Nzambi mwa kwenza. Kî ncyà bushuwa anyi? Eyo.

Angàtà Dìnà . . .

Wìmbààyi banàngùle mēyì!

. . . wëndè naadì,

Wèwè mwànà wa tunyinganyinga ne dikènga;

Nedikupè disànka ne busàmbi,

Mpindyewu, ndà naadì kwònsò kùyaayà.

Dìnà dya mushinga mukolè (Dìnà dya mushinga mukolè!) Éyì dya bupòle be!

Ditèkemena dya buloba ne disànka dya Dyulu;

Dìnà dya mushinga mukolè (Dìnà dya mushinga mukolè!) Éyì dya bupòle be!

Ditèkemena dya buloba ne disànka dya Dyulu.

²²¹ Eyo. Ndi mpindyewu ngaalujila mpaasàtà bulombodi bwa disangisha. Yêyè neikalè ne ndambu wa mēyì, anyi neàmbe bwa muntu kampànda àtùtangàlajè, cyònsò cìdiye naacì mu meeji aci.



59-1219 Nkonko Nè Mandamuna Pa Nyumà Mwîmpè
Branham Tabernacle
Jeffersonville, Indiana États-Unis

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bìngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org